



HIDAYA
— LEARNING ACADEMY —

HADIS

DRUGI STEPEN



AKADEMIJA ISLAMA

Akademija islama

PREDMET:
HADIS

Drugi stepen

Sarajevo, 2025.

AKADEMIJA ISLAMA

PREDMET

Hadis

LEKTURA I KOREKTURA

Damir Muharemović

Arsim Ljatifi

STEPEN

Drugi

DTP

Fahrudin Smailović

AUTOR

Grupa autora

DIZAJN KORICA

B.dizajn

UREDNICI

Dr. Elvedin Pezić

Mr. Mirnes Škrijelj

IZDAVAČ

Hidaya Learning Academy

STRUČNI SARADNICI

Dr. Safet Kuduzović

Dr. Elvedin Pezić

Abdurrahman Kuduzović



PREDGOVOR

Hvala Allahu, Gospodaru svjetova, i neka su salavati i selami na posljednjeg Allahovog poslanika Muhammeda, sallallahu alejhi ve sellem, na njegovu časnu porodicu, ashabe i sve one koji ga slijede do Sudnjeg dana.

Islam pridaje izuzetnu važnost stjecanju i širenju korisnog znanja kao jednoj od osnovnih potreba muslimana u životu. Znanje je ključ uspjeha u vjerskim i dunjalučkim pitanjima, a Uzvišeni Allah podsjeća nas na njegovu vrijednost riječima:

“Allah će na visoke stepene uzdići one među vama koji vjeruju i kojima je dato znanje.” (El-Mudžadela, 11)

Poslanik, sallallahu alejhi ve sellem, kazao je: “Ko krene putem traženja znanja, Allah će mu olakšati put do dženneta.” (Muslim)

Imajući u vidu ove upute, Hiday Learning Academy predano radi na olakšavanju pristupa šerijatskom znanju putem stručno osmišljenih i pripremljenih udžbenika.

Osnovna misija Akademije islama, koja djeluje u okviru Hiday Learning Academy, jeste prenošenje islamskog znanja na pristupačan, savremen i na autentičnim izvorima islama utemeljen način, s ciljem širenja korisnog znanja, njegove primjene u svakodnevnom životu i izgradnje muslimanske ličnosti kao korisnog i odgovornog člana društva i zajednice.

Cilj Akademije islama je pružiti osnovno obrazovanje za početnike i napredne učenike, širiti tradicionalno islamsko znanje, promovirati moral i islamske vrijednosti, unaprijediti dostupnost znanja kroz savremene metode učenja, poticati praktičnu primjenu islamskih principa u svakodnevnom životu i promovisati međumuslimansku toleranciju i umjereno razumijevanje islama, odbacujući sve oblike ekstremnih i destruktivnih ideologija.



Naša nastojanja oslanjaju se na tradicionalne islamske principe u kombinaciji sa savremenim metodama edukacije, s ciljem postizanja dobrobiti kako za pojedinca tako i za društvo u cjelini.

Molimo Allaha, džellešanuhu, da podari bereket i uspjeh u našem radu i da svima koji uče iz ovih djela omogući da budu od koristi sebi i drugima.

Hidaya Learning Academy

UVOD

Zahvala pripada Allahu, Gospodaru svjetova. Neka je salavat i selam na Njegovog miljenika Muhammeda, sallallahu alejhi ve sellem, njegovu porodicu, ashabe i sve one koji ga slijede na putu istine do Sudnjega dana.

Pred vama je udžbenik iz predmeta Hadis za drugi stepen Akademije islama, koji se nadovezuje na prethodni stepen i nastavlja produbljivati razumijevanje sadržaja i primjene hadisā u svakodnevnom životu. Izabrani su hadisi koji obrađuju različite teme ključne za vjerovanje, ibadetsku praksu i međuljudske odnose, te na jednostavan i jasan način približavaju učeniku mudrost i svrhu poslaničkog govora.

Kroz odabrane hadise studenti se upoznaju s važnošću slijeđenja Poslanika, sallallahu alejhi ve sellem, i značenjem iskrenog nijeta. Govori se o vrijednosti dobrovoljnih ibadeta, ustrajnosti u vjeri, zadovoljstvu Allahovom odredbom te o iskušenjima i oprostu grijeha. Pojašnjava se i ispravno razumijevanje sadake, vrijednost čistoće i važnost olakšavanja vjernicima u nevolji.

Također, hadisi ukazuju na odnos Poslanika, sallallahu alejhi ve sellem, prema ummetu te potiču na savjetovanje, brigu za zajednicu i izgradnju zdravih odnosa među vjernicima. Kroz njih se razvija svijest o odgovornosti, suosjećanju i iskrenosti u svakodnevnom životu.

Cilj ovog udžbenika jeste da učenici ne samo nauče napamet ili razumiju značenje pojedinačnih hadisa već da steknu dublji uvid u Poslanikovu, sallallahu alejhi ve sellem, metodu odgoja te da ono što nauče pretoče u djelo. Hadis kao drugi izvor islama nakon Kur'ana vodi vjernika ka jasnoći i sigurnosti u vjeri i zato je njegovo pravilno razumijevanje i primjena od izuzetne važnosti.

Molimo Uzvišenog Allaha da ovo učenje bude korisno, da nam poveća znanje, ojača našu praksu i učini nas od onih koji slušaju, slijede i djeluju u skladu s riječima Allahovog Poslanika, sallallahu alejhi ve sellem.

PRVI HADIS

Ebu Hurejre, radijallahu anhu, prenosi da je Allahov Poslanik, sallallahu alejhi ve sellem, rekao: “Uzvišeni Allah kaže: ‘Ko bude neprijatelj Mome štićeniku, Ja mu objavljujem rat. Najdraže čime Mi se Moj rob može približiti jest ono što sam mu propisao kao obligatnu dužnost (farz). Moj rob Mi se neprestano približava nafilama sve dok ga ne zavolim. A kad ga zavolim, postanem njegov sluh kojim sluša, njegov vid kojim gleda, njegova ruka kojom prihvata, njegova noga kojom hodi. Ako Me zamoli za nešto, sigurno ću mu udovoljiti; ako zatraži Moju zaštitu, sigurno ću ga zaštititi. Ni oko čega što činim ne kolebam se koliko se kolebam oko duše vjernika: on prezire smrt, a Ja prezirem da mu učinim nešto nažao.’” (Buhari)

Prenosilac hadisa

Ebu Hurejre Abdurrahman b. Sahr ed-Devs, najistaknutiji prenosilac hadisa u islamu.

U vezi s njegovim imenom postoji veliko razilaženje, a poznat je po nadimku.

Govorio je: “Odrastao sam kao siročić i učinio hidžru kao siromah.”

Često je bio s Poslanikom, sallallahu alejhi ve sellem, i od njega prenio 5.374 hadisa.

Ebu Hurejre, radijallahu anhu, pripovijeda: “Pozivao sam svoju majku da primi islam. Bila je idolopoklonica. Jednoga dana sam je pozvao, pa mi je rekla nešto o Allahovom Poslaniku, sallallahu alejhi ve sellem, što me naljutilo. Došao sam plaćući Allahovom Poslaniku, sallallahu alejhi ve sellem, i rekao mu: ‘Allahov Poslaniče, pozivao sam svoju majku da primi islam, ali ona to odbija. Danas sam je pozvao, pa mi je za tebe rekla nešto što me naljutilo. Zato, zamoli Allaha da uputi majku Ebu Hurejrinu.’ Allahov Poslanik, sallallahu alejhi ve sellem, rekao je: ‘Allahu, uputi Ebu Hurejrinu majku.’ Izašao sam sretan zbog ove dove Allahovog Vjerovjesnika, sallallahu alejhi ve sellem. Kada sam se vratio i došao pred vrata, bila su zaključana. Majka je čula moje korake, pa



je rekla: ‘Sačekaj malo, Ebu Hurejre.’ Čuo sam pljuskanje vode. Okupala se, obukla odjeću, nabrzinu nabacila svoj prekrivač, otvorila vrata i rekla: ‘Ebu Hurejre, ešhedu en la ilahe illallah ve ešhedu enne Muhammeden ‘abduhu ve resuluhu – Svjedočim da nema boga osim Allaha i da je Muhammed Njegov rob i poslanik.’ Vratio sam se Allahovom Poslaniku, sallallahu alejhi ve sellem, plaćući od radosti. Rekao sam: ‘Allahov Poslaniče, raduj se, Allah je uslišao tvoju dovu i uputio Ebu Hurejrinu majku.’ On se zahvalio Allahu, izrekao Mu pohvalu i rekao: ‘Dobro!’ Rekao sam: ‘Allahov Poslaniče, zamoli Allaha da meni i mojoj majci učini Njegove robove dragim i da mi budemo njima dragi.’ Allahov Poslanik, sallallahu alejhi ve sellem, potom je rekao: ‘Allahu, učini ovog Svog malog roba (tj. Ebu Hurejru) i njegovu majku dragim Tvojim robovima vjernicima i učini da oni budu njima dragi.’ Nakon toga nije bilo nijednog vjernika koji je čuo za mene, iako me nije vidio, a da me nije zavolio.” (Muslim)

Vladar pravovjernih Omer b. el-Hattab, radijallahu anhu, postavio ga je za namjesnika Bahreina, a kasnije ga je povukao s te pozicije. Za vrijeme hilafeta Umejevića bio je namjesnik u Medini. Umro je 59. godine po Hidžri.

Značenje izrazā

Ja mu objavljujem rat: navješćujem mu stradanje i kaznu.

Jest ono što sam mu propisao kao farz: jest ono što sam mu propisao od farzi-ajna i farzi-kifaje, jer su farzovi Allahu draži od nafila.

Moj rob Mi se neprestano približava nafilama sve dok ga ne zavolim: ustrajnost u približavanju Gospodaru ima za rezultat postizanje Allahove ljubavi.

Postanem njegov sluh: kad čovjek postane evlija, Allahov štićenik i miljenik, Svevišnji Allah čuva njegovo čulo sluha i uputi ga na ispravne postupke glede čula sluha, čula vida te onoga što čini rukama i nogama.

Ako zatraži Moju zaštitu: ako zatraži od Mene zaštitu od onoga od čega strahuje.

Ne kolebam se: šejh Ibn Usejmin, Allah mu se smilovao, kazao je: “Nije dozvoljeno Allahu Uzvišenom pripisati kolebanje kao atribut u općenitom smislu. Naime, Svevišnji Allah rekao je za Sebe da se koleba samo u ovoj situaciji, pa je rekao: ‘Ni oko čega što činim ne kolebam se koliko se kolebam oko duše vjernika...’ Valja znati da navedeno kolebanje ne postoji zbog sumnje u



dobrobit za vjernika niti zbog sumnje u moć da se nešto uradi, već iz milosti prema vjerniku.”

Da mu učinim nešto nažao: da učinim ono što on prezire.

Opće značenje

U ovom hadisu izrečena je teška prijetnja onome ko iskazuje neprijateljstvo prema bilo kojem Allahovu štićeniku, budući da su Allahu dragi samo oni ljudi koji Ga istinski obožavaju i koji Mu robuju, a što je naposljetku osnovni cilj zbog kojeg je Gospodar stvorio ljude.

Ovaj hadis sadrži konstataciju da je izvršavanje farzova Allahu najdraži ibadet te da Allah, džellešanuhu, onog ko Mu se približava pomoću izvršavanja nafila zavoli, pomaže, čuva, uslišava njegove dove i podigne ga sa stepena imana na stepen ihsana, pa ne govori i ne čini ono što srdi Allaha.

Koristi u hadisu

Postoje ljudi koji su evlije, Allahovi miljenici i štićenici, i to se ne može negirati, utoliko prije jer je utvrđeno na temelju Kur’ani-kerima i hadisa. Kad je o tome riječ, najvažnije je saznati kako se može postati Allahov štićenik.

O ovom je stepenu Allah, džellešanuhu, objavio: “I neka se ničeg ne boje i ni za čim neka ne tuguju Allahovi štićenici, oni koji budu vjerovali i koji se budu Allaha bojali.” (Junus, 62–63).

Šejhul-islam Ibn Tejmijje, Allah mu se smilovao, zapisao je: “Onaj ko vjeruje i bogobožan je, taj je Allahov štićenik.”

Ne traži se od evlije, Allahovog štićenika, da hoda po vodi ili da leti, već je evlija onaj ko dosljedno slijedi vjerozakon koji je Allah objavio. Prema tome, oni koji su poslušni Sveznajućem Allahu i dosljedno slijede sunnet Njegova Poslanika – istinski su Allahovi štićenici. Djela onog za koga se tvrdi da je evlija, Allahov štićenik, treba posmatrati u svjetlu časnog Kur’ana i Poslanikova, sallallahu alejhi ve sellem, sunneta, i ono što je u skladu s tim izvorima ima se prihvatiti, a ono što nije u skladu s njima ima se odbiti.

Dvije su vrste Allahove zaštite: opća i posebna.



Opća zaštita odnosi se na sva stvorenja, na vjernike i nevjernike, čestite i grešne, u smislu da se Svemogući Allah brine o njima i daje im sve ono što im je potrebno u životu. Na ovu vrstu zaštite ukazuju Allahove riječi:

“On je iznad robova Svojih Svepotčinitelj i šalje vam čuvare. A kad nekom od vas smrt dođe, izaslanici Naši dušu mu uzmu, oni nikad propust ne prave. Oni će, poslije, biti vraćeni Allahu, svom istinskom Zaštitniku. Samo će se On pitati i On će najbrže obračun svidjeti.” (El-En‘am, 61–62).

Posebna zaštita odnosi se samo na bogobožne vjernike. Evo o tome Allahovih riječi:

“Allah je zaštitnik onih koji vjeruju i On ih izvodi iz tmina na svjetlo.” (El-Bekare, 257)

“I neka se ničeg ne boje i ni za čim neka ne tuguju Allahovi šticećnici, oni koji budu vjerovali i koji se budu Allaha bojali.” (Junus, 62–63)

Ovdje se nameće pitanje: Ako je neko evlija, Allahov šticećnik, je li on posrednik između Gospodara i ljudi u pogledu uslišenja dove i ispunjavanja potreba? Ne, nije.

Između Allaha, džellešanuhu, i Njegovih robova nema posrednikā.

Neki ljudi koji su skrenuli s puta Poslanika, sallallahu alejhi ve sellem, u pogledu evlija govore: “Oni su Allahovi miljenici i, prema tome, posrednici između nas i Svevišnjeg Allaha!”

Na početku se pomoću njih Allahu približavaju i umiljavaju, a zatim se njima, a ne Allahu, obraćaju pomoću dove, što je kulminacija nedaće.

Evlije kod Allaha Istinitog imaju visok stepen, pa se u velike grijehe ubraja ispoljavanje neprijateljstva spram njih, “evlija”. Koliki je to grijeh, dovoljno je to što Allah, džellešanuhu, objavi rat onom ko se neprijateljski ponaša prema bilo kojem Njegovom šticećniku.

Na temelju riječi: “Ja mu objavljujem rat...” ustvrdi se rat od Allaha Uzvišenog.

Da, Gospodar objavljuje rat takvima, kao što objavljuje rat zbog poslovanja uz kamatu:

“Ako ne učinite, eto vam onda, neka znate, rata od Allaha i Poslanika Njegova!” (El-Bekara, 279)



Allahu se pripisuje svojstvo iskazivanja ljubavi, koja nije ista prema svim ljudima, na osnovu riječi: “Najdraže čime Mi se Moj rob može približiti jest ono što sam mu propisao kao farz.”

Činjenjem dobrih djela čovjek se približava Svevišnjem Allahu. Naime, kad izvrši neki ibadet, najbolje što može je, iskreno, u skladu s Poslanikovom, sallallahu alejhi ve sellem, praksom i pribrana srca, osjetiti da se približio Allahu. To mogu osjetiti samo oni sretni, posebni ljudi. Uostalom, mnogo ljudi obavlja namaz, udjeljuje milostinju i posti, ali ne osjete Allahovu blizinu.

Ebu Musa el-Ešari prenosi da su ashabi jednom prilikom bili na putu s Poslanikom, sallallahu alejhi ve sellem, i tekbirali povišenim glasom. Poslanik, sallallahu alejhi ve sellem, im reče: “Stišajte glasove, jer vi ne dozivate gluhog niti odsutnog, već dozivate Onoga koji sve čuje i koji je sa vama, u vašoj blizini.” (Buhari i Muslim)

“A kada te robovi Moji za Mene upitaju, Ja sam, sigurno, blizu: odazivam se molbi molitelja kad Me zamoli.” (El-Bekara, 186)

Osjećaj Allahove blizine utječe pozitivno na djela i ponašanje.

Dobra djela se razlikuju prema kategoriji i vrsti. U vezi s kategorijom djela, farzovi su Allahu draži od nafilu, a u vezi s vrstom djela, namaz je Allahu draži od svih drugih farzova. Otud je Ibn Mesud, radijallahu anhu, upitao Poslanika, sallallahu alejhi ve sellem: “Koje je djelo Allahu najdraže?”, na šta je Resulullah, sallallahu alejhi ve sellem, odgovorio: “Namaz obavljen u njegovo vrijeme.” (Muslim)

Dakle, djela se razlikuju po kategorijama i vrstama, čak postoji razlika i među pojedinačnim djelima određene vrste. Navedimo primjer dvojice ljudi koji klanjaju isti namaz, a između njih u pogledu položaja i stepena u Allaha zbog tog namaza razdaljina kao udaljenost između istoka i zapada.

Allahove riječi u ovom hadisi-kudsiju: “Moj rob Mi se neprestano približava nafilama sve dok ga ne zavolim...” na sadržajan način potiču na činjenje mnoštva dobrovoljnih djela.

Mnoštvo nafilu, dobrovoljnih djela, ima za rezultat postizanje Allahove ljubavi, jer veznik “sve dok” u riječima: “Moj rob Mi se neprestano približava nafilama sve dok ga ne zavolim...” označava plod i rezultat. Eto, ako činiš mnoštvo dobrovoljnih djela, nadaj se Allahovoj ljubavi.



Allahova se ljubav može zaslužiti samo činjenjem onih djela koja su u skladu sa šerijatom. Ne odvraća farz-namaz svaku osobu od razvrata i zla, kao što svaka nafila ne približava Allahu Uzvišenom. Stoga je potrebno upotpuniti i usavršiti ibadet, dobro djelo, jer jedino na taj način za dobro djelo možemo zaslužiti predviđenu nagradu na ovom i budućem svijetu.

Pošto Sveznajući Allah zavoli čovjeka, uputi ga na ispravne postupke glede čula sluha, čula vida te onoga što čini rukama i nogama, pa sluša jedino ono čime je Allah, džellešānuhu, zadovoljan, i izvuče korist iz onog što čuje. Gleda samo ono čime je Allah Silni zadovoljan, i izvuče korist iz onog što gleda. Ruke pruža samo prema onom čime je Allah zadovoljan, i izvuče korist iz toga. Isto važi i za noge.

Kad Svevišnji Allah zavoli nekoga, uslišava njegove dove, daje mu ono što traži i zaštititi ga od neprijatnosti. Tako čovjek postigne ono što želi, baš kao što je kazano u predmetnom hadisi-kudsiju: “Ako Me zamoli za nešto, sigurno ću mu udovoljiti”, i bude sačuvan od onog od čega strahuje, baš kao što je u riječima: “Ako zatraži Moju zaštitu, sigurno ću ga zaštititi.”

Međutim, ako čovjek upućuje dovu za nešto što je grijeh, za nešto u čemu je kidanje rodbinskih veza ili u čemu je nepravda prema drugoj osobi, Gospodar mu neće uslišati dovu, makar činio mnoštvo dobrovoljnih djela: Allah je pravedan, pa takvu dovu ne uslišava.

DRUGI HADIS

Enes b. Malik, radijallahu anhu, pripovijeda: “Trojica ashaba došla su kod Poslanikovih, sallallahu alejhi ve sellem, žena i upitala nešto o njegovom ibadetu, a kad im je dat odgovor o tome, učinilo im se da je to malo. Još su rekli: ‘A šta smo mi u odnosu na Vjerovjesnika, sallallahu alejhi ve sellem! Ta njemu su oprosteni i prošli i budući grijesi!’ Jedan od njih reče: ‘Ja ću odsad cijelu noć klanjati!’ Drugi kaza: ‘Ja ću odsad svaki dan postiti!’ A treći zaključí: ‘Ja se nikad neću oženiti!’ Kad je za to čuo, Resulullah, sallallahu alejhi ve sellem, došao je i upitao: ‘Jeste li rekli tako i tako? Odista sam ja najbogobojazniji i najbolji vjernik: postim, ali i mrsim; klanjam, ali i spavam; i oženjen sam. Ko izbjegava moj sunnet, ne pripada mi.’” (Buhari i Muslim)

Prenosilac hadisa

Enes b. Malik b. en-Nadr el-Ensari. Bio je Poslanikov, sallallahu alejhi ve sellem, sluga, služio ga je do svoje smrti.

Enes, radijallahu anhu, rekao je: “Moja majka me dovela Allahovom Poslaniku, sallallahu alejhi ve sellem. Napravila mi je donji ogrtač od polovice svog pokrivača za glavu, a od druge polovice gornji ogrtač i rekla: ‘Allahov Poslaniče, ovo je Unejs, moj sin. Dovala sam ti ga da te služi. Uputi Allahu dovu za njega.’ Pa je učio: ‘Allahu, povećaj mu imetak i porod.’ Enes je rekao: ‘Tako mi Allaha, imam mnogo imetka, a moje djece i unučadi danas je oko stotinu.’” (Muslim)

On je jedan od ashaba koji su prenijeli mnogo hadisa od Poslanika, sallallahu alejhi ve sellem, poznatih kao *el-muksirun*. On je treći, nakon Ebu Hurejre i Ibn Omera, a prenio je 2.286 hadisa.

Preselio se iz Medine u Damask, a zatim u Basru, gdje je i umro. Posljednji je ashab koji je umro u Basri. Umro je 93. godine po Hidžri.



Značenje izrazā

Shvatili su da je malo ibadetio: zaključili su da je činio malo dobrovoljnog ibadeta.

Njemu su oprošteni i prošli i budući grijesi: to jest Poslanikovi, sallallahu alejhi ve sellem, grijesi. Učenjaci su jednoglasni u mišljenju da poslanici i vjerovjesnici ne mogu upasti u širk niti počiniti velike grijehe, a razilaze se u vezi s malim grijesima.

Ko izbjegava moj sunnet: ko se odvrati i okrene od mog sunneta.

Ne pripada mi: to jest nije musliman ako se od sunneta okreće mrzeći ga ili ne priznajući ga, a ako to čini iz nekog drugog razloga, onda se protivi lahkomi i umjerenom putu u vjeri koji sam donio.

U jednoj verziji stoji da je jedan od prisutnih kazao da neće konzumirati meso.

Opće značenje

Allahov Poslanik, sallallahu alejhi ve sellem, objasnio je u ovom hadisu da musliman mora biti umjeren u činjenju dobrih djela tako što će slijediti središnji put između pretjerivanja i podbacivanja. To se od muslimana traži u svim njegovim prilikama i stanjima. Svevišnji Allah objavio je: "...i oni koji, kad udjeljuju, ne rasipaju i ne škrtare, već se u tome drže sredine..." (El-Furkan, 67)

Umjerenost u ibadetu praksa je Allahova poslanika Muhammeda, sallallahu alejhi ve sellem. On je kazao: "Najdraže djelo Allahu jest ono na kojem čovjek ustraje, makar bilo i neznatno." (Buhari i Muslim)

Allahov Poslanik, sallallahu alejhi ve sellem, osudio je ove ljude zato što su navedenim djelima izašli izvan okvira vjerozakona i objasnio im je da je najbolji pravac u vjeri – pravac koji on slijedi, jer je on najznaniiji glede onog što Gospodar od nas traži u ibadetu, a ko izbjegava njegovu praksu i njegov sunnet, taj mu ne pripada.

Enes, radijallahu anhu, rekao je: "Jednom je Allahov Poslanik, sallallahu alejhi ve sellem, ušao u džamiju i vidio uže svezano između dva stuba. Upitao je: 'Šta je ovo?!' Rekli su: 'To je Zejnebino uže za klanjanje. Kada osjeti lijenost ili nemoć, uhvati se za njega.' Rekao je: 'Odvežite ga. Neka svako od vas klanja



koliko može, pa kada osjeti lijenost ili nemoć, neka sjedne.” U Zuhejrovoj predaji se navodi: “neka sjedne.” (Buhari i Muslim)

Aiša, Vjerovjesnikova, sallallahu alejhi ve sellem, supruga, rekla je: “Kad god je Allahov Poslanik, sallallahu alejhi ve sellem, imao priliku da bira između dvije mogućnosti, uvijek je birao lakšu, ukoliko nije bila grijeh. A ako bi se radilo o grijehu, bio je najdalje od toga.” (Buhari i Muslim)

Aiša, radijallahu anhu, također, kaže: “Allahov Poslanik, sallallahu alejhi ve sellem, noću bi u sobi prostirao hasuru da bi na njoj klanjao, a po danu bi prostirao hasuru da bi na njoj sjedio. Ljudi bi se noću sakupili i klanjali za Poslanikom, sallallahu alejhi ve sellem. Kada se njihov broj povećao, on im reče: ‘Ljudi, činite dobra djela koja ste u stanju činiti. Allahu neće dosaditi da vas nagrađuje sve dok vama ne dosadi činjenje dobrih djela.’” (Buhari i Muslim)

Od Abdullaha b. Amra b. Asa prenosi se da je rekao: “Allahov Poslanik, sallallahu alejhi ve sellem, obaviješten je da sam rekao: ‘Dok sam živ, cijelu ću noć klanjati, a danju postiti.’ On je na to rekao: ‘Jesi li ti to rekao?’ Odgovorio sam: ‘Da, Allahov Poslaniče, rekao sam to.’ Allahov Poslanik, sallallahu alejhi ve sellem, tada reče: ‘Ti to ne možeš. Nekad posti, a nekad nemoj, i spavaj i klanjaj noću, i od svakog mjeseca posti tri dana. Dobro djelo se nagrađuje deseterostruko, i to ti dođe kao da si sve vrijeme postio.’ Rekao sam: ‘Ja mogu i bolje od toga.’ On mi reče: ‘Dan posti, a dva nemoj postiti.’ Rekao sam: ‘Ja mogu i bolje od toga, Allahov Poslaniče.’ Rekao je: ‘Dan posti, a dan nemoj. To je Davudov post i to je najvredniji post.’ Rekao sam: ‘Ja mogu i bolje od toga.’ Tada je Allahov Poslanik, sallallahu alejhi ve sellem, rekao: ‘Nema bolje od toga.’ Abdullah b. Amr je rekao: ‘Da sam prihvatio da postim tri dana koja je spomenuo Allahov Poslanik, sallallahu alejhi ve sellem, bilo bi mi draže od moje porodice i moga imetka.’” (Muslim)

U tom smislu, sunnet je i odgoditi sehur i požurivati s iftarom da bi vrijeme posta bilo što kraće.

Uzvišeni Allah kaže: “U mjesecu ramazanu počelo je objavljivanje Kur’ana, koji je putokaz ljudima i jasan dokaz Pravoga puta i razlikovanja dobra od zla. Ko od vas u tom mjesecu bude kod kuće, neka ga u postu provede, a ko se razboli ili se na putu zadesi, neka isti broj dana naposti – Allah želi da vam olakša, a ne da poteškoće imate.” (El-Bekara, 185)



U suri El-Hadždž Svevišnji kaže: “I borite se, Allaha radi, onako kako se treba boriti! On vas je izabrao i u vjeri vam nije ništa teško propisao, u vjeri pretka vašeg Ibrahima.” (El-Hadždž, 78)

Ebu Hurejre, radijallahu anhu, prenosi da je Poslanik, sallallahu alejhi ve sellem, kazao: “Vjera je lahka. Neće niko početi pretjerivati u vjeri a da ga ona neće nadvladati. Stoga budite umjereni.” (Buhari)

Koristi u hadisu

Treba biti umjeren i u ibadetu i u svim drugim poslovima. Ako čovjek podbaci u činjenju dobrih djela, mimoići će ga mnogo dobro, a ukoliko bude pretjerivao, umorit će se i odstupiti od činjenja dobra.

Ovaj hadis pobija stav onih koji zabranjuju konzumiranje ukusne, halal hrane i oblačenje lijepe odjeće, a umjesto toga preporučuju konzumiranje neukusne i teške hrane te oblačenje grube odjeće od čiste vune ili nekog drugog materijala. Uzvišeni Allah je rekao: “Reci: ‘Ko je zabranio Allahove ukrase, koje je On za robove Svoje stvorio, i ukusna jela?’” (El-A‘raf, 32)

Najpreče je držati se sredine, pa ne pretjerivati u lijepim stvarima, utoliko prije jer to može odvesti u prekomjerno uživanje i oholost. S druge strane, ne treba se prekomjerno ni sustezati od lijepih stvari zato što to može odvesti u pokuđeno pretjerivanje u vjeri, koje je izvještačeno i vodi u izlazak izvan okvira sunneta, Poslanikove, sallallahu alejhi ve sellem, prakse.

Uzvišeni Allah kaže: “O sinovi Ademovi, kad god u džamiju pođete, odjeću pristojnu – ukras vaš nosite! I jedite i pijte, samo ne pretjerujte; On, zaista, ne voli one koji pretjeruju.” (El-A‘raf, 31)

Kad je riječ o vjerskim pitanjima i ibadetu, umanjivanje od Poslanikove, sallallahu alejhi ve sellem, prakse pogrdno je, kao što je i dodavanje na to pogrdno, i to su dvije krajnosti u vjeri. Pošto je ova skupina ljudi, kako smo spomenuli tokom citiranja predmetnog hadisa, htjela dodati na ibadet koji je Vjerovjesnik, sallallahu alejhi ve sellem, obavljao, on ih je od toga odvratio. Ako se onaj ko želi količinski povećati ono što je u vjeri u osnovi propisano ima odvratiti od te svoje nakane, u kakvom je onda položaju onaj ko u vjeru uvodi ibadete koji nisu utemeljeni ni Kur’anom ni Poslanikovim, sallallahu alejhi ve sellem, sunnetom!?



Kao primjer možemo navesti uvođenje raznih zikrova, namaza i vjerskih svečanosti koji nisu dio Poslanikove, sallallahu alejhi ve sellem, prakse. Vjerovjesnik, sallallahu alejhi ve sellem, rekao je: “Ko uvede u našu vjeru ono što nije od nje, to se odbacuje.” (Buhari i Muslim)

Iz ovog što smo naveli može se, opet, izvući sljedeća korist: vjera ne počiva na tome koliko će čovjek ibadeta činiti i u ibadetu pretjerivati, već na slijedenju Poslanikova, sallallahu alejhi ve sellem, sunneta bez podbacivanja i pretjerivanja, bez dodavanja i oduzimanja. Tako je, jer Poslanikova, sallallahu alejhi ve sellem, praksa počiva na ravnomjernosti, sredini i umjerenosti. Neslijedenje Poslanikove, sallallahu alejhi ve sellem, prakse vodi u zabludu i uvođenje novotarija.

O pretjerivanju u vjeri Allahov je Poslanik, sallallahu alejhi ve sellem, rekao: “Čuvajte se pretjerivanja u vjeri, jer su prijašnji narodi nastradali upravo zato što su pretjerivali u vjeri.” (Ahmed; s ispravnim lancem prenosilaca)

Abdullah b. Mesud, radijallahu anhu, kazuje: “Allahov Poslanik, sallallahu alejhi ve sellem, rekao je: ‘Nastradat će oni što pretjeruju’, ponavljajući te riječi tri puta.” (Muslim)

En-Nevevi u komentaru kaže: “Ovo se odnosi na one koji otežavaju ondje gdje otežavanju nije mjesto.”

Poslanikov, sallallahu alejhi ve sellem, sunnet je lađa spasa kojom ćemo se izbaviti i sigurno doploviti na kopno.

Ez-Zuhri je govorio: “Naši raniji učenjaci su govorili: ‘U pridržavanju sunneta je spas.’”

Imam Malik je kazao: “Sunnet je poput Nuhove lađe: ko se u nju ukrcao, spasio se, a ko je izostao, taj se utopio.”

Allahov Poslanik, sallallahu alejhi ve sellem, rekao je: “Primjer mene i onoga sa čime me je Allah poslao jest poput primjera čovjeka koji je došao jednom narodu i rekao mu: ‘Narode moj, svojim sam očima vidio (neprijateljsku) vojsku, ja sam samo obični opominjač! Spašavajte se!’, pa ga je jedna grupa iz njegovog naroda poslušala, te su se na vrijeme pokrenuli, otišli i tako se spasil. Druga grupa nije mu povjerovala, nego su ostali na istom mjestu, pa ih je ujutro napala vojska i potpuno ih uništila i istrijebila. Eto, to je primjer onoga ko se meni pokorava i slijedi ono sa čime sam došao, a to je primjer i onoga ko je meni neposlušan i poriče istinu s kojom sam došao.” (Buhari i Muslim)

TREĆI HADIS

Džabir, radijallahu anhu, prenosi da je neki čovjek upitao Allahova Poslanika, sallallahu alejhi ve sellem: “Šta misliš o tome, ako bih klanjao propisane namaze i postio ramazan i ono što je halal smatrao halalom i haram smatrao haramom i na to ništa ne budem dodavao, hoću li ući u džennet?” “Da”, odgovori mu Poslanik. Taj čovjek na to reče: “Tako mi Allaha, na ovo ništa neću dodati.” (Muslim)

Prenosilac hadisa

Džabir b. Abdullah b. Amr b. Haram. S Poslanikom je, sallallahu alejhi ve sellem, sudjelovao je u devetnaest bitaka i prenio je od njega 1.540 hadisa i svrstava se u *el-muksirun*, na šestom mjestu, nakon Ebu Hurejre, Ibn Omera, Enesa, Aiše i Ibn Abbasa.

Potkraj života imao je u Poslanikovo, sallallahu alejhi ve sellem, džamiji u Medini halku u kojoj je držao predavanja. Osljepio je prije smrti u Medini.

Džabir, radijallahu anhu, rekao je: “Allahov Poslanik, sallallahu alejhi ve sellem, nam je na Dan Hudejbije rekao: ‘Vi ste najbolji ljudi na Zemlji.’ A bilo nas je hiljadu i četiri stotine. Da nisam slijep, pokazao bih vam mjesto toga drveta.” (Buhari i Muslim)

Također se od Džabira, radijallahu anhu, prenosi da je rekao: “Moj otac je umro, a iza sebe je ostavio sedam (ili je kazao: devet kćeri). Oženio sam se udavanom ženom, a Allahov Poslanik, sallallahu alejhi ve sellem, me upita: ‘Jesi li se oženio, Džabire?’ ‘Jesam’ – odgovorih. ‘Djevicom ili udavanom?’ upita on. ‘Udavanom’ – odgovorih, a on na to reče: ‘Što se ne oženi djevicom, s kojom bi se zabavljao i koja bi se s tobom zabavljala i smijala?’ ‘Allahov Poslaniče’ – rekoh – ‘(moj otac) Abdullah je umro, a iza sebe je ostavio kćerke, bilo mi je neprijatno da im dovedem sličnu njima, pa sam se (oženio) ženom koja će se brinuti o njima i koja će ih savjetovati.’ On reče: ‘Neka te Allah blagoslovi’, ili je rekao: ‘Dobro.’”

Umro je 74. h. g., ili nekoliko godina poslije toga, a imao je 94 godine kada je preselio.



Značenje izrazā

Ako bih klanjao propisane namaze: to jest, ako bih klanjao pet namaza tokom dana i noći. Uzvišeni Allah je rekao: "...jer vjernicima je propisano u određeno vrijeme namaz obavljati" (En-Nisa, 103)

I ono što je halal smatrao halalom i haram smatrao haramom: pod ovom se konstrukcijom podrazumijeva izvršavanje vjerskih naredbi i sustezanje od vjerskih zabrana, o čemu će kasnije biti više riječi.

Opće značenje

Ovim hadisom Allahov Poslanik, sallallahu alejhi ve sellem, htio je ukazati na to da je dopustivo ograničiti se na izvršavanje vjerskih obaveza i općenito izostavljati dobrovoljna djela. Ipak, nema sumnje u to da propušta veliku dobit i golemo dobro onaj ko u potpunosti izostavlja sva dobrovoljna djela. Spomenuli smo u prvom hadisu, a koga prenosi Ebu Hurejre, radijallahu anhu, da je Poslanik, sallallahu alejhi ve sellem, rekao: "Moj rob Mi se neprestano približava nafilema sve dok ga ne zavolim."

Imam El-Kurtubi, Allah mu se smilovao, zapisao je: "Kad bi se stanovnici jednog grada dogovorili da izostavljaju nešto što je Allahov Poslanik, sallallahu alejhi ve sellem, prakticirao, protiv njih bi se povela borba i vodila sve dok se toj Poslanikovoј praksi ne bi vratili."

Ashabi, radijallahu anhum, i generacije koje su živjele poslije njih bili su istrajni i uporni u izvršavanju Poslanikovih, sallallahu alejhi ve sellem, sunneta i dobrovoljnih djela isto onoliko koliko su bili istrajni i uporni u izvršavanju farzova. Između sunnetā i farzova nisu pravili razliku: činili su oboje podjednako kako bi zaslužili sevap. Allahov poslanik Muhammed, sallallahu alejhi ve sellem, u navedenom hadisu nije stavio poseban akcenat na nafile iz razloga što je htio olakšati ovom čovjeku – koji je, vjerovatno, nedavno prije toga prihvatio islam, pa bi mu mnoštvo obaveza možda omrazilo vjeru i udaljilo ga od nje.

Koristi u hadisu

Ashabi, radijallahu anhum, bili su brižljivi glede vjere, pa su postavljali pitanja Resulullahu, sallallahu alejhi ve sellem, a njihov je krajnji cilj bio da



zasluže Allahovo zadovoljstvo i džennet, a nije im najveći cilj bio steći mnogo imetka, poroda i uživati na ovom svijetu.

Ukoliko se neki musliman ograniči na izvršavanje obaveznih namaza, ne može mu niko zbog toga prigovoriti i neće biti lišen ulaska u džennet, na temelju predmetnog hadisa: “Šta misliš o tome, ako bih klanjao propisane namaze...?”

U vjerodostojnom hadisu koji bilježi Ibn Hibban od Amra b. Murre el-Džuheniya stoji: “Allahov Poslaniče, šta misliš ako bih svjedočio da nema drugog boga osim Allaha i da si ti Allahov Poslanik, klanjao pet namaza, davao zekat, postio ramazan i klanjao noćni namaz u ramazanu, u čijem ću društvu biti?” “Sa iskrenima i šehidima”, odgovori Poslanik, sallallahu alejhi ve sellem. U predmetnom hadisu stoji: “Šta misliš o tome: ako bih klanjao propisane namaze i postio ramazan i ono što je halal smatrao halalom i haram smatrao haramom i na to ništa ne budem dodavao, hoću li ući u džennet?”

Dakle, postoji nekoliko razlika između dva hadisa: u jednom se navode šehadeti, zekat i noćni namaz u ramazanu, a u drugom halal i haram. Ove razlike, kao i ishodište hadisa, aludiraju na to da je riječ o dvije različite situacije i predaje.

Obavljanje namaza i post mjeseca ramazana imaju za rezultat ulazak u džennet. Preneseno je da je Poslanik, sallallahu alejhi ve sellem, rekao: “Onome ko isposti ramazan vjerujući i nadajući se nagradi bit će oprošteni raniji grijesi.” (Buhari i Muslim)

Allahov Poslanik, sallallahu alejhi ve sellem, rekao je: “Najbitnija stvar je islam, a namaz je njegov stub.” (Ahmed; sahih)

U jednom hadisu koji bilježi Ebu Davud (hasen) Poslanik, sallallahu alejhi ve sellem, kaže: “Obraduj one koji idu noću u džamije potpunim svjetlom na Sudnjem danu.”

U drugom hadisu koji bilježi Muslim, Poslanik, sallallahu alejhi ve sellem, obavještava nas da će namaz biti svjetlo vjernika na Sudnjem danu.

Od Ebu Umame, radijallahu anhu, prenosi se da je upitao Allahovog Poslanika, sallallahu alejhi ve sellem: “Allahov Poslaniče, ukaži mi na djelo zbog kojeg ću, ako ga budem činio, ući u džennet.” Poslanik, sallallahu alejhi ve sellem, odgovori mu: “Posti, uistinu je post najbolje djelo.” (Nesai; sahih)



U hadisi-kudsiju prenosi se da Uzvišeni Allah kaže: “Svako djelo koje učini Allahov rob biva dvostruko ili deseterostruko nagrađeno, pa i do sedam stotina puta.” Potom je Poslanik, sallallahu alejhi ve sellem, dodao da je Allah kazao: “Osim posta, on pripada Meni i Ja za njega nagrađujem. Moj rob ostavlja svoju hranu, piće i požude radi Mene. Postaču pripadaju dvije nagrade: jedna kada se iftari, a druga kada se vrati svome Gospodaru. Zadah iz usta postača ljepši je Allahu od mirisa mošusa.” (Buhari i Muslim)

Čovjek se ne treba sustezati od činjenja onog što je halal – dozvoljeno, na osnovu riječi: “...i ono što je halal smatrao halalom...” Pogrdno je, a nije pohvalno, da se čovjek bez šerijatom valjanog opravdanja susteže od onog što je dozvoljeno.

Tumačeći predmetni hadis, imam En-Nevevi, Allah mu se smilovao, kazao je: “Riječi ‘...i haram smatrao haramom...’ označavaju sustezanje od harama, a riječi ‘...i ono što je halal smatrao halalom...’ označavaju činjenje halala vjerujući da je dozvoljeno.”

Ove riječi protumačene su i tako da se odnose na vjerovanje da je haram zabranjeno činiti, odnosno da je halal dozvoljeno činiti, jer onaj ko u to ne vjeruje, takav ne vjeruje u vjersku istinu.

Onaj ko se susteže od harama zato što ga je zabranjeno činiti i iz strahopostovanja od Uzvišenog Allaha čini time dobro djelo. Premda i samo sustezanje od harama donosi dobro, veće je dobro u tome da čovjek usto i vjeruje da je haram zabranjeno činiti i da se susteže od njegova činjenja iz tog razloga i iz straha od Gospodara. Kao primjer za to možemo navesti čovjeka koji se susteže od konzumiranja opojnih pića ili svinjskog mesa – ne zato što je to haram, već zato što njegovu tijelu to ne godi niti ima potrebe za tim. On nema grijeha jer nije učinio nijedan od navedenih harama. Ali, onaj ko se od navedenih harama susteže Allaha radi i vjerujući u to da su to zabranjena djela, takav će za svoje odricanje imati nagradu.

ČETVRTI HADIS

Enes b. Malik, radijallahu anhu, veli: "Allahov Poslanik, sallallahu alejhi ve sellem, rekao je: 'Džennet je prekriven neprijatnostima, a Vatra je prekrivena strastima.'" (Buhari i Muslim)

Prenosilac

O prenosiocu ovog hadisa bilo je riječi.

Značenje izrazā

neprijatnostima: to jest onim što je čovjeku mrsko i teško – izvršavanjem ibadeta na propisan način, kao što je, naprimjer, potpuno uzimanje abdesta na hladnoći, strpljivo podnošenje iskušenja i tome slično.

a Vatra je prekrivena strastima: slastima i užicima u kojima čovjek, prema šerijatu, ne smije uživati, koji ga mogu odvratiti od izvršavanja islamskih obaveza, odnosno navratiti na činjenje vjerskih zabrana.

Opće značenje

Ovaj hadis pokazatelj je jezgrovitosti u izražavanju, koja je data Allahovu Poslaniku, sallallahu alejhi ve sellem. Tumačeći predmetni hadis, Ibn Hadžer, Allah mu se smilovao, zapisao je: "Ovo je primjer obuhvatnog izražavanja i predivne stilistike koji su dati Poslaniku, sallallahu alejhi ve sellem. On je ovim riječima pogrdio udovoljavanje strastima, premda im teži ljudska duša, odnosno pohvalio je i potaknuo na činjenje dobrih djela, iako je to duši mrsko i teško."

Imenica *neprijatnosti* proteže se na ulaganje napora u izvršavanje ibadeta, ustrajnost u činjenju dobrih djela, strpljivo podnošenje poteškoće u ibadetu, suzbijanje srdžbe, opraštanje, blagost, udjeljivanje milostinje, uzvrćanje dobrim na zlo, strpljivo sustezanje od udovoljavanja strastima i na sve što je tome slično.

Od Aiše, radijallahu anha, prenosi se da je Poslanik, sallallahu alejhi ve sellem, rekao: "Onaj koji uči Kuran bez poteškoća bit će u društvu plemenitih i čestitih meleka. A onaj koji ga uči s poteškoćom imat će dvostruku nagradu." (Buhari i Muslim)



Od Fedale b. Ubejda, radijallahu anhu, prenosi se da je Poslanik, sallallahu alejhi ve sellem, rekao: “Borcem (mudžahidom) na Allahovom putu smatra se i osoba koja se bori da savlada svoje prohtjeve i strasti u pokornosti Allahu.” (Tirmizi; sahih)

Od Abdullaha b. Amra, radijallahu anhu, prenosi se da je Allahov Poslanik, sallallahu alejhi ve sellem, kazao: “Dvije vrline neće redovno prakticirati ni jedan musliman a da neće ući u džennet. One su lahke, ali malo je onih koji ih prakticiraju. Izgovaranje po deset puta iza svakog namaza *subhanallah*, *elhamdulillah* i *Allahu ekber* i, kad legneš spavati, da izgovoriš: ‘Subhanallah, elhamdulillah i Allahu ekber’ (sveukupno) stotinu puta.” (Tirmizi i Nesai; sahih)

Riječ *strasti* odnosi se na strasti kojima je zabranjeno udovoljavati, kao što su, naprimjer, konzumiranje opojnih pića, činjenje bluda, gledanje u žene koje nisu najbliža rodbina, ogovaranje, zabava koja sadrži nešto što je zabranjeno i tome slično.

Od Ebu Hurejre, radijallahu anhu, prenosi se da je Vjerovjesnik, sallallahu alejhi ve sellem, kazao: “Sedam vrsta ljudi će Allah na Sudnjem danu staviti u Svoj hlad, kada drugog hlada neće biti: pravednog vođu, mladića koji je mladost proveo u pokornosti svome Gospodaru, čovjeka čije je srce bilo vezano za džamiju, dvije osobe koje su se voljele (isključivo) u ime Allaha, radi Njega se družile i radi Njega se razišle, čovjeka koga pozove ugledna i lijepa žena (na blud), a on joj kaže: ‘Ja se bojim Svevišnjeg Allaha!’, čovjeka koji tajno dijeli sadaku tako da mu lijeva ruka ne zna šta dijeli desna, i čovjeka koji se u samoći sjeti Allaha i zaplače.” (Buhari)

Udovoljavanje onom za čim duša žudi, a što je u načelu dozvoljeno, ne potpada pod hadis, ali, ipak, pokuđeno je u tome pretjerivati, jer postoji bojazan da bi to moglo čovjeka odvratiti od činjenja dobrih djela ili ga odvesti u haram.

Koristi u hadisu

Džennet se može zaslužiti jedino strpljivim podnošenjem neprijatnosti, a od Vatre se može sačuvati samo potpunim odvrćanjem od udovoljavanja zabranjenim strastima.

Put do dženneta je neravan, teško prohodan. Dovoljno je to što ga je Poslanik, sallallahu alejhi ve sellem, okarakterizirao rekavši: “Džennet je prekriven



neprijatnostima...” Sve te neprijatnosti i poteškoće olakšavaju čovjeku da shvati da nakon njih dolazi džennet.

U ovom hadisu naznaka je da se posljedice uzimaju u obzir. Nije teško podnijeti umor nakon kojeg slijedi ugodnost. Pronicljiv je onaj ko na umu ima kraj i završetak, a ne sadašnje vrijeme. Mudraci su govorili: “Udobnost se ne može udobnošću postići.”

Treba znati da će daija, pozivatelj u vjeru, biti izložen neprijatnostima i uznemiravanju te da put istine nije posut cvijećem, već je onako kako je rekao Poslanik, sallallahu alejhi ve sellem, kad je kazao: “Džennet je prekriven neprijatnostima, a Vatra je prekrivena strastima.”

Džennet i džehennem već su stvoreni i postoje, i nikad neće prestati postojati. To je stav pripadnikā ehli-sunneta, za razliku od nekih zalutalih grupacija koje smatraju da će džennet i džehennem biti stvoreni u vrijeme Kijametskog dana.

Na ovu konstataciju ukazuju uzvišeni kur’anski ajeti i Poslanikovi, sallallahu alejhi ve sellem, hadisi, od kojih su:

Ajeti:

“...i nastojte zaslužiti oprost Gospodara svog i džennet prostran kao nebesa i Zemlja, pripremljen za one koji se Allaha boje...” (Alu Imran, 133)

“...onda se čuvajte vatre za nevjernike pripremljene, čije će gorivo biti ljudi i kamenje.” (El-Bekara, 24)

Hadisi:

Enes, radijallahu anhu, prenosi hadis u kojem Poslanik, sallallahu alejhi ve sellem, govori o Israu, a u kojem je, između ostalog, kazao: “Zatim me Džibril poveo. Išli smo dok nismo stigli do Sidretul-muntehaa, koji su prekrile meni neznane boje. Zatim sam stupio u džennet, kad, gle, u njemu kupole od bisera, a zemlja od mošusa.” (Buhari i Muslim)

Abdullah b. Omer, radijallahu anhu, prenio je Poslanikove, sallallahu alejhi ve sellem, riječi: “Svakom od vas, kad umre, njegovo mjesto izlaže se svakog jutra i svake večeri, pa ako je dženetlija, tad mu se predočava njegovo mjesto među dženetlijama, a ako je džehenemlija, predočava mu se mjesto među stanovnicima džehennema i kaže se: ‘Ovo je mjesto koje te čeka nakon što te Allah oživi na Sudnjem danu!’” (Buhari i Muslim)



Ibn Abbas, koji veli da se za vrijeme Allahova Poslanika, sallallahu alejhi ve sellem, dogodilo pomračenje Sunca i da je Poslanik, sallallahu alejhi ve sellem, kazao: “Vidio sam džennet i htio sam dohvatiti jedan grozd, a da sam ga uzeo, vi biste ga jeli dok postoji ovog svijeta. Prikazan mi je bio i džehennem, i strašniji prizor do danas nisam nikad vidio.” (Buhari i Muslim)

PETI HADIS

Džabir, radijallahu anhu, kazuje: “Poslanik, sallallahu alejhi ve sellem, rekao je: ‘Primjer mene i vas jest kao primjer čovjeka koji zapali vatru, pa skakavci i leptiri počnu padati u nju, a on ih od nje odvraća. Eto, ja vas držim za pojaseve da ne padnete u vatru, a vi mi izmičete iz ruku.’” (Muslim)

Prenosilac hadisa

O prenosiocu ovog hadisa bilo je riječi.

Značenje izrazā

za pojaseve: za mjesto na kojem se veže donji haljetak. Ovim se simbolično želi ukazati na to s koliko je žara Allahov Poslanik, sallallahu alejhi ve sellem, svoje sljedbenike odvraćao od činjenja grijeha, koji vode u džehennemsku vatru.

vi mi izmičete: bežite od mene nasilu, ne želite da vas spasim.

Opće značenje

Izričući ovaj hadis, Allahov Poslanik, sallallahu alejhi ve sellem, htio je ovim primjerom ukazati na svoj odnos prema pripadnicima ummeta, te da sliči čovjeku koji na otvorenom prostoru zapali vatru, pa skakavci i leptiri u nju padaju – leptire, skakavce i sitne kukce privlači vatra koja se zapali na otvorenom prostoru, jer ih privlači svjetlost, a čovjek ih tjera da ne padnu u plamen, no oni su uporni u tome da dopru do plamena. Eto tako i Allahov Poslanik, sallallahu alejhi ve sellem, svoje sljedbenike s velikom željom odvraća od slijedenja strasti, činjenja grijehā i kršenja vjerskih zabrana, a oni Poslaniku, sallallahu alejhi ve sellem, izmiču iz ruku i upadaju u grijeh.

Koristi u hadisu

Allahov Poslanik, sallallahu alejhi ve sellem, naveo je ovaj primjer svojim sljedbenicima kako bi u njima probudio oprez i strah spram kršenja Allahovih



zabrana i činjenja grijehā. A naveo je primjer koji je blizak njihovu shvatanju, to jest primjer onog što jasno vide na ovom svijetu, da bi to što bolje shvatili i da bi što lakše pouku izvukli. Naime, Poslanik, sallallahu alejhi ve sellem, uporedio je slijedenje strasti – što vodi u paklenu vatru – s padanjem leptirā u plamen vatre, tim prije jer leptire privlači svjetlost.

Isto tako, onog ko slijedi strasti to vodi u kaznu. Poslanik, sallallahu alejhi ve sellem, u ovom je primjeru nesmotrenost onog koji slijedi strasti uporedio s nesmotrenošću leptirā – ne znaju da će ih vatra spaliti, pa padaju u nju.

Ovdje se ističe golema Poslanikova, sallallahu alejhi ve sellem, briga za svoje sljedbenike, kao i to da nije žalio uložiti trud kako bi pripadnike svog ummeta odvratio od svega onog što im donosi štetu u pogledu vjere i ovozemaljskih dobara.

Ovaj hadis na sadržajan način pokazuje da je čovjeku potrebniji onaj ko će ga upozoriti nego onaj ko će mu donositi radosne vijesti.

Čovjek po svojoj prirodi više teži udjelu na ovom svijetu, na kojem se trenutno nalazi, a ne udjelu na ahiretu, budućem svijetu, baš kao što Uzvišeni Allah kaže: “Uistinu, vi ovaj prolazni svijet volite, a o onom drugom brigu ne vodite” (El-Kijama, 20–21), pa je stoga sklon činiti različite prijestupe i prekršaje da bi se domogao ovosvjetske koristi.

Najprije je potrebno iz srca istrgnuti pretjeranu ljubav prema ovom svijetu da bismo se mogli posvetiti svemu onom što nas približava Uzvišenom Allahu. Otud i izreka u kojoj se kaže da se čovjek lijepim osobinama kiti tek nakon što se oslobodi ružnih osobina ili da mirisanje odjeće biva nakon njenog pranja.

Predmetnim hadisom jasno se ističu Poslanikova, sallallahu alejhi ve sellem, samilost i sažaljivost spram svojih sljedbenika, kao i velika želja da se spase.

Evo o tome Allahovih riječi:

“Došao vam je Poslanik, jedan od vas, teško mu je što ćete na muke udariti, jedva čeka da Pravim putem pođete, a prema vjernicima je blag i milostiv.” (Et-Tevba, 128)

“Ma koliko ti želio da im uputa bude data, Allah, zaista, neće uputiti nikoga koga u zabludu okrene i njima niko neće pomoći.” (En-Nahl, 37)

“I ne žalosti se za njima, i neka ti nije teško zbog spletkarenja njihova.” (En-Nahl, 127)



“Pa zar ćeš ti za njima od tuge svisnuti, ako oni u ovaj govor neće da poveruju?!” (El-Kehf, 6)

“A to što ti objavljuje Gospodar tvoj pojačat će, uistinu, kod mnogih od njih nepokornost i nevjerovanje, ali ti ne izgaraj zbog naroda koji neće da vjeruje.” (El-Maida, 68)

Od Ibn Abbasa, radijallahu anhu, prenosi se da je kazao: “Kada je objavljen ajet: ‘I opominji rodbinu svoju najbližu...’ Poslanik, sallallahu alejhi ve sellem, popeo se na Safu i počeo dozivati: ‘Potomci Fihra! Potomci Adijja!’ To su bili pripadnici plemena Kurejš. Dozivao ih je sve dok se svi nisu skupili. Onaj ko nije mogao doći poslao je predstavnika da vidi o čemu je riječ. Došli su i Ebu Leheb i Kurejšije. On je rekao: ‘Šta ako bih rekao da se u ovoj dolini nalazi konjica koja vas želi napasti, da li biste mi vjerovali?’ ‘Bismo’ – odgovorili su oni – ‘jer te znamo kao čovjeka koji govori samo istinu.’ On reče: ‘Ja vas opominjem, pred vama je strašna kazna.’ Čuvši to, Ebu Leheb uzviknu: ‘Teško tebi u ostatku dana, zar si nas zbog toga skupio!?’ Pa je objavljeno: ‘Neka propadne Ebu Leheb, i propao je! Neće mu biti od koristi blago njegovo, a ni ono što je stekao...’” (Buhari)

U jednoj verziji kod Buharije stoji: “Kurejšije, iskúpite se jer vam ja, kod Allaha, neću nimalo moći pomoći! Potomci Abdulmenafovi, ja vam kod Allaha neću nimalo moći pomoći! Abbase, sine Abdulmuttalibov, ja ti kod Allaha neću moći nimalo pomoći! Safija, tetko Allahovog Poslanika, sallallahu alejhi ve sellem, po ocu, ja ti kod Allaha neću moći nimalo pomoći! Fatima, kćerko Muhammedova, traži od mene šta želiš od imetka, ali ti ja kod Allaha neću moći nimalo pomoći!”

Prisjetimo se nastojanja Poslanika, sallallahu alejhi ve sellem, da uputi svoga amidžu Ebu Taliba.

Abdullah b. Amr b. el-As je rekao: “Poslanik, sallallahu alejhi ve sellem, proučio je ajet koji govori o Ibrahimu: ‘Oni su, Gospodaru moj, mnoge ljude na stranputicu naveli. Onaj ko bude mene slijedio – moje je vjere, a onaj ko bude protiv mene ustajao – pa Ti, uistinu, praštaš i samilostan si.’ (Ibrahim, 36) A Isa, alejhi selam, rekao je: ‘Ako ih kazniš, robovi su Tvoji, a ako im oprostiš, silan i mudar Ti si.’ (El-Maide, 118) Tada je podigao ruke i rekao: ‘Allahu moj, moj ummet, moj ummet’ – i zaplakao je. Allah je rekao: ‘Džibrile, otiđi kod Muhammeda, a tvoj Gospodar najbolje zna, i upitaj zašto je zaplakao?’ Došao



mu je Džibril i upitao ga, pa mu je Poslanik, sallallahu alejhi ve sellem, odgovorio šta ga je uplakalo. Džibril je obavijestio Allaha o tome, a On to najbolje zna. Zatim je Uzvišeni rekao: 'Džibrile, otiđi kod Muhammeda i reci: 'Mi ćemo te učiniti zadovoljnim u pogledu tvoga ummeta i nećemo te ožalostiti.''' (Muslim)

Od Ibn Abbasa, radijallahu anhu, prenosi se da je kazao: "Jednog dana bijah iza Poslanika, sallallahu alejhi ve sellem, a on reče: 'Dječace, naučit ću te neke riječi: pazi na Allaha (na Njegove naredbe i zabrane), On će paziti na tebe; čuvaj Allaha, naći ćeš Ga na svojoj strani! Kada nešto moliš, moli Allaha. I kad tražiš kakvu pomoć, traži je od Allaha. I znaj da se stvorenja sakupe da ti kakvu korist pruže, pružit će ti samo ono što ti je Allah već propisao. I da se skupe da ti kakvu štetu nanesu, samo ti mogu nanijeti štetu koju ti je Allah već propisao! Pera su podignuta, a stranice osušene!'" (Tirmizi i Ahmed; sahih)

Enes, radijallahu anhu, kazao je: "Poslaniku, sallallahu alejhi ve sellem, bi rečeno: 'Otiđi kod Abdullaha b. Ubejja!' On uzjaha magarca i pođe prema njemu. Sa njim je pošlo i nekoliko ashaba. Kada je došao kod njega, Abdullah b. Ubejj mu reče: 'Idi od mene, uznemirava me smrad tvoga magarca!' Tada jedan ensarija reče: 'Tako mi Allaha, magarac Allahovog Poslanika, sallallahu alejhi ve sellem, ima prijatniji miris nego ti!'" (Buhari)

Usama b. Zejd obavijestio nas je sljedeće: "Poslanik, sallallahu alejhi ve sellem, uzjahao je magarca na kome je bilo sedlo prekriveno kadifom, a iza sebe stavio Usamu kako bi obišli Sada b. Ubadu prije Bitke na Bedru. Prošao je pored skupine u kojoj je bio i Abdullah b. Ubejj b. Selul – bilo je to prije nego što je prihvatio islam, iako ga nikada i nije istinski prihvatio. U toj skupini bilo je i muslimana i mnogobožaca i jevreja. Među njima je bio i Abdullah b. Revaha. Prašina koju je životinja digla obavila je prisutne, pa je Abdullah b. Ubejj prekrio nos košuljom i rekao: 'Ne dižite prašinu na nas!' Poslanik, sallallahu alejhi ve sellem, nazvao je selam, zaustavio se, sjahao i pozvao ih u islam, proučivši im nešto iz Kur'ana. Abdullah b. Ubejj mu reče: 'Čovječe, nije dobro to što govoriš. Iako je istina, nemoj nas uznemiravati dok sijelimo, idi na svojoj jahalici i to pričaj onome ko ti dođe.'" (Buhari)

Ebu Hurejre, radijallahu anhu, kazao je: "Dok smo jednom prilikom bili u džamiji, pred nas izađe Allahov Poslanik, sallallahu alejhi ve sellem, i reče: 'Pođite sa mnom jevrejima.' Izašli smo sa njim i kad smo stigli do kuće El-Midrassa, Allahov Poslanik, sallallahu alejhi ve sellem, stade i počeo da ih doziva:



‘Skupino jevreja, primite islam, bit ćete spašeni!’ ‘Dostavio si, Ebu Kasime’ – rekoše oni. ‘To želim. Primite islam, bit ćete spašeni!’ – ponovo će Allahov Poslanik, sallallahu alejhi ve sellem. ‘Dostavio si, Ebu Kasime!’ – rekoše oni. Allahov Poslanik, sallallahu alejhi ve sellem, im reče: ‘To želim.’” (Buhari)

Enes, radijallahu anhu, prenosi: “Jedan jevrejski dječak služio je Poslanika, sallallahu alejhi ve sellem. Potom se razbolio i Poslanik, sallallahu alejhi ve sellem, otišao je da ga obide. Sjeo mu je pored glave i rekao mu: ‘Prihvati islam.’ Dječak pogleda u svoga oca koji tu bijaše, a on mu reče: ‘Poslušaj Ebul-Kasima.’ Dječak prihvati islam, a Poslanik, sallallahu alejhi ve sellem, izađe govoreći: ‘Hvala Allahu, Koji ga je spasio džehennema.’”

Pitala je Aiša, radijallahu anha, svoga supruga, sallallahu alejhi ve sellem: “Jesi li imao teži dan od dana Bitke na Uhudu?” On reče: “Svašta sam doživio od tvog naroda, a najteže mi je bilo ono što sam doživio na Akabi kada sam se obratio Ibn Abdu Jalilu b. Abdu Kulalu i kad je odbio prihvatiti ono čemu sam ga pozvao. Otišao sam od njega veoma potišten i nisam mogao doći sebi sve dok nisam stigao u mjesto Karni Sealib. Tada sam podigao glavu i vidio kako mi oblak pravi hlad. Pogledao sam bolje i u njemu ugledao Džibrila, koji me je dozivao. Rekao je: ‘Allah je čuo ono što ti je tvoj narod rekao i (vidio) način na koji su te odbili. Poslao ti je meleka (zaduženog za brda) da mu narediš šta god hoćeš u vezi s njima.’ Tada me je pozvao taj melek, nazvao mi selam i rekao: ‘Muhammede, to je tako. Ukoliko to želiš, na njih ću sručiti dva brijega.’ ‘Ne, ne želim to’ – reče Poslanik, sallallahu alejhi ve sellem – ‘Ja želim da Allah iz njihovih kičmi izvede potomstvo koje će samo Allahu robovati i ništa Mu ravnim neće smatrati.’” (Buhari i Muslim)

Enes prenosi da je Allahov Poslanik, sallallahu alejhi ve sellem, pisao Kisri, Kajsaru i Nedžašiji, vladarima, kao i svim ostalim silnicima pozivajući ih da vjeruju u Allaha. Međutim, abesinski vladar, kojem je tom prilikom pisao, nije onaj kojem je klanjao dženzu kad je umro. (Muslim)

ŠESTI HADIS

Enes b. Malik, radijallahu anhu, prenosi da je Poslanik, sallallahu alejhi ve sellem, rekao: "Ljudima će doći vrijeme kad će onaj ko bude ustrajavao u vjeri biti poput onoga koji drži žeravicu u ruci." (Tirmizi; Albani ga je uvrstio u autentična predanja)

Poslanik, sallallahu alejhi ve sellem, rekao je: "Pred vama su dani u kojima će biti potrebno veliko strpljenje. Onaj ko tad bude slijedio ono što vi slijedite danas imat će nagradu kao pedeset ljudi među vama." Ashabi su upitali: "Pedeset ljudi među njima!?" "Ne, nego među vama", kaza Poslanik, sallallahu alejhi ve sellem. (Taberani; Albani ga je uvrstio u ispravna predanja)

Prenosilac hadisa

O prenosiocu ovog hadisa bilo je riječi.

Značenje izrazā

Imam Burhanuddin el-Dža'beri kaže: "To će biti vrijeme u kojem će biti potrebno mnogo ustrajnosti i strpljivosti, jer će dobro biti smatrano zlom, a zlo smatrano dobrim, ljudi će imati pokvarene namjere, pojavit će se mnoga vjerolomstva, onaj ko bude govorio istinu bit će uznemiravan, a onaj ko bude govorio laž bit će uvažen."

poput onoga koji drži: bit će kao onaj ko strpljivo drži žeravicu i podnosi krajnju bol.

kao pedeset ljudi među vama: šejhul-islam Ibn Tejmije, Allah mu se smilovao, zapisao je: "Moguće je da potonji za dobra djela zasluže toliko sevapa koliko bi zaslužio pedeset ljudi među ashabima da ista ta dobra djela učine u to vrijeme. Razlog je to što su ashabi nalazili pomagače u činjenju dobra, a ovi potonji neće nalaziti onog ko bi im u tome pomogao."

Hafiz Ibn Hadžer, Allah mu se smilovao, rekao je: "Poslanikove riječi: 'Onaj ko tad bude slijedio ono što vi slijedite danas imat će nagradu kao pedeset



ljudi među vama' ne ukazuju na to da je bilo ko bolji od ashabā, radijallahu anhum, zato što činjenica o povećanju nagrade ne znači nužno i utvrđivanje prednosti u samim odlikama i vrlinama. Viđenje Poslanika, sallallahu alejhi ve sellem, odlika je i djelo koje se ne može nadomjestiti niti zaslužiti nekom drugom odlikom ili djelom. Dakle, jedan pogled u lice Poslanika, sallallahu alejhi ve sellem, ne može se dostići nikakvim djelima, to je Allahova blagodät koju On daje kome hoće."

Opće značenje

Ovim hadisom Allahov Poslanik, sallallahu alejhi ve sellem, htio je ukazati na zamašnost smutnji koje će biti pred Smak svijeta, kao što je htio ukazati na sljedeće: kao što čovjek nije kadar držati žeravicu u ruci jer progori ruku, isto tako onaj ko bude odan islamu neće moći ostati ustrajan u vjeri zbog mnoštva grešnika i grijeha, rasprostranjenosti smutnji, iskušenja i slabosti imana. Zapravo, moći će, ali uz veliko strpljenje i odlučnost.

Ebu Feredž ibn Redžeb, Allah mu se smilovao, kazao je: "...iz tog su razloga izrečeni brojni hadisi u kojima se hvale oni koji će biti privrženi islamu pred kraj vremena. Naime, rečeno je da će oni biti poput ljudi koji drže žeravicu u ruci, i da će jedan trudbenik za dobro djelo biti nagrađen kao pedeset trudbenika iz prijašnjih generacija. Tako je zato što oni neće nalaziti pomagače u dobru."

Koristi u hadisu

U predmetnom hadisu ljudi se upućuju na to da se pripreme za teška vremena koja će neizostavno doći te da će onaj ko premosti sve prepreke i ostane ustrajan u ispoljavanju vjere i vjerovanju imati kod Allaha visoke stepene i da će ga Gospodar pomoći u činjenju onog što On voli i čime je zadovoljan. Zaista, Allah daje pomoć srazmjerno poteškoći.

U ovom hadisu sadržano je poređenje onog što se može dokučiti razumom i što nije materijalno s nečim što je osjetilno i materijalno, tj. usporedba istrajnosti u vjeri s držanjem žeravice u ruci. U djelu *Fejdul-Kadir* autora El-Munavija nalazimo sljedeći zapis: "Allahov Poslanik, sallallahu alejhi ve sellem, uporedio je ono što se razumom može dokučiti s nečim što je osjetilno i opipljivo. Drugim riječima kazano, onaj ko ustrajno primjenjuje propise utemeljene na Kur'anikerimu i hadisu trpi nelagodu i podnosi bol zbog napada i uznemiravanja



onih što slijede različite inovacije i zabludu, kao što trpi nelagodu i podnosi bol onaj ko uzme žeravicu i stišće je u ruci, pa i više od toga. Ove Poslanikove riječi jesu jedno od njegovih nadnaravnih djela (a koje ukazuju na istinitost njegovog poslanstva); u njima je sadržana obavijest da će se to i to dogoditi u budućnosti – i već se dogodilo”, a događat će se i dalje do Sudnjeg dana.

Govoreći o osobinama vjernika koji će živjeti pred Smak svijeta, a koje je pohvalio Poslanik, sallallahu alejhi ve sellem, Ibn Kajjim el-Dževzijje, Allah mu se smilovao, u *Medaridžus-salikin*u zapisao je: “Okićeni su sljedećim osobinama: dosljedno slijede sunnet, i onda kad ljudi od sunneta odstupaju; sustežu se od onog što ljudi uvedu, makar ljudi to što uvedu smatrali lijepim; dosljedno ispovijedaju Allahovu jednoću, makar to većina ljudi osuđivala; ne pripisuju se nikom osim Kur'anu i sunnetu – ni šejhu, ni tarikatu, ni pravcu, ni skupini. Oni se pripisuju Allahu Uzvišenom u smislu da samo Njemu robuju, i poslaniku Muhammedu, sallallahu alejhi ve sellem, slijedeći ono sa čime je došao. Takvi su uistinu onī koji drže žeravicu u ruci. Većina ljudi, štaviše, svi ljudi kore ih. Zato što su usamljeni i jedinstveni među ljudima, ljudi ih ubrajaju u one koji su zastranili, one koji su nešto novo donijeli, u one koji se razlikuju od većine muslimana.” Vidimo da se historija napada i etiketiranja vjernika prenosi sa generacije na generaciju, iste osude danas kao i jučer.

Enes, radijallahu anhu, prenosi da je Allahov Poslanik, sallallahu alejhi ve sellem, rekao: “Moj ummet je poput kiše; ne zna se da li je bolji njen početak ili kraj.” (Tirmizi; hasen)

Primarna zadaća ove skupine jeste briga o vjeri i ahiretu, za razliku od onih koji budu živjeli u njihovo vrijeme i osnovna im briga bude dunjaluk. Bilježe Taberani i Hakim od Ibn Mesuda da je Poslanik, sallallahu alejhi ve sellem, kazao: “Bit će ljudi pred kraj dunjaluka, sjedit će u džamijama u halkama. Njih spaja i predvodi dunjaluk. Ne sjedite s njima, takvi nemaju mjesto kod Allaha.” (Neki su učenjaci prihvatili ovaj hadis, a drugi su ga odbacili)

Ebu Hurejre, radijallahu anhu, prenosi da je Poslanik, sallallahu alejhi ve sellem, rekao: “Doći će vrijeme kada čovjek neće mariti je li imovinu stekao na dozvoljen ili na nedozvoljen način.” (Buhari) Dakle, neće mariti da li je riječ o haram ili halal zaradi, a što ukazuje na odanost dunjaluku i da cilj opravdava sredstvo.



Džabir b. Abdullah prenosi da je Allahov Poslanik, sallallahu alejhi ve sellem, rekao: “Pred kraj moga ummeta bit će jedan vladar koji će imetak dijeliti pregrštima, neće ga brojati.” (Muslim)

Nevvas b. Sem'an prenosi u podužem hadisu u kojem se kazuje o Dedžalu i Isau, alejhi selam, da je Poslanik, sallallahu alejhi ve sellem, između ostalog, kazao: “...Zatim će Allah reći Zemlji: ‘Pusti svoje plodove i povrati svoj bereket!’ Tada će grupa ljudi jesti jedan nar i hladovati unutar njegove kore. Bit će podaren bereket u mlijeku, tako da će jedna muzna deva biti dovoljna jednoj velikoj skupini ljudi, muzna krava bit će dovoljna jednom plemenu, a jedna muzna ovca bit će dovoljna jednoj porodici. Dok oni budu tako u izobilju živjeli, Allah će poslati prijatan vjetar koji će im zapuhati ispod pazuha i uzet će dušu svakom vjerniku i svakom muslimanu. Poslije će ostati najgori ljudi, koji će javno spolno općiti kao magarci i oni će dočekati Smak svijeta.” (Muslim)

Ebu Hurejre prenosi da je Allahov Poslanik, sallallahu alejhi ve sellem, rekao: “Zemlja će izbaciti riznice svoje kao ogromne stubove od zlata i srebra. Tada će ubica doći i reći: ‘Zar sam zbog ovoga ubijao?!’ Doći će onaj koji je prekidao rodbinske veze i reći: ‘Zar sam zbog ovoga prekidao rodbinske veze?!’ Doći će kradljivac i reći: ‘Zar mi je zbog ovoga odsječena ruka?’ Na kraju, sve zlato i srebro će ostaviti i ništa od njega neće uzeti.” (Muslim)

Ebu Hurejre, radijallahu anhu, prenosi da je Poslanik, sallallahu alejhi ve sellem, rekao: “Smak svijeta neće nastupiti sve dok se među vama ne uveća kapital do te mjere da ćete se zabrinuti kome dati svoju milostinju i dok ne budete u situaciji da je nekom ponudite a taj da kaže: ‘Ne treba mi.’” (Buhari)

Ebu Musa, radijallahu anhu, prenosi da je Poslanik, sallallahu alejhi ve sellem, kazao: “Doći će vrijeme kada će čovjek nositi svoju milostinju (zekat) u zlatu, ali neće naći nikoga kome bi je dao.” (Buhari i Muslim)

SEDMI HADIS

Ebu Hurejre, radijallahu anhu, prenosi da je Poslanik, sallallahu alejhi ve sellem, rekao: “Pet obaveznih namaza, džuma do džume i ramazan do ramazana brišu grijehе učinjene između njih, ako se budu izbjegavali veliki grijesi.” (Muslim)

Prenosilac hadisa

O prenosiocu ovog hadisa bilo je riječi u prvom hadisu.

Značenje izrazā

džuma do džume i ramazan do ramazana: ovdje se podrazumijeva izostavljena genitivna veza, to jest džuma-namaz do džuma-namaza i post ramazana do posta ramazana.

veliki grijesi: imam El-Munavi zapisao je: “...pod ovom sintagmom podrazumijeva se svaki grijeh koji je golem i težak. O definiciji velikog grijeha postoji razilaženje među islamskim učenjacima, a najbliža definicija istini jest da je veliki grijeh svaki onaj grijeh za koji je Zakonodavac predvidio preciziranu kaznu i jasno zaprijetio onima koji ga čine.” Također, u velike grijehе spada svaki grijeh čijeg je počinioca prokleo Allahov Poslanik, sallallahu alejhi ve sellem. Veliki je grijeh svaki onaj za koji je predviđena kazna na ovom svijetu, kao što je, naprimjer, činjenje bluda; svaki grijeh glede kojeg je izrečena prijetnja na ahiretu, kao što je, naprimjer, poslovanje uz kamatu, itd.

Pripadnici ehli-sunneta na stanovištu su da se počiniocu velikih grijehа oduzima naziv potpunog vjernika, pa biva fasik vjernik (vjernik grešnik – vjernik krnjavog imana) – i to “vjernik” zbog imana koji ima, a “grešnik” ili “fasik” zbog velikog grijehа koji čini – te da oni nisu nevjernici ukoliko ne smatraju dozvoljenim činjenje velikih grijehа, i da neće vječno ostati u džehennemskoj vatri iako uđu u vatru, makar do smrti ustrajavali u činjenju velikih grijehа.



Haridžije izvode van okvira islama počinioća velikih grijeha, dok mu murdžije daju status vjernika, potpunog imana.

Opće značenje

U predmetnom hadisu Vjerovjesnik, sallallahu alejhi ve sellem, objasnio je da pet obaveznih namaza briše grijeha, to jest one koje čovjek čini tokom dana i noći između sabahskog i podne-namaza, između podnevnog i ikindijskog namaza, između ikindijskog i akšamskog namaza, između akšamskog i jacijskog namaza te između jacijskog i sabah-namaza, pod uvjetom da ih obavlja na najbolji način i da se susteže od činjenja velikih grijeha.

Komentirajući hadis: “Nema nijednog muslimana koga zatekne vrijeme obaveznog namaza, pa se lijepo i potpuno abdesti, bude skrušen u namazu i lijepo obavi njegove ruknove, a da mu sve to neće biti čišćenje od grijeha koje je prije učinio, ako ne bude učinio koji veliki grijeh. I tako će biti cijelog njegovog života”, imam En-Nevevi, Allah mu se smilovao, kazao je: “Značenje je sljedeće: svi će mu grijesi biti oprošteni, osim velikih: oni se zbog toga ne opraštaju.”

Kadija Ijad el-Maliki je kazao: “...u ovom je hadisu navedeno opraštanje svih grijeha ukoliko čovjek ne poćini veliki grijeh, i to je vjerski pravac na kojem su pripadnici ehli-sunneta, dok velike grijeha briše samo pokajanje ili ih Uzvišeni Allah oprostí iz Svoje velike milosti i dobrote.”

Ibn Mesud, radijallahu anhu, pripovijeda: “Neki je čovjek poljubio ženu koja mu je bila zabranjena, te je otišao Allahovom Poslaníku, sallallahu alejhi ve sellem, i to mu spomenuo. Pa mu je objavljeno: ‘I obavljaj namaz početkom i krajem dana, i u prvim časovima noćí! Dobra djela zaista poništavaju hrđava. To je pouka za one koji pouku žele.’ (Hud, 114)

‘Da li ovo važi samo za mene?’ – upita čovjek, a Poslaník, sallallahu alejhi ve sellem, reče: ‘Za tebe i za sve moje sljedbenike koji urade slično.’” (Buhari i Muslim)

Od Osmana, radijallahu anhu, prenosi se da je čuo Allahovog Poslaníka, sallallahu alejhi ve sellem, kako kaže: “Nema nijednog muslimana kojeg zatekne vrijeme obaveznog (farz) namaza, pa se lijepo i potpuno abdesti, bude skrušen u namazu i lijepo obavi njegove ruknove, a da mu taj abdest i namaz neće biti



čišćenje od grijeha koje je prije učinio, ako ne bude učinio neki veliki grijeh. I to vrijedi za bilo koje vrijeme.” (Muslim)

U hadisu od Ebu Hurejre, radijallahu anhu, prenosi se da je Allahov Poslanik, sallallahu alejhi ve sellem, kazao: “Neće rob nikada izgovoriti iskreno *la ilahe illallah* a da mu se neće otvoriti nebeske kapije tako da (la ilahe illallah) dopre do Prijestolja (Arša), ako se bude klonio velikih grijeha.” (Tirmizi; hasen)

Kaže Ibn Abdulberr u *Et-Teḥhidu*: “Kada bi adbest, namaz i ostala dobra djela iskupljivala sve grijehe, Allahova naredba za pokajanjem ne bi imala smisla.” Čovjeku bi, u tom slučaju, bili oprošteni svi grijesi predavanjem selama, i ne bi imao potrebe za kajanjem.

Uzvišeni Allah kaže: “Ako se budete klonili velikih grijeha koji su vam zabranjeni, Mi ćemo vam oprostiti vaša loša djela i u divno vas mjesto uvesti.” (En-Nisa, 31)

U drugom ajetu Uzvišeni kaže: “One koji se klone velikih grijeha i razvrata, a one bezazlene On će oprostiti...” (En-Nedžm, 32)

Dakle, za velike grijehe neophodno je pokajanje.

Učenjaci kažu: “Kad je riječ o ljudskim pravima, ona se moraju nadoknaditi, makar se radilo i o nečem neznatnom.”

Koristi u hadisu

Dobra djela brišu hrdava ili male grijehe, baš kao što je Uzvišeni Allah rekao: “I obavljaj namaz početkom i krajem dana, i u prvim časovima noći! Dobra djela zaista poništavaju hrdava. To je pouka za one koji pouku žele.” (Hud, 114)

Dakle, hrdava djela poništavaju se dobrim djelima, kao što su, naprimjer, obavljanje namaza, udjeljivanje milostinje, post, činjenje dobročinstva, održavanje rodbinskih veza, posjeta bolesniku, prisustvovanje dženazi, stalno činjenje zikra, traženje oprosta, svjedočenje Allahove jednoće, zahvaljivanje Allahu, veličanje Allaha, učenje Kur’ana i tako dalje.

Ovdje se nameću sljedeća pitanja: “Ako grijesi budu oprošteni zbog obavljenih namaza, šta će biti oprošteno zbog obavljenih džumā i ispoštenog ramazana, budući da je počinilac čist od grijeha?”; “Ako grijesi budu oprošteni zbog uzimanih abdesta, šta će biti oprošteno zbog obavljenih namaza?”; “Ako grijesi budu oprošteni zbog nekih od navedenih djela, šta će onda biti oprošteno zbog



posta Dana Arefata, koji briše grijehe učinjene u dvjema godinama?”; “Ako grijesi budu oprosteni zbog nekih od navedenih djela, šta će onda biti oprosteno ako čovjek u namazu izgovori *amin* istovremeno s melecima – a znano je da podudaranje u tome ima za rezultat opraštanje svih ranijih grijeha?”

Odgovor na ovo glasi: Valjano je da sva navedena djela ponište grijehe, pa ako bude malih grijeha, bit će poništeni, a ako ih ne bude, čovjeku će biti upisani sevapi za dobra djela i bit će uzdignut na više razine. U svakom slučaju, šerijatskom obavezniku mu’minu neće biti zanemarena i neće propasti njegova dobra djela. To je nemoguće.

Allahov Poslanik, sallallahu alejhi ve sellem, poticao je muslimane na to da uvijek brižljivo obavljaju pet obaveznih namaza, da redovno obavljaju džumanamaz i poste mjesec ramazan, utoliko više jer to poništava hrđava djela i male grijehe, a mnogo ih je.

Lijepo je i poželjno da se musliman uputi u pravne propise namaza, džume i posta, i da to obavlja onako kako to šerijat predviđa i traži, da bi time postigao oprost malih grijeha.

Potrebno je da bude brižan u pogledu pet obaveznih namaza, klanja ih na vrijeme, upotpuni elementarne dijelove namaza, namaske uvjete i sunnete. Namaz je najznačajnije djelo zbog kojeg Allah, džellešanuhu, briše grijehe i poništava neposluh. I sve što čovjek ljepše i potpunije klanja, sve je više nade da će mu biti oprostena hrđava djela.

Selman el-Farisi, radijallahu anhu, kazao je: “Čuvajte pet obaveznih namaza! Njihovim obavljanjem poništava se ono što se učini udovima, ukoliko se čovjek susteže od pogubnih, velikih grijeha.”

U velike grijehe ubrajaju se sljedeća nedjela: pripisivanje Allahu saučesnika, sihr, ubistvo, poslovanje uz kamatu, uzimanje jetimskog imetka.

Ebu Hurejre, radijallahu anhu, pripovijeda da je Poslanik, sallallahu alejhi ve sellem, rekao: “Sustežite se od sedam pogubnih grijeha!” Ashabi upitaše: “Allahov Poslaniče, koji su to grijesi?” On odgovori: “Pripisivanje Allahu saučesnika, sihr, ubistvo nedužne osobe, osim kad pravda zahtijeva, poslovanje uz kamatu, uzimanje jetimskog imetka, bježanje s bojnog polja i potvora čestitih nevinih vjernica.” (Buhari i Muslim)



Od Džabira, radijallahu anhu, prenosi se da je Poslaniku, sallallahu alejhi ve sellem, došao neki čovjek i upitao: “Allahov Poslaniče, šta je to što sigurno vodi (u džennet i u vatru)? Odgovorio je: ‘Ko umre ne pripisujući Allahu ništa kao sudruga, ući će u džennet, a ko umre pripisujući Allahu saučesnika (širk), ući će u vatru.’” (Muslim)

U velike grijehе svrstava se i razgolićenost. Allahov Poslanik, sallallahu alejhi ve sellem, rekao je: “Dvije kategorije stanovnika džehennema nisam vidio: muškarce koji tuku narod bičevima poput kravljih repova, i žene pokrivenе, a otkrivene, koje su skrenule s Pravog puta i druge navode na stranputicu, a njihove glave slične su grbama horasanskih deva. Neće one nikad ući u džennet, niti će osjetiti njegov miris, a on se osjeti na neopisivo velikoj udaljenosti.” (Muslim)

U velike grijehе spadaju i čupanje obrva, tetoviranje i mijenjanje Allahova stvaranja. Abdullah b. Mesud, radijallahu anhu, kaže: “Allah prokleo žene koje se bave tetoviranjem i one koje traže da ih se tetovira, žene koje čupaju obrve i žene koje prave razmake među zubima radi lepšeg izgleda. Dakle, to su one koje mijenjaju lik koji je stvorio Uzvišeni Allah”, zatim je rekao da je Poslanik, sallallahu alejhi ve sellem, prokleo spomenute kategorije. (Muslim)

OSMI HADIS

Ebu Hurejre, radijallahu anhu, prenosi da je Vjerovjesnik, sallallahu alejhi ve sellem, rekao: "Allahova je dužnost da pomogne trojicu: borca na Allahovom putu, roba koji se želi otkupiti i onog koji se želi oženiti kako bi sačuvao čednost." (Tirmizi; hasen)

Prenosilac hadisa

O prenosiocu ovog hadisa bilo je riječi u našem prvom hadisu.

Značenje izrazā

Allahova je dužnost da pomogne trojicu: dužnost je Allahova na temelju Njegovog obećanja da će im pomoći. To je dužnost koju je Uzvišeni Gospodar Sebi stavio u obavezu te čisto Njegova dobrota i dobročinstvo.

borca na Allahovom putu: Gospodar će pomoći borcu za islam tako što će mu olakšati puteve vođenja borbe, kao i u onome što će biti uzrok njegove pobjede.

roba koji se želi otkupiti: roba koji želi kupiti slobodu dajući svom vlasniku određenu svotu novca na rate. Slobodan će postati kada vlasniku isplati posljednju ratu. Allahov Poslanik, sallallahu alejhi ve sellem, upotrijebio je navedeni izraz kako bi ukazao na to da su ova tri djela veoma naporna i teška za čovjeka i, da mu Svevišnji Allah ne ukaže Svoju pomoć u njihovu obavljanju, bilo bi mu preteško izvršiti ih. Najteže je od ovoga čuvanje čednosti, utoliko teže jer je riječ o potiskivanju pohote i strasti koji su urođeni u čovjeku. Kad čovjeku Gospodar pruži Svoju pomoć i dā mu da stupi u brak, on sačuva čednost i bude pošteđen zla koje može donijeti strast.

Opće značenje

U ovom hadisu je poticaj na tri djela. Naime, Allahov Poslanik, sallallahu alejhi ve sellem, obavijestio nas je da je Allahova, džellešanuhu, dužnost pomoći



borca, roba koji želi kupiti slobodu i onog koji želi sačuvati čednost. Njima je jezikom Allahova poslanika Muhammeda, sallallahu alejhi ve sellem, obećana pomoć.

Riječi Poslanika, sallallahu alejhi ve sellem: "Allahova je dužnost da pomogne trojicu..." ne znače da postoje nekakva pravila i norme na osnovu kojih ljudi mogu obavezati Svevišnjeg Gospodara na nešto, to je mišljenje nekih zabludjelih sekti koje smatraju da je Allah obavezan odrediti i činiti ono što je korisnije stvorenjima. Shodno ovom nakaradnom mišljenju, Uzvišeni Allah je bio dužan usmrtniti većinu nevjernika prije njihovog punoljetstva, jer je to mnogo korisnije za njih od života poslije punoljetstva, budući da izrazita većina njih umiru kao nemuslimani.

Pripadnici ehli-sunneta smatraju da Allahovi robovi ne mogu obavezati Stvoritelja ni na šta. On je Svevišnji, Apsolutni i Jedin Bog, čini šta želi, kada želi i kako želi. Rob ne može svome vlasniku ili pretpostavljenom ništa narediti niti ga nečim obavezati, pa kako može nečim obavezati Svevišnjeg Gospodara?!

Međutim, On može Sebe obavezati na nešto:

Uzvišeni Allah kaže: "Gospodar vaš je sam Sebi propisao da bude milostiv." (El-En'am, 54)

Ebu Zerr, radijallahu anhu, prenosi od Vjerovjesnika, sallallahu alejhi ve sellem, a on prenosi da je njegov Gospodar rekao: "Robovi Moji, ja sam zabranio Sebi nasilje i učinio da i vama bude zabranjeno, pa ga nemojte činiti..." (Muslim)

Kad je posrijedi borba na Allahovu putu, to je vrhunac islama i njegov najviši stepen. I, bila to oružana borba ili borba pomoću nauke i dokazā, Allah, džellešānuhu, pomoći će, uputiti na ispravno i dati pobjedu onom ko se bori na Njegovom putu, onom ko želi da riječ Allahova bude gornja i da Njegova vjera pobijedi.

Ebu Hurejre, radijallahu anhu, prenosi da je Allahov Poslanik, sallallahu alejhi ve sellem, rekao: "Allah je zagarantovao onome ko izađe na Njegovom putu, a ne izađe osim radi džihada na Njegovom putu, vjerujući u Njega i potvrđujući Njegove poslanike, da će ga uvesti u džennet ili će ga vratiti njegovoj kući s nagradom ili plijenom koji postigne." (Muslim)

Od Ebu Hurejre, radijallahu anhu, prenosi se da je Poslanik, sallallahu alejhi ve sellem, rekao: "Ko krene na hadž, pa (na tom putu) umre, bit će



mu upisana nagrada hadžije do Sudnjega dana. Ko izađe da obavi umru, pa umre, bit će mu upisana nagrada umre do Sudnjega dana. Ko izađe u borbu na Allahovom putu, pa umre, bit će mu upisana nagrada borca do Sudnjega dana.” (Ebu Ja’la; hasen)

Ebu Hurejre, radijallahu anhu, kazao je: “Neki je čovjek došao Allahovom Poslaniku, sallallahu alejhi ve sellem, i rekao mu: ‘Uputi me na djelo koje je ravno džihadu (borbi na Allahovom putu).’ ‘Ne, ne znam za takvo djelo’ – reče Vjerovjesnik, sallallahu alejhi ve sellem, i nastavi – ‘Možeš li ti, kada borac pođe u borbu, ući u svoju džamiju i u njoj klanjati bez prekida i postiti bez prekidanja (sve dok se on ne vrati)?’ ‘A ko to može?’ – reče čovjek, a Vjerovjesnik, sallallahu alejhi ve sellem, kaza: ‘Borcu na Allahovom putu se pišu dobra djela i kada njegov konj skače svezan užetom dok je na ispaši.’” (Buhari)

U verziji kod Muslima stoji: “Šta je ravno džihadu na Allahovom putu?’ Poslanik, sallallahu alejhi ve sellem, odgovori: ‘Vi to niste u stanju.’ Ponovili su mu pitanje dva ili tri puta i svaki put je rekao: ‘Vi to niste u stanju.’ Treći put je rekao: ‘Primjer borca na Allahovom putu je kao primjer postača, onoga koji klanja noćni namaz, pobožno i pokorno uči Allahove ajete i ne malaksa i ne napušta ni post ni namaz sve dok se borac ne vrati.’”

Ebu Hurejre, radijallahu anhu, rekao je: “Jedan je ashab, putujući s ljudima u borbu, prošao kroz neki klanac u kojem je bio izvorčić pitke vode. Zadivivši mu se, reče: ‘Možda bi bilo dobro da se izdvojim od ljudi i ibadetim u ovoj klisuri! Međutim, neću dok ne zatražim dozvolu od Allahovog Poslanika, sallallahu alejhi ve sellem.’ Spomenuvši to Allahovom Poslaniku, sallallahu alejhi ve sellem, on mu reče: ‘Ne čini to, jer je učešće jednog od vas u borbi na Allahovom putu vrednije od sedamdeset godina ibadeta u kući. Zar ne želite da vam Allah oprost i uvede vas u džennet? Borite se na Allahovom putu, jer ko se bude borio na Allahovom putu koliko je vrijeme između dvije muže deve, osiguran mu je džennet.’” (Tirmizi; hasen)

Kad je riječ o robu koji želi kupiti slobodu, Svevišnji Allah naredio je otkupljivanje, pa je rekao:

“A s onima u posjedu vašem koji se žele otkupiti, ako ste spoznali u njima dobro, o otkupu se dogovorite...” (En-Nur, 33). Značenje je: ako znate da su dobri i radini vjernici. Dakle, u tom slučaju robovlasniku je naređeno da se dogovori o otkupu. Onog roba koji želi kupiti slobodu i žuri s tim kako bi se



posvetio činjenju dobrih djela i privređivanju, pomoći će Allah, olakšat će mu nakanu i opskrbit će ga odakle se i ne nada.

Aiša, radijallahu anha, rekla je da je kod nje ušla robinja Berira da traži pomoć za svoj otkup, koji je iznosio pet oka (zlata) za pet godina, po jednu svake godine. Aiša joj reče i to joj bijaše po volji: “Šta misliš, hoće li te tvoji vlasnici prodati ukoliko im ja taj iznos dam sav odjednom, a onda te oslobodim i zadržim pravo na to da tvoje nasljedstvo pripadne meni?” Berira je otišla svojim vlasnicima i to im prenijela. Oni su rekli: “Može, ali pod uslovom da tvoje nasljedstvo pripadne nama.” “Ja sam tada” – veli Aiša – “ušla kod Allahovog Poslanika, sallallahu alejhi ve sellem, i to mu spomenula, a Allahov Poslanik, sallallahu alejhi ve sellem, reče: ‘Kupi je i oslobodi, jer njeno nasljedstvo će pripasti onome ko je oslobodi.’ Potom Allahov Poslanik, sallallahu alejhi ve sellem, ustade i reče: ‘Šta je ljudima, postavljaju uvjete kojih u Allahovoj Knjizi nema? Ko postavi takav uvjet, on je ništavan, a Allahov uvjet je najpreče ispoštovati i ispuniti.’” (Buhari)

Na osnovu citiranog hadisa imam Buhari naslovio je poglavlje: “O pomaганju roba koji ima ugovor o otkupu i njegovom traženju pomoći od ljudi”.

Ibn Hubejra u svom *El-Ifsahu* kaže: “Postignut je konsenzus islamskih učenjaka u vezi s pohvalom prihvatanja otkupa od roba, dok imam Ahmed, po jednoj verziji koja se prenosi od njega, smatra da je vlasniku roba obaveza prihvatiti otkup ukoliko rob ponudi iznos koji je vrijedan njegovog otkupa ili više od toga.”

A kad je riječ o čovjeku koji želi stupiti u brak – pa, Svevišnji Allah i Njegov Poslanik, sallallahu alejhi ve sellem, naredili su stupanje u brak. Stupanje u brak praksa je svih poslanika. Brak čovjeku donosi svako dobro: čednost, obaranje pogleda, potomstvo, vrijednost izdržavanja žene i djece. Tako je jer će za sve što potroši na svoju porodicu imati sevap ako od Gospodara očekuje nagradu.

Imam Taberi, Allah mu se smilovao, zapisao je: “Treba znati da se pomoću braka otklanja siromaštvo.” Šejh Es-Si’di, radijallahu anhu, kaže: “Allahove riječi: ‘...ako su siromašni, Allah će im iz obilja Svog dati’ (En-Nur, 32) odnose se na muževe i bračne parove, to jest nemojte pomisliti da će čovjek, pošto se oženi, osiromašiti zbog mnoštva čeljadi. U ovim Allahovim riječima poticaj je na sklapanje braka i obećanje da će onaj ko se oženi postati bogat nakon siromaštva.”



Ibn Abbas, radijallahu anhu, kaže: “Uzvišeni Allah naredio je brak, podstiče muslimane na njega, naređuje im da udaju slobodne osobe i robove, i obećao im je u braku obilje: ‘...ako su siromašni, Allah će im iz obilja Svoga dati.’” (Tefsir Taberi)

Ibn Mesud, radijallahu anhu, kaže: “Tražite nafaku stupajući u brak, jer Allah kaže: ‘ako su siromašni, Allah će im iz obilja Svoga dati.’” (Ibn Džerir)

Omer, radijallahu anhu, kaže: “Čudim se čovjeku koji ne traži bogatstvo posredstvom braka, a Allah kaže: ‘Ako su siromašni, Allah će im iz obilja Svoga dati.’” (Abdurrezzak)

U vezi s ovim pitanjem postoji i jasan, ali neispravan hadis. (Hatib u *Tarhu Bagdad*)

Koristi u hadisu

Vođenje borbe na Allahovu putu veoma je vrijedno djelo. Borba za vjeru neizostavno donosi čovjeku Allahovu pomoć. To je jedno od najvrednijih i najboljih djela u Uzvišenog Allaha.

Islam je odlikovao onog ko želi stupiti u brak kako bi se sačuvao od svega onog što je zabranjeno. Allah, džellešānuhu, takvom pomogne, pa mu omogući da snosi troškove stupanja u brak i bračnog života. Potvrdu za to nalazimo u Allahovoj Knjizi: “Udavajte neudate i ženite neoženjene, i čestite robove i robinje svoje; ako su siromašni, Allah će im iz obilja Svoga dati. – Allah je neizmjerio dobar i sve zna.” (En-Nur, 32)

Ebu Bekr, radijallahu anhu, govorio je: “Poslušajte Allahovu naredbu u vezi sa stupanjem u brak, On će neizostavno ispuniti ono što vam je obećao – učinit će vas neovisnim. ‘Udavajte neudate i ženite neoženjene, i čestite robove i robinje svoje; ako su siromašni, Allah će im iz obilja Svoga dati. – Allah je neizmjerio dobar i sve zna’ (En-Nur, 32).”

Kad je o tome riječ, ovdje smo dužni dati jedno objašnjenje. Naime, prema vanjskom značenju, Allahove riječi: “Udavajte neudate i ženite neoženjene, i čestite robove i robinje svoje; ako su siromašni, Allah će im iz obilja Svoga dati. – Allah je neizmjerio dobar i sve zna” (En-Nur, 32) sadrže obećanje da će Allah, džellešānuhu, svakog siromašnog čovjeka koji stupi u brak učiniti imućnim – Allah će Svoje obećanje neizostavno ispuniti. Pa, ukoliko vidimo



da se neki siromašan čovjek oženio, a nije postao imućan, nije to zato što je Allah Istiniti prekršio obećanje, sačuvaj Bože, već zato što je taj siromah podbacio u namjeri. Obećanje koje je dao Gospodar svjetova odnosi se na onog ko ima čestitu namjeru. Onaj ko pomoću stupanja u brak ne stekne nafaku treba sam sebe koriti.

I treća korist, vjera je odlikovala roba koji se trudi da kupi svoju slobodu od svog vlasnika – i njemu Allah, džellešānuhu, pomogne u ostvarenju tog cilja, pa mu olakša isplaćivanja.

DEVETI HADIS

Abdullah b. Amr b. el-As, radijallahu anhum, kazuje da je Resulullah, sallallahu alejhi ve sellem, rekao: "Postići će šta želi onaj ko prihvati islam, bude opskrbljen s onoliko koliko mu je dovoljno i Allah ga učini zadovoljnim onim što mu dâ." (Muslim)

Prenosilac hadisa

Abdullah b. Amr b. el-As. Primio je islam prije svog oca Amra, a bio je mlađi od njega samo dvanaest godina. Bio je marljiv u ibadetu i veoma učen. Prenio je mnogo Poslanikovih, sallallahu alejhi ve sellem, hadisa. Tražio je od Vjerovjesnika, sallallahu alejhi ve sellem, dozvolu da zapisuje njegove riječi, i on mu je to dopustio. I zaista, zapisivao je hadise koje čuje od Allahova Poslanika, sallallahu alejhi ve sellem. Svezak u koji je zapisivao hadise nazvao je *Es-Sādika* (istinite riječi).

Od njegovih lijepih izreka su riječi: "Da pustim jednu suzu iz straha od Allaha draže mi je nego da udijelim hiljadu zlatnika."

Umro je 65. godine po Hidžri. On je jedan od četvorice Abdullaha, pored Ibn Omera, Ibn Abbasa i Ibn Zubejra.

Značenje izrazā

postići će šta želi: ovdje se podrazumijeva postizanje i ostvarenje svega onog što čovjek želi ostvariti na oba svijeta; hadis je objedinio oba svijeta. Allah, džellešānuhu, objavio je: "Ono što žele vjernici će postići..." (El-Muminun, 1); "Postići će šta želi onaj koji se očisti..." (El-A'la, 14); "Ko danas pobijedi, sigurno će postići šta želi!" (Ta-ha, 64)

s onoliko koliko mu je dovoljno: dovoljno je ono što ne prelazi čovjekove potrebe, pa niti je bogat niti siromašan. Imam Nevevi zapaža: "Izraz *el-kefaf* označava onoliko koliko zadovoljava, ni više ni manje od toga." Mufesir el-Kurtubi



je zapisao: “Izraz *el-kefaf* označava onoliko nafake s koliko se zadovolje prijeko potrebe, pa čovjek nije u potrebi.”

i Allah ga učini zadovoljnim onim što mu dâ: to jest, Allah mu u srce ulije zadovoljstvo nafakom koju mu da, pa ne traži više od toga znajući da je količina nafake određena i da niko ne može dobiti više od onog što mu je sudbinom dodijeljeno.

Opće značenje

U ovom hadisu govori se o trima karakteristikama. Allahov poslanik Muhammed, sallallahu alejhi ve sellem, stavio je na znanje da je onaj ko se Allahu potpuno preda, bude opskrbljen s onoliko koliko mu je dovoljno i bude time zadovoljan dobio sve ono što traži i da je postigao sve ono za čim se žudi na ovom i budućem svijetu. To je tako jer su u navedenim trima karakteristikama objedinjena sva dobra dunjaluka i ahireta. Naime, pošto Gospodar svjetova potakne čovjeka da prihvati vjeru islam – osim nje Allah, džellešānuhu, drugu vjeru ne prihvata i ona je okosnica postignuća nagrade i spasa od Vatre, dâ mu opskrbe onoliko koliko zadovoljava njegove potrebe, pa ne mora tražiti od ljudi, čime, opet, sačuva svoj obraz i čast, a zatim mu Allah Istiniti upotpuni blagodat tako što ga učini zadovoljnim nafakom koju mu dâ, pa ne žudi da ima više – takav je postigao sva dobra ovog i budućeg svijeta.

Islam je najveći dar Uzvišenog Allaha čovječanstvu na ovom svijetu.

Ebu Seid el-Hudri je rekao: “Muavija je jednom prišao nekoj halki u džamiji i upitao: ‘Šta vas je navelo da se tu sakupite i sjednete?’ Rekli su: ‘Sjeli smo da spominjemo Allaha Uzvišenog.’ Rekao je: ‘Tako vam Allaha, samo ste se radi toga okupili?’ Rekli su: ‘Allaha nam, samo smo se radi toga okupili!’ Rekao je: ‘Nisam tražio od vas da se zakunete Allahom zato što sumnjam u vašu iskrenost. Niko nije bio na takvom stepenu kod Allahovog Poslanika, sallallahu alejhi ve sellem, kao ja, a da je prenio manje hadisa od njega. Poslanik, sallallahu alejhi ve sellem, jednom je došao do jedne halke svojih ashaba i upitao: ‘Šta vas je okupilo tu?’ Rekli su: ‘Sjeli smo da spominjemo Allaha Uzvišenog, da mu zahvaljujemo što nas je uputio u islam i odlikovao nas njime.’ Rekao je: ‘Tako vam Allaha, samo ste se radi toga okupili?!’ Odgovorili su: ‘Tako nam Allaha, samo smo se radi toga okupili!’ Rekao je: ‘Ja nisam tražio da se zakunete Allahom zato što



sumnjam u vašu iskrenost, nego što mi je došao Džibril i obavijestio me da se Allah ponosi vama pred melecima.” (Muslim)

Alija b. Ebu Talib, radijallahu anhu, rekao je: “Blagodati je šest: prva je islam, druga Kur’an, treća Muhammed, sallallahu alejhi ve sellem, četvrta sunnet, peta blagostanje i šesta neovisnost o ljudima.”

Uzvišeni Allah kaže: “Zar smatrate da je onaj koji hodočasnike vodom napaja i koji vodi brigu o Časnome hramu ravan onome koji u Allaha i u onaj svijet vjeruje i koji se na Allahovu putu bori? Nisu oni jednaki pred Allahom. A Allah neće ukazati na Pravi put onima koji sami sebi nepravdu čine.” (Et-Tevba, 19)

Nu‘man b. Bešir, radijallahu anhu, rekao je: “Bio sam kod minbera Allahovog Poslanika, sallallahu alejhi ve sellem, kad neki čovjek reče: ‘Nakon primanja islama nije mi bitno da li ću činiti ikakvo djelo osim napajanja hadžija.’ Drugi je rekao: ‘Nakon primanja islama nije mi bitno da li ću činiti ikakvo djelo osim da vodim brigu o Časnom hramu.’ Treći je rekao: ‘Džihad na Allahovom putu bolji je od svega što ste rekli.’ Omer ih ukori i reče: ‘Nemojte podizati svoje glasove kod minbera Allahovog Poslanika, sallallahu alejhi ve sellem, jer danas je petak. Kada klanjam džumu, otići ću kod njega i upitati ga o tome o čemu se razilazite.’ Potom je Allah objavio: ‘Zar smatrate da je onaj koji hodočasnike vodom napaja i koji vodi brigu o Časnom hramu ravan onome koji u Allaha i u onaj svijet vjeruje’, pa do kraja ajeta.” (Muslim)

Što se tiče opskrbe, riječ je o velikoj Allahovoj blagodati, a sve su Njegove blagodati velike. Svevišnji Gospodar rasporedio je opskrbu među ljudima kao što ih je obdario razumom, ali većina ljudi je zadovoljna svojim razumom, ali nije zadovoljna svojom opskrbom.

Uzvišeni Allah kaže: “Allah u izobilju daje opskrbu onome kome hoće od robova Svojih, a nekome i uskraćuje; – Allah, zaista, zna sve.” (El-Ankebut, 62)

Od Enesa b. Malika, radijallahu anhu, prenosi se da je Allahov Poslanik, sallallahu alejhi ve sellem, rekao: “Kada bi čovjek imao dolinu zlata, poželio bi da ima dvije. Njegova usta može napuniti samo zemlja. A Allah oprašta onome koji se kaje.” (Buhari i Muslim)

Od Enesa b. Malika, radijallahu anhu, prenosi se da je Allahov Poslanik, sallallahu alejhi ve sellem, rekao: “Kome preokupacija bude ahiret, Allah će mu srce ispuniti bogatstvom, sve njegove stvari će mu objediniti, a dolazit će



mu ovosvjetska dobra odakle se i ne nada. A kome preokupacija bude ovaj svijet, Allah će mu među oči staviti siromaštvo, sve njegove stvari (potrebe) će mu razjediniti, a od ovosvjetskih dobara će mu doći samo ono što mu je određeno.” (Tirmizi; sahih)

Ebu Hurejre, radijallahu anhu, prenosi da je Allahov Poslanik, sallallahu alejhi ve sellem, rekao: “Kada neko od vas pogleda onoga ko je imućniji ili ljepšeg izgleda od njega, neka pogleda i onoga koji je ispod njega (po imetku i izgledu).” (Muslim)

Koristi u hadisu

Predmetni hadis pokazuje odlike toga da čovjek bude opskrbljen s onoliko nafake koliko mu je dovoljno za život. Da ima onoliko koliko to zadovoljava njegove potrebe, bolje je nego da bude siromašan, jer siromaštvo navodi na zaboravljanje Allaha, kao što je bolje nego da bude bogat toliko da se osili.

Mnoštvo imetka zaokuplja od vjere, a siromaštvo navodi na zaboravljanje vjere. Ono čega je malo, a zadovoljava, bolje je od onog čega ima mnogo, a zaokuplja.

Onaj kome je dato onoliko koliko to zadovoljava njegove potrebe bliže je kategoriji siromašnih, utoliko bliže jer ne uživa prekomjerno u ljepotama i čarima ovog svijeta, kao što to čine bogati. U odnosu na siromašne on se odlikuje samo time što je pošteđen ljudske nemilosti i poniženja koje donosi prošnja.

Predmetni hadis dokazuje da je sva dobrota u Uzvišenog Allaha, kao i to da spas dolazi Allahovom dobrotom – On ga uputi u islam, opskrbi ga s onoliko koliko zadovoljava njegove potrebe, ne dajući mu ni više ni manje od toga, a naposljetku mu ukaže Svoju blagodat tako što ga učini zadovoljnim datom nafakom.

Navedeni hadis ne znači to da čovjek treba sjediti u kući i ne stjecati nafaku. Naprotiv, treba zarađivati i privređivati, imajući usto potpuno zadovoljstvo onim što mu Gospodar svjetova dâ.



DESETI HADIS

Ebu Hurejre, radijallahu anhu, prenosi da je Allahov Poslanik, sallallahu alejhi ve sellem, rekao: “Na svaki ljudski zglob u svakom danu u kojem Sunce izađe treba dati milostinju. A milostinja je izmiriti dvojicu, milostinja je pomoći čovjeku da uzjaše svoju jahalicu ili pomoći mu da na nju digne tovar. Lijepa riječ je milostinja, svaki korak ka namazu u džamiji milostinja je, a milostinja je i uklanjanje prepreke s puta.” (Buhari i Muslim) U drugoj verziji stoji dodatak: “Sve to zamijene dva rekata duha-namaza.” (Muslim)

Prenosilac hadisa

O prenosiocu ovog hadisa bilo je riječi.

Značenje izrazā

ljudski zglob: u ljudskom tijelu ima tri stotine šezdeset zglobova, baš kako je Allahov Poslanik, sallallahu alejhi ve sellem, rekao: “U čovjeku je stvoreno tri stotine i šezdeset zglobova; za svaki zglob čovjek je dužan udijeliti milostinju.” (Muslim)

treba dati milostinju: to jest poželjno je dati milostinju, a nije obaveza.

izmiriti dvojicu: izmiriti dvojicu po pravdi.

lijepa riječ je milostinja: bilo da su to lijepe riječi glede Allaha, poput, naprimjer, slavljenja Allaha (subhanallah), hvaljenja Allaha (elhamdulillah) i očitovanja Allahove jednoće (la ilahe illallah), ili lijepe riječi upućene ljudima.

svaki korak ka namazu u džamiji milostinja je: bez obzira na to je li džamija daleko ili blizu. Dakle, ako čovjek u kući uzme abdest i pođe u džamiju isključivo radi obavljanja namaza, zbog svakog koraka koji napravi, Allah, džellešānuhu, podići će ga za jedan stepen i oprostiti će mu grijeh; to su dvije odlike koje time postigne.

uklanjanje prepreke s puta: uklanjanje svega onog što smeta prolaznicima, bilo da je to kamen, otpadak ili bilo šta drugo.



sve to zamijene dva rekata duha-namaza: to je tako zato što tokom obavljanja tog ibadeta, to jest dva rekata, pokrene sve zglobove, i to zamijeni udjeljivanje milostinje za taj dan.

Savremena medicina potvrđuje da ljudsko tijelo ima tri stotine i šezdeset zglobova, baš kako je to rekao Allahov Poslanik, sallallahu alejhi ve sellem:

- stotinu četrdeset sedam (147) zglobova na kičmenom stubu
- dvadeset četiri (24) u grudima
- osamdeset šest (86) u gornjem dijelu tijela
- osamdeset osam (88) u donjem dijelu tijela
- petnaest u karlici (15)

Znajući to, pitamo se ko je, ako ne Sveznaajući Allah, mogao Vjerovjesnika, sallallahu alejhi ve sellem, poučiti toj naučnoj istini i zbog čega je Vjerovjesnik, sallallahu alejhi ve sellem, neizostavno govorio ovoj nepoznatoj stvari. Ova je mudžiza, dakako, pokazatelj istinitosti njegova poslanstva.

Opće značenje

U ovom hadisu Allahov Poslanik, sallallahu alejhi ve sellem, stavio nam je na znanje da je čovjek na svaki zglob svakog dana dužan udijeliti milostinju, pomoću čega će se zahvaliti Uzvišenom Gospodaru na tome što ga je stvorio na savršen način, i njegovu vanjštinu i unutrašnjost. Da je htio, Svevišnji Allah mogao je čovjeka lišiti moći i snage, pa se ne bi mogao pomjerati niti bi mogao obavljati svjetovne i vjerske poslove. Prema tome, postojanje i trajanje tako savršenih organa i skeleta iziskuje od čovjeka da bude zahvalan tako što će udjeljivati milostinju.

Ovdje je resulullah Muhammed, sallallahu alejhi ve sellem, također stavio na znanje da se u milostinju ubrajaju sva dobra djela, kao što su, naprimjer, popravljivanje odnosa među ljudima, pravedno suđenje među njima, nazivanje selama, govorenje lijepih riječi, pomaganje onom kome je pomoć potrebna, savjetodavanje odnos spram muslimanā riječima i djelima. Eto, svako od navedenih dobrih djela smatra se milostinjom.



Koristi u hadisu

Poželjno je da svaki čovjek svakog dana u kojem osvane udijeli za svaki zglob milostinju, a umjesto toga može, kako je to objasnio Vjerovjesnik, sallallahu alejhi ve sellem, klanjati dva rekata duha-namaza.

U ovom hadisu nalazimo poticaj na pomaganje drugim muslimanima i uklanjanje prepreka s puta.

Ako se uklanjanje osjetilne prepreke s puta smatra milostinjom, onda je uklanjanje apstraktne prepreke još značajnije i izraženije. U apstraktne prepreke ubraja se činjenje novotarija, zla i zabranjenih djela na putu.

Svako djelo koje čovjeka približava Istinitom Allahu, bilo da je riječ o ibadetu ili dobročinstvenom postupku prema stvorenjima, ima status milostinje. Ovo što je Vjerovjesnik sallallahu alejhi ve sellem, spomenuo u navedenom hadisu samo su primjeri toga.

Potrebno je da musliman ustrajava u obavljanju duha-namaza. A vrijeme duha-namaza počinje otprilike petnaest minuta nakon sunčeva izlaska i traje do pred zeval, to jest otprilike petnaest minuta prije nego što sunce bude na polovini neba. Vrednije je klanjati duha-namaz kad goveče, zbog temperature tla, ne može stajati u pijesku, to jest kad ugrije. Minimalno se mogu klanjati dva rekata, a gornja granica nije određena.

JEDANAESTI HADIS

Ebu Seid el-Hudri, radijallahu anhu, prenosi da je Vjerovjesnik, sallallahu alejhi ve sellem, rekao: “Dunjaluk je sladak i privlačan. Allah vas je učinio namjesnicima na njemu i gleda kako postupate. Zato se čuvajte dunjaluka i čuvajte se žena, jer je prvo iskušenje sinovima Israilovim bilo u vezi sa ženama.” (Muslim)

Prenosilac hadisa

Sa’d b. Malik b. Sinan el-Ensari. Bio je jedan od najmlađih, ali odabranih ashaba. Prenio je 1.170 hadisa, i sedmi je *el-muksirun*, poslije Džabira, koji je šesti.

Ebu Seid kaže: “Moj babo je pao kao šehid na Uhudu, ostavivši nas bez ičega. Došao sam kod Poslanika, sallallahu alejhi ve sellem, i zatražio nešto imetka, pa kada me je vidio, rekao je: “Ko se zadovolji onim što ima, Allah će ga učiniti zadovoljnim, a ko bude krepostan, Allah će ga učiniti još čednijim.” “Ovo se odnosi na mene, rekao sam sebi”, potom sam se vratio.

Poznavao je islamsko pravo, dostigao je stepen idžtihada, izdavao je fetve, pravna rješenja. Sudjelovao je s Vjerovjesnikom, sallallahu alejhi ve sellem, u Bici protiv saveznicā te u bitkama i pohodima nakon toga.

Umro je 74. godine po Hidžri i ukopan je u mezarju Bekija.

Značenje izrazā

dunjaluk je sladak i privlačan: ovo su dvije karakteristike ovog svijeta: sladak je sam po sebi i privlačan onima koji ga posmatraju.

Allah vas je učinio namjesnicima na njemu: učinio je da naslijedite generacije koje su prije vas živjele i gleda hoćete li Mu biti poslušni, pa činiti dobra djela, ili ćete činiti grijeha slijedeći svoje strasti.



Opće značenje

Allahov Poslanik, sallallahu alejhi ve sellem, objasnio je u ovom hadisu suštinu dunjaluka, a zatim je naredio oprez. Potom je objasnio to da nas je Svevišnji Allah na ovom svijetu učinio namjesnicima i da gleda hoćemo li Mu biti poslušni, odvrćati svoju dušu od slijeđenja strasti, izvršavati ono što nam je On stavio u obavezu i ne dopustiti da nas dunjaluk zavarava ili ćemo, pak, sasvim suprotno postupiti. Otuda je i rekao: “Zato se čuvajte dunjaluka...”, to jest izvršavajte sve ono što vam je Gospodar zapovjedio, a sustežite se od činjenja svega onog što vam je zabranio, i nipošto ne dopustite da vas zavaraju slast i sjaj ovog svijeta, baš kao što Svevišnji Allah kaže:

“Allahova prijetnja je, zaista, istinita, pa neka vas nikako život na ovom svijetu ne zavarava i neka vas u Allaha šejtan ne pokoleba.” (Lukman, 33)

Uzvišeni Allah je na brojnim mjestima pojasnio stvarnost svijeta na kojem živimo:

“Život na ovome svijetu je samo igra i zabava, a onaj svijet je, zaista, bolji za one koji se Allaha boje.” (El-En‘am, 32)

“Znajte da život na ovome svijetu nije ništa drugo do igra, i razonoda, i uljepšavanje, i međusobno hvalisanje i nadmetanje imcima i brojem djece.” (El-Hadid, 20)

“Život na ovome svijetu sličan je bilju zemaljskom na koje Mi spustimo s neba kišu s kojim se ona izmiješa, kojim se onda hrane ljudi i stoka. Pa kad se Zemlja ukrasi svojim ruhom i okiti i kad stanovnici njezini pomisle da su oni toga gospodari, dođe zapovijed Naša, noću ili danju, i Mi to pokosimo, kao da prije ničeg nije ni bilo.” (Junus, 24)

Abdullah b. Mesud, radijallahu anhu, kazao je: “Jednom je prilikom Allahov Poslanik, sallallahu alejhi ve sellem, zaspao na hasuri. Kad se probudio, vidio mu se trag od hasure. Pošto to primjetismo, rekosmo: ‘Allahov Poslaniče, bilo bi bolje da smo ti stavili dušek.’ On će na to: ‘Šta ja imam sa dunjalukom, ja se na njemu ponašam poput konjanika koji odsjedne u hladu drveta da se odmori, potom ga ostavi i nastavi put.’” (Tirmizi; sahih)



Od Sehla b. Sada es-Saidija, radijallahu anhu, prenosi se da je kazao kako je Allahov Poslanik, sallallahu alejhi ve sellem, rekao: "Prostor koliko zauzima bič u džennetu bolji je od ovoga svijeta i svega što je na njemu." (Buhari)

Od Sehla b. Sa'da, radijallahu anhu, prenosi se da je Vjerovjesnik, sallallahu alejhi ve sellem, rekao: "Da ovaj svijet kod Allaha vrijedi koliko i krilo mušice, On nevjerniku ne bi dao od njega ni gutljaj vode." (Tirmizi; sahih)

Poslanik, sallallahu alejhi ve sellem, rekao je: "Tako mi Allaha, dunjaluk je u odnosu na ahiret kao kad neko od vas stavi ovaj svoj prst u more, pa neka pogleda koliko će vode ostati na njemu." (Muslim)

Od Enesa, radijallahu anhu, prenosi se da je kazao: "Vjerovjesnik, sallallahu alejhi ve sellem, imao je kamilu koja se zvala El-Adba i niko je nije mogao pobijediti. Kasnije je došao neki beduin na mladom devcu i (u trkanju) je pobijedio. To je teško palo muslimanima. Vjerovjesnik, sallallahu alejhi ve sellem, primijeti to i reče: 'Allahovo je pravo da unizi sve dunjalučko što se na ovom svijetu uzvisuje.'" (Buhari)

Od Ebu Hurejre, radijallahu anhu, prenosi se da je Vjerovjesnik, sallallahu alejhi ve sellem, rekao: "Ovaj svijet je zatvor za vjernika, a džennet za nevjernika." (Tirmizi; sahih)

Mustevrid b. Šeddad, radijallahu anhu, kazao je: "Bio sam u grupi jahača koja je s Allahovim Poslanikom, sallallahu alejhi ve sellem, zastala pored tek rođenog uginulog jareta, kada je Allahov Poslanik, sallallahu alejhi ve sellem, rekao: 'Vidite li ovo? Ono je beznačajno za njegovog vlasnika dok ga je bacio!' 'Allahov Poslaniče!', uzviknuše prisutni, 'i zbog toga što je toliko bezvrijedno oni su ga bacili?' On reče: 'Ovaj svijet je kod Allaha beznačajniji nego što je ovo njegovom vlasniku.'" (Tirmizi; sahih)

Potom je Allahov Poslanik, sallallahu alejhi ve sellem, upozorio na žene, što se proteže na oprez spram ženskih spletki i smutnji koje donose. Iz tog je razloga i rekao: "...jer je prvo iskušenje sinovima Israilovim bilo u vezi sa ženama." Dozvolili su da ih žene zavedu, pa su zalutali i odveli druge u zabludu.

Uzvišeni Allah kaže: "Ljudima se čini da je lijepo samo ono za čim žude: žene, sinovi, gomile zlata i srebra, divni konji, stoka i usjevi." (Alu Imran, 14)



Usama b. Zejd, radijallahu anhu, prenosi da je Poslanik, sallallahu alejhi ve sellem, rekao: “Ja poslije sebe, za muškarce, neću ostaviti većeg iskušenja od žena.” (Buhari)

Ebu Hurejre, radijallahu anhu, prenosi da je Allahov Poslanik, sallallahu alejhi ve sellem, rekao: “Najvredniji safovi muškarcima su prvi, a najslabiji posljednji. Najvredniji safovi ženama su posljednji, a najmanje vrijedni prvi.” (Muslim)

Od Ibn Abbasa, radijallahu anhu, prenosi se da je Vjerovjesnik, sallallahu alejhi ve sellem, rekao: “Neka se čovjek ne osamljuje sa (tuđom) ženom izuzev kad ima s njom neko za koga se ne može udati (mahrem).” (Buhari i Muslim)

U jednoj verziji stoji: “Neće se osamiti čovjek sa ženom a da nije šejtan među njima treći.”

Od Abdullaha b. Mesuda, radijallahu anhu, prenosi se da je Vjerovjesnik, sallallahu alejhi ve sellem, rekao: “Žena je avret (ono što se treba pokriti). Kada izađe (iz kuće), šejtan je (u očima muškarca) predstavlja ljepšom nego što jeste.” (Tirmizi; sahih)

Od Ukbe b. Amira, radijallahu anhu, prenosi se da je Allahov Poslanik, sallallahu alejhi ve sellem, rekao: “Ne ulazite kod (tuđih) žena.” Neki ensarija upita: “A šta veliš o ulasku djevera (kod bratove žene)?” On će na to: “Ulazak djevera (kod bratove žene) ravan je smrti.” (Buhari i Muslim)

Zato ćemo naći da su se naši neprijatelji i, ujedno, neprijatelji naše vjere usredsredili na ženu – žele da se razgoliti i miješa s muškarcima. Cilj im je od žena napraviti obične lutke, pa da muškarce zanimaju samo njihov izgled i tijelo. To otvoreno i govore. Jedan od vodećih masona rekao je: “Čaša opojnog pića i pjevačica Muhammedovim pristalicama nanese više zla nego hiljadu haubica.” Drugi je izjavio: “Beduine ćemo zaokupljati udovoljavanjem stomaku i spolnom organu sve dok ne budu slični stadu ovaca koje vodimo kamo hoćemo.” Shvataju li oni koji podržavaju griješenje, razvrat, konzumiranje opojnih pića i širenje nemoralnih radnji u muslimanskim zemljama da izvršavaju cionistički plan potiranja načelā islama i da ostvaruju ono što oni, cionisti, nisu mogli ostvariti?!



Koristi u hadisu

Ovaj svijet ne predstavlja ništa u odnosu na ahiret. On je samo prolaz ili most prema budućem svijetu, jedan hlad u kojem smo kratko odsjeli i njiva na kojoj se sije za ahiret.

U predmetnom hadisu izrečeno je upozorenje na opasnost opčinjenosti ovim svijetom i ženama, jer su iskušenje svakom onom ko je podložan njihovom utjecaju. Upozoravajući na opasnost čari ovog svijeta, resulullah Muhammed, sallallahu alejhi ve sellem, rekao je: “Ono čega se za vas bojim poslije svoje smrti jest da će vam se obilno pružiti dunjalučke ljepote i ukrasi.” (Buhari i Muslim)

U jednom hadisu Poslanik, sallallahu alejhi ve sellem, kaže: “Iza sebe ne ostavljam pogubnije iskušenje za muškarce od iskušenja sa ženama.” (Buhari i Muslim)

Allahov Poslanik, sallallahu alejhi ve sellem, bio je brižan i sažaljiv spram svojih sljedbenika, pa ih je upozoravao na sve ono što ih može odvesti u propast.

Najveće, najteže i najpogubnije iskušenje iskušenje je u ženama. Iskušenje koje žene predstavljaju zaista je veliko i veoma je opasno za muškarca da upadne u njega. Njima se šejtan koristi kao zamkom koju postavlja muškarcima. Mnogo je neporočnih ljudi (koji nisu skloni grijehu) na taj način zaveo, pa su postali zatočnici svojih strasti i taoci svojih grijeha – ne mogu se toga nikako osloboditi. A da su se čuvali žena, da se nisu bavili onim što je sumnjivo, da se nisu izlagali kušnjama i da su tražili pomoć od Uzvišenog Allaha, izbjegli bi smutnju i sačuvali se od iskušenja. Eto zbog čega je Allahov Poslanik, sallallahu alejhi ve sellem, u ovom hadisu na žene posebno upozorio.

DVANAESTI HADIS

Abdullah b. Omer, radijallahu anhu, kazivao je: "Allahov Poslanik, sallallahu alejhi ve sellem, uzeo me za rame i rekao: 'Budi na dunjaluku kao da si stranac ili putnik!'" Ibn Omer, radijallahu anhu, govorio je: "Kad omrkneš, ne očekuj da ćeš osvanuti, a kad osvaneš, ne očekuj da ćeš omrknuti. Iskoristi zdravlje prije bolesti i iskoristi život prije smrti." (Buhari)

Prenosilac hadisa

Abdullah b. Omer b. el-Hattab. Drug Allahova Poslanika, sallallahu alejhi ve sellem. Sudjelovao je u Bici protiv saveznikā i u kasnijim bitkama, a nije sudjelovao u Bici na Bedru niti u Bici na Uhudu jer još nije bio stasao za borbu. Izdavao je fetve, pravna rješenja, šezdeset godina.

Od Ibn Omera, radijallahu anhumā, prenosi se da je kazao: "U doba Vjerovjesnika, sallallahu alejhi ve sellem, bijaše jedan čovjek koji bi, kad god bi šta usnio, to ispričao Vjerovjesniku, sallallahu alejhi ve sellem. Poželio sam da i ja šta usnijem kako bih to ispričao Vjerovjesniku, sallallahu alejhi ve sellem. Bio sam mlad i neoženjen. Jednog dana sam zaspao u džamiji. Sanjao sam kako me uzeše dva meleka i odnesoše u vatru koja bijaše sazidana kao što je sazidan bunar. Imala je dva kamena stuba isto kao i bunar. U njoj sam vidio neke ljude koje sam poznavao. Izgovarao sam: 'Utječem se Allahu od vatre! Utječem se Allahu od vatre!' Tada se ovoj dvojici priključi i treći melek, koji mi reče: 'Ti nećeš strahovati!'" (Buhari)

Ja sam taj san, kaže Ibn Omer, ispričao (sestri) Hafsi, a Hafsa ga je ispričala Vjerovjesniku, sallallahu alejhi ve sellem, koji je rekao: 'Kako je divan Abdullah, samo da hoće klanjati još i noćni namaz.'" Salim je kazao: "Abdullah je poslije toga vrlo malo spavao noću."

Prenio je 2.630 hadisa, po čemu zauzima drugo mjesto, odmah poslije Ebu Hurejre, radijallahu anhu.



Kada bi propustio jaciju u džematu, Ibn Omer, radijallahu anhu, klanjao bi nafilu ostatak noći.

Potkraj života je oslijepio.

Posljednji je ashab koji je umro u Meki, i to 73. godine po Hidžri.

Značenje izrazā

kao da si stranac: kao da si onaj što je daleko od rodnog zavičaja, pa mjesto gdje se trenutno nalazi ne smatra svojim boravištem niti ima na umu na tom mjestu ostati. Učenjaci su, tumačeći izraz *stranac*, upotrijebljen u ovom hadisu, kazali da on uključuje brojne pozitivne osobine.

Naime, stranac ne poznaje mnogo ljudi, pa je malo onih kojima može zavidjeti, biti s njima u neprijateljstvu, biti prema njima pakostan, dvoličan i prepirati se - izbrisati "biti prema njima" prije dvoličan i prepirati se: sve negativnosti počivaju na poznavanju svijeta i miješanju s njim. Također, stranac je nestalan, nema kuću, vrtove, obradivo zemljište, ženu i djecu, niti ga za ovaj svijet bilo šta veže, a što je prvi uzrok zaokupljenosti i otuđenosti od Stvoritelja.

putnik: onaj koji se kreće zemljama putujući, a njegovo je stanje začudnije od stanja stranca, jer je veza koju putnik ima sa stvarima slabija od veze stranca.

kad omrkneš, ne očekuj da ćeš osvanuti: ove riječi imaju dvojako značenje.

Prvo značenje je: ono što je predviđeno da se noću uradi, uradi prije nego što osvaneš i ne reci: "Sutra ću to uraditi." Dakle, ono što treba danas uraditi ne ostavljaj za sutra. Drugo značenje: kad uđeš u noć, ne očekuj da ćeš osvanuti, utoliko jer je moguće da ćeš umrijeti prije svanuća, odnosno kad osvaneš, ne očekuj da ćeš dočekati noć, tim više jer je moguće da ćeš umrijeti prije mraka.

iskoristi život prije smrti: iskoristi dane života u činjenju dobrih djela koja će ti u Allaha biti od koristi nakon smrti.

Opće značenje

U predmetnom hadisu Allahov poslanik Muhammed, sallallahu alejhi ve sellem, naredio je svojim sljedbenicima da na ovom svijetu budu skromni i da mu se ne priklanjaju, jer ma koliko čovjek živio na ovom svijetu, na koncu će ga ostaviti. Nadalje, ovaj svijet nije kuća u kojoj se čovjek uvijek osjeća prijatno i radosno. Naprotiv, užitke prate brojne nelagode koje ih pomute, kao što njegove



radosti prati česta tuga koja ih pomuti. Prema tome, na ovom svijetu treba se ponašati kao stranac – nikog ne poznaje niti njega ko poznaje, odnosno treba se ponašati kao putnik – nema namjeru negdje se skrasiti i ostati.

Stranac je na jednom mjestu, ali nema kuću niti namjeru stalnog boravka, a putnik nije na jednom mjestu, uvijek je u pokretu. Putnik je skromniji od stranca, jer putnik nije statičan, za razliku od stranca: statičan je makar malo vremena, a potom ode. Iz tog je razloga Ibn Omer, radijallahu anhu, govorio: “Kad omrkneš, ne očekuj da ćeš osvanuti...”, jer se može dogoditi da umreš prije svanuća, odnosno: “...kad osvaneš, ne očekuj da ćeš omrknuti”, jer se može dogoditi da umreš prije mraka. Iskoristi priliku, nemoj odlagati činjenje dobrih djela i nemoj se priklanjati ovom svijetu, jer moguće je da se razboliš – nećeš tad moći činiti dobro, moguće je da osiromašiš – nećeš tad imati čime učiniti dobro, moguće je da umreš – tad se prekidaju sva tvoja djela.

Čovjek treba požuriti sa činjenjem dobrih djela jer mu je njegov edžel – smrtni čas mnogo bliži nego što se čini.

Od Ukbe b. Harisa, radijallahu anhu, prenosi se da je rekao: “Klanjao sam iza Vjerovjesnika, sallallahu alejhi ve sellem, ikindiju u Medini. Pošto je predao selam, žurno je ustao i prekoračivao preko svijeta i otišao do jedne od soba svojih supruge. Svijet se uplašio njegove žurbe. Kasnije se vratio i primijetio da su se čudili njegovoj žurbi, pa im je rekao: ‘Sjetio sam se da imamo nešto neobrađenog zlata i ne volim da mi to umjesto Allaha obuzima misao, pa sam naredio da se to podijeli (potrebnim).’” (Buhari)

Od Ebu Hurejre, radijallahu anhu, prenosi se da je Allahov Poslanik, sallallahu alejhi ve sellem, rekao: “Požurite sa dobrim djelima prije smutnji, koje će biti poput dijelova mrkne noći. U tim smutnjama čovjek će osvanuti kao vjernik, a omrknuti kao nevjernik ili će omrknuti kao vjernik, a osvanuti kao nevjernik. Prodat će svoju vjeru za neznatnu dunjalučku vrijednost.” (Muslim)

Uzvišeni Allah kaže: “I natječite se ko će više dobra učiniti, Allahu ćete se svi vratiti, pa će vas On o onome u čemu ste se razilazili obavijestiti.” (El-Maida, 48)

Od Ibn Abbasa se prenosi da je Poslanik, sallallahu alejhi ve sellem, rekao: “Iskoristi pet stvari prije drugih pet: mladost prije starosti, zdravlje prije bolesti, bogatstvo prije siromaštva, slobodno vrijeme prije zauzetosti i život prije smrti.” (El-Hakim i Ibn Ebu Šejba; sahih)



Uzvišeni Allah kaže: “Odazovite se Gospodaru svome prije nego što dođe Dan koji Allah neće zaustaviti. Toga Dana utočišta nećete imati i nećete moći poricati.” (Eš-Šura, 47)

Od Ebu Hurejre, radijallahu anhu, prenosi se da je Allahov Poslanik, sallallahu alejhi ve sellem, rekao: “Ko je od vas danas osvanuo kao postač?” Ebu Bekr je rekao: “Ja.” Poslanik, sallallahu alejhi ve sellem, upita: “Ko je od vas danas klanjao dženzu?” Ebu Bekr reče: “Ja.” Poslanik, sallallahu alejhi ve sellem, upita: “Ko je od vas danas nahranio siromaha?” Ebu Bekr je rekao: “Ja.” Poslanik, sallallahu alejhi ve sellem, ponovo je upitao: “Ko je od vas danas obišao bolesnika?” Ebu Bekr je rekao: “Ja.” Potom je Allahov Poslanik, sallallahu alejhi ve sellem, rekao: ‘Nikad se ne desi da se ova dobra djela sastanu kod nekog čovjeka (u jednom danu) a da ga ne uvedu u džennet.’ (Muslim)

Koristi u hadisu

Potrebno je i preporučeno biti skroman na ovom svijetu i smatrati ga privremenim mjestom boravka, na temelju riječi Allahova Poslanika, sallallahu alejhi ve sellem: “Budi na dunjaluku kao da si stranac ili putnik!”

Poslanik Muhammed, sallallahu alejhi ve sellem, poučavao je ljude na lijep način tako što je navodio uvjerljive primjere. Da je, naprimjer, rekao: “Budi skroman na dunjaluku i nemoj se priklanjati ovom svijetu”, te riječi ne bi bile upečatljive poput riječi: “Budi na dunjaluku kao da si stranac ili putnik!”

Kad osvaneš, ne očekuj da ćeš dočekati noć, a kad omrkneš, ne očekuj da ćeš osvanuti. Koliko je ljudi osvanulo, a nije omrknilo, odnosno koliko je ljudi omrknilo, a nije osvanulo!

Koliko se ljudi odjenulo, ali ih je razodjenulo onaj koji ih je gasulio! Koliko je ljudi umrlo neposredno prije zgotovljena ručka ili večere! Koliko je ljudi otišlo na počinak, ali se nije probudilo!

Potrebno je iskoristiti zdravlje prije bolesti. Za razliku od stanja bolesti, u zdravlju je lakše činiti dobra djela i sustezati se od zabranjenih stvari – harama. Također, treba iskoristiti život prije smrti. Kad je zdrav, čovjek je širokogrud, veseo, širokih vidika, uživa u širini slobodnog vremena i zdravlja. O, kako je mnogo onih koji ove blagodati zanemaruju!

TRINAESTI HADIS

Ebul-Havra es-Sa'di je kazao: "Upitao sam El-Hasana b. Aliju: 'Šta si upamtio od Allahova Poslanika, sallallahu alejhi ve sellem?' On reče: 'Od Allahova Poslanika, sallallahu alejhi ve sellem, upamtio sam: 'Sustegni se od onog što ti je sumnjivo, a drži se onog što ti nije sumnjivo!'" (Tirmizi, koji je kazao da je hasen-sahih)

Prenosilac hadisa

El-Hasan b. Alija b. Ebu Talib. Unuk Allahova Poslanika, sallallahu alejhi ve sellem, i njegov miomirisni cvijet na ovom svijetu. On će biti jedan od prvaka džennetskih mladića. Bio je blag, bogobojazan i čestit. Nakon svog oca Alije, radijallahu anhu, preuzeo je hilafet i vladao nekoliko mjeseci, a zatim je mjesto halife ustupio Muaviji, radijallahu anhu. Time je Svemogući Allah sačuvao muslimansku zajednicu od raskola. Umro je 50. godine po Hidžri.

Značenje izrazā

sustegni se: ostavi.

od onog što ti je sumnjivo: od onog što u tebi izaziva sumnju i nemir.

onog što ti nije sumnjivo: onog što ti ne donosi sumnju niti nemir.

Opće značenje

Predmetni hadis pokazuje jezgrovitost u govoru koja je data Allahovu Poslaniku, sallallahu alejhi ve sellem. Na ovom hadisu počiva pravilo bogobojznosti. U njemu se nalazi poticaj na sustezanje od sumnjivih stvari i na prihvatanje onog u šta je čovjek siguran. Kako je ovaj hadis divan i koristan ukoliko se prema njemu postupa! Tako je jer čovjek nailazi na mnoge sumnjive stvari i situacije, pa mu se kaže: "Da bi bio čiste savjesti i sačuvao se, sustegni se od onog što ti je sumnjivo, a drži se onog što ti nije sumnjivo. Drukčije



rečeno, ostavi sve ono što u tvojoj duši izaziva sumnju i nemir, a drži se onog u čemu nema sumnje.”

Hafiz Ibn Redžeb, Allah mu se smilovao, zapisao je: “Ovaj hadis, zapravo, znači da se čovjek ne upušta u ono što je sumnjivo i da se toga čuva. Zbog onog što je zasigurno dozvoljeno vjernik u srcu nikad neće osjetiti nimalo sumnje, već će to dušom prihvatiti i srce će mu biti smireno. A kad su posrijedi sumnjive stvari, u srcu se zbog toga pojave nemir i uzrujanost, koji imaju za posljedicu sumnju u srcu.” El-Hattabi veli: “Bogobožnost nalaže da se čovjek udalji od svega onog u što sumnja.”

Aiša, radijallahu anha, kazuje: “Ebu Bekr es-Siddik imao je slugu koji bi mu svaki dan davao dio svoje dnevne zarade, što je Ebu Bekr koristio za ishranu. Jednog dana sluga je donio nešto hrane, i Ebu Bekr je to uzeo da jede. Sluga ga upita: ‘Znaš li odakle mi hrana koju si pojeo?’ Ebu Bekr odvrati: ‘Ne znam. Odakle ti?’ Sluga odgovori: ‘U vrijeme paganstva jednom sam čovjeku proricao sudbinu, iako tome nisam bio vičan – pretvarao sam se i prevario ga. Danas me taj čovjek sreo i, kao naknadu za to vraćanje, dao ovo što si ti pojeo.’ Tad Ebu Bekr stavi svoju ruku u usta i sve povрати.” (Buhari)

Koristi u hadisu

Navedeni hadis sadrži segment duhovnog odgoja. Naime, vjera islam ne teži tome da njeni pripadnici žive u kojekakvim sumnjama i nemiru. Prema tome, ukoliko želiš smiraj i mir, kloni se onog što je sumnjivo, odbaci to nastranu, da te ne proganja nemir. Ovo posebno važi za odbacivanje sumnji koje se pojave nakon izvršenja nekog ibadeta.

Predmetni hadis na sadržajan način ukazuje na to da se čovjek, prilikom neke sumnjive stvari, pojave ili situacije, treba obratiti svom čistom srcu i duši, utoliko prije jer je duša vjernika stvorena tako da teži iskrenosti, odnosno da bježi od laži. Ovo se, dakako, odnosi na ljude čija je nutrina čista, a srce čestito, a ne na one čija su srca mračna zbog činjenja grijehā – ta oni možda grijeh smatraju dobrim djelom, a dobro djelo grijehom.

Navedeni hadis dokazuje jedno od pet univerzalnih fikhskih pravila: “Uvjerenje se ne potiskuje sumnjom.” Drugim riječima, ako nasuprot uvjerenju u nešto stoji sumnja glede toga, postupit će se sukladno uvjerenju, a sumnja se ima odbaciti. Prema tome, ako je čovjek uvjeren u to da je uzeo abdest, a



sumnja u to je li abdest izgubio, ponašat će se u skladu s uvjerenjem: smatrat će da ima abdest. Ako je uvjeren da nema abdest, a sumnja u to je li ga uzeo, ponašat će se u skladu s uvjerenjem: smatrat će da nema abdest. Ukoliko sumnja je li neki predmet nečist, ponašat će se u skladu s uvjerenjem: smatrat će da je taj predmet čist. Ako pouzdano zna da je neki predmet nečist, ali sumnja u njegovu čistoću, ponašat će se u skladu s uvjerenjem: smatrat će da je nečist.

Ovaj hadis dovoljan je kao pokazatelj da je Allahovom poslaniku Muhammedu, sallallahu alejhi ve sellem, data rječitost u govoru i da je u nekoliko riječi mogao prenijeti mnogo poruka.

ČETRNAESTI HADIS

Enes b. Malik, radijallahu anhu, prenosi da je Allahov Poslanik, sallallahu alejhi ve sellem, rekao: “Ko želi da mu se opskrba poveća i život produži, neka održava rodbinske veze.” (Buhari i Muslim)

Prenosilac hadisa

O prenosiocu ovog hadisa bilo je riječi.

Značenje izrazā

da mu se opskrba poveća: da mu bude data obilna nafaka, na ovom i na budućem svijetu.

život produži: da mu trenutak smrti bude odložen.

neka održava: neka čini dobročinstvo riječima i djelima, u šta spada sljedeće: posjećivanje, vođenje brige o prilikama, raspitivanje, pomaganje, postizanje dobrobiti.

rodbinske veze: pod rodbinskim vezama podrazumijevaju se bližnji s očeve i majčine strane.

Opće značenje

Ovaj hadis sadrži preporuku o održavanju rodbinskih veza i obavijest da održavanje rodbinskih veza neizostavno donosi Allahovo zadovoljstvo i ahiretsku



nagradu, ali i nagradu već na ovom svijetu – mnoštvo opskrbe i dug život. I to je istina, te se ima shvatiti u pravom smislu riječi. Zna se da je Svevišnji Allah za svaku stvar odredio uzrok i način posredstvom kojih se ona postiže. Uzvišeni Gospodar, iz Svoje mudrosti, dao je da se nagrada i kazna podudaraju s onim zbog čega su zasluženi. Pa, pošto čovjek održava rodbinske veze pomoću dobročinstvenih postupaka i unosi svojoj rodbini radost u srce, Allah mu dug život dâ i opskrbi ga tako što mu otvori vrata nafake i blagoslova.

Potrebno je znati da je, prema Allahovoj Knjizi, proklet onaj ko kida rodbinske veze i da ga stiže kazna još na ovom svijetu. Allah, džellešānuhu, objavio je: “Zar i vi ne biste, kad biste se vlasti dočepali, nered na Zemlji činili i rodbinske veze kidali! To su oni koje je Allah prokleo i gluhim i slijepim ih učinio.” (Muhammed, 22–23) Alija b. el-Husejn obratio se svom sinu: “Sinko, nemoj nipošto biti jedan od onih koji kidaju rodbinske veze! Našao sam da je takav u Kur’ani-kerimu proklet.” Ebu Bekr, radijallahu anhu, prenio je da je Allahov Poslanik, sallallahu alejhi ve sellem, rekao: “Nema prećih grijeha za koje će Allah ubrzati kaznu na ovom svijetu, uz onu na budućem, od nasilja i kidanja rodbinskih veza.” (Ebu Davud, s pouzdanim lancem prenosilaca)

Koristi u hadisu

Održavanje rodbinskih veza ima za rezultat dug životni vijek, a najbolji je onaj čovjek koji dugo živi i čini dobra djela.

U dugom životnom vijeku dobro je za čovjeka samo ukoliko je dobar musliman i čini dobra djela. Ponekad je dug život zlo i velika šteta za čovjeka, baš kao što Slavljeni Allah kaže: “Neka nikako ne misle nevjernici da je dobro za njih to što im dajemo dug život. Mi im ga dajemo samo zato da što više ogreznu u grijehu, njih čeka sramna patnja.” (Alu Imran, 178) Eto, onima koji ne vjeruju Svemogućići Allah dâ vremena, dug život, opskrbu, zdravlje, porod i supruge, ali to im ne donese nikakvo dobro, već im zlo donese: zbog tih blagodati oni još više ogreznu u grijehu.

Ukoliko čovjek za neko dobro djelo dobije i ovozemaljsku nagradu, to mu neće škoditi ako dobro djelo učini iskreno zarad Allahova lica i ahiretske nagrade.

Kad je riječ o ovom hadisu, nameće se rašireno pitanje: “Ako je edžel, smrtni čas, već određen, tako da se ne može ni ubrzati ni odgoditi, baš kako to Sveznajućići Allah kaže: ‘Svaki narod ima svoj kraj, i kad dođe njegov kraj,



neće ga moći ni za tren jedan ni odložiti ni ubrzati' (El-A'raf, 34), odnosno ako je opskrba već određena i ne može se ni povećati ni umanjiti, kako se onda odloži čovjekov edžel i kako dobije veću nafaku ako održava rodbinske veze?" Islamski su autoriteti na ovo pitanje dali nekoliko odgovora. Jedan od tih glasi: produživanje života i povećanje nafake biva u odnosu na ono što meleci vide i znaju i u odnosu na ono što je zapisano u Levhi-mahfuzu – da život nekog čovjeka traje šezdeset godina, osim ako bude održavao rodbinske veze; ako ih bude održavao, njegov život bit će produžen za toliko i toliko vremena – a Allah, dželleš'anuhu, znao je da će određeni čovjek održavati rodbinske veze. To je značenje Allahovih riječi: "Allah briše šta hoće i utvrđuje..." (Er-Ra'd, 39) Ovo tumačenje ujedno je i najbliže istini. Drugi odgovor je u tome da spomenuto produživanje života zapravo označava blagoslov u životu, želju za činjenjem dobrih djela, čuvanje vremena i njegovo iskorištavanje u onom što će biti od koristi na ahiretu.

Istinsko održavanje rodbinskih veza jest da čovjek održava veze s onima koji ih prekidaju; da posjećuje rodbinu, a ona njega zanemaruje; da čini dobro rodbini koja njemu zlo čini. Abdullah b. Amr b. el-As, radijallahu anhumu, prenosi da je Vjerovjesnik, sallallahu alejhi ve sellem, rekao: "Ne održava istinski rodbinske veze onaj koji pazi na rodbinu samo dok i oni paze na njega i uzvraća im istom mjerom, već rodbinske veze istinski održava onaj koji pazi na rodbinu i onda kad oni prekinu kontakt s njim i uskrate mu pažnju." (Buhari)

Ebu Hurejre, radijallahu anhu, kazuje da je neki čovjek rekao: "Allahov Poslaniče, imam rodbinu s kojom održavam veze, ali oni ih prekidaju. Ja se lijepo ophodim prema njima, a oni mi lošim uzvraćaju. Ja sam samilostan prema njima, ali oni se prema meni neučtivo odnose." Poslanik, sallallahu alejhi ve sellem, na to je rekao: "Ako je tako kako si rekao, to je kao da ih hraniš vrućim pepelom. Allah će te stalno pomagati protiv njih sve dok tako postupaš." (Muslim) Komentirajući ovaj hadis, imam Nevevi, Allah mu se smilovao, zapisao je: "Poslanikove riječi: '...to je kao da ih hraniš vrućim pepelom' jesu poređenje posljedica grijeha koji bude upisan rodbini onog čovjeka s posljedicama jedenja vrućeg pepela."

PETNAESTI HADIS

Muavija, radijallahu anhu, kaže: “Čuo sam Vjerovjesnika, sallallahu alejhi ve sellem, da govori: ‘Kome Allah želi dobro, podari mu razumijevanje vjere. Ja sam samo onaj koji dijeli, a Allah daje. Pripadnici ovog ummeta uvijek će biti odani vjeri i neće im nauditi oni koji im se budu protivili, sve dok ne dođe Allahova odredba.’” (Buhari i Muslim)

Prenosilac hadisa

Muavija b. Ebu Sufjan el-Emevi el-Kureši. Bio je jedan od pisara Objave. Osnivač je Emevijskog hilafeta u Šamu i njegov prvi halifa. Islam je prihvatio prije oslobođenja Meke. Nakon što je Ebu Bekr, radijallahu anhu, postavljen za halifu, imenovao je Muaviju zapovjednikom vojske.

Od Abdurahmana Ebu Umejre, koji je bio od ashaba Allahova Poslanika, sallallahu alejhi ve sellem, prenosi se da je Vjerovjesnik, sallallahu alejhi ve sellem, jednom prilikom rekao Muaviji: “Allahu, učini ga od onih koji će ukazivati na Pravi put i koji će sam biti upućen na Pravi put i njime upućuj (druge ljude) na Pravi put.” (Tirmizi; sahih)

Irbad b. Sarija, radijallahu anhu, prenosi da je Poslanik, sallallahu alejhi ve sellem, rekao: “Allahu dragi, pouči Muaviju Knjizi, i sačuvaj ga od kazne.” (Ahmed; hasen)

Umro je u Damasku 78. godine po Hidžri.

Značenje izrazā

podari mu razumijevanje: Svevišnji Allah podari mu razumijevanje, pro-nicljivost i snažno zapažanje, pa postane upućen u vjerske propise, učenjak praktičar, što je najveća blagodät koju čovjek može dobiti. Glagol *fekuhe* znači da je tom čovjeku razumijevanje vjere postala neodvojiva osobina, *fekahe* da je preduhitrio druge u shvatanju nečeg, a *fekihe* da je shvatio i razumio.



ja sam samo onaj koji dijeli (kasim): kad bi dijelio nešto među ahabima, Resulullah, sallallahu alejhi ve sellem, dijelio je svima isto i bio je pravedan.

a Allah daje: u suštini je Allah Uzvišeni onaj koji daje, sve se stvari događaju Njegovom voljom i određenjem; On svakom čovjeku daje onoliko koliko On, slavljen neka je, želi i hoće.

odani vjeri: čuvat će Allahovu vjeru i primjenjivati islamski vjerovjod, ustrajno i nepokolebljivo.

sve dok ne dođe Allahova odredba: to jest Smak svijeta.

Opće značenje

Navedeni hadis dovoljan je kao pokazatelj da Sveznajući Allah želi golemo dobro i veliku korist onom kome podari vjersko znanje. Vjerskom znanju u vrijednosti, časnom položaju i visokoj razini nije ravno ništa na ovom svijetu, jer je vjersko znanje ostavština vjerovjesnikā, koji iza sebe nisu ništa drugo ostavili.

Vjerovjesnik je, sallallahu alejhi ve sellem, samo onaj koji dijeli i dostavlja vjersko znanje od Gospodara svjetova, i Svevišnji Allah je onaj koji daje pamćenje i razumijevanje onom kome On hoće.

Uvijek će jedna skupina muslimana biti odana islamskom vjerovjod, postojano će ga primjenjivati i čvrsto će ga se držati sve do nastupanja Smaka svijeta, a neće joj nauditi oni koji joj se budu protivili ili je ostave na cjedilu.

Uzvišeni Allah kaže: "Allah će na visoke stepene uzdignuti one među vama koji vjeruju i kojima je dato znanje." (El-Mudžadela, 11)

Nafi' b. Abdulharis je sreo Omera u Usfanu, a Omer ga je postavio za namjesnika Meke. Upitao ga je Omer: "Koga si postavio kao tvoga zamjenika stanovnicima Meke?" Rekao je: 'Ibn Ebzu.' On ga upita: 'A ko je Ibn Ebza?' Rekao je: 'Jedan od naših oslobođenih robova.' Upitao je: 'Zar si im za namjesnika postavio oslobođenog roba?' Nafi' je rekao: 'On uči Allahovu Knjigu, (Kur'an) i poznaje nasljedno pravo.' Omer je tada rekao: 'Vaš je Vjerovjesnik, sallallahu alejhi ve sellem, rekao: 'Allah uistinu ovom Knjigom uzdiže neke ljude, a druge ponižava.'" (Muslim)

Od Ebu Umame el-Bahilija, radijallahu anhu, prenosi se da je kazao: "Spomenuta su Allahovom Poslaniku, sallallahu alejhi ve sellem, dva čovjeka: jedan je pobožan, a drugi učen. Allahov Poslanik, sallallahu alejhi ve sellem, reče:



‘Vrijednost učenog nad pobožnim je kao moja vrijednost nad najslabijim među vama.’ Potom Allahov Poslanik, sallallahu alejhi ve sellem, reče: ‘Zaista Allah, Njegovi melec, stanovnici nebesa i Zemlje, čak i mrav u svome skrovištu i riba (u vodi) mole se Allahu za onoga koji ljude poučava dobru.’” (Tirmizi; sahih)

Od Abdullaha b. Mesuda, radijallahu anhu, prenosi se da je Allahov Poslanik, sallallahu alejhi ve sellem, rekao: “Samo je dvojici dozvoljeno zavidjeti: čovjeku kome je Allah dao imetak, pa ga on troši na Njegovom putu, i čovjeku kome je Allah dao znanje, pa on po njemu sudi i druge poučava.” (Buhari i Muslim)

Koristi u hadisu

Predmetni hadis ukazuje na goleme odlike stjecanja znanja, učenja, poučavanja i pisanja korisnih djela radi Allahova zadovoljstva. Ovaj nas hadis upućuje na znanje i govori nam da ono vodi ka bogobožnosti.

Vjerski tekstovi u kojima se govori o vrijednosti znanja odnose se na znanje o vjeri, a ne na svjetovne nauke. Onaj ko se ne uputi u propise vjere, ne savlada vjerska pravila i ono što se za njih veže – takav je lišen dobra.

Vjersko znanje dijeli se na dvije kategorije: farzi-ajn i farzi-kifaje. Kad je riječ o vjerskom znanju koje je farzi-ajn, to je ono znanje koje moraju steći svi muslimani, jer im je neophodno, kao što je, naprimjer, spoznaja tevhida, djela koja izvede iz vjere, djela koja su novotarija, pitanja vezanih za vjersko čišćenje, obavljanje namaza, post i tako dalje. A kad je riječ o vjerskom znanju čije je stjecanje farzi-kifaje, ukoliko ga stekne zadovoljavajuća skupina muslimana, te obaveze oslobođeni su drugi muslimani, kao što je, naprimjer, naučiti ezan, uputiti se u način navraćanja na dobro i odvrćanja od zla te slične obaveze pomoću kojih se čuva islamski vjerezakon.

Upućenost u vjerske nauke ne podrazumijeva samo posjedovanje informacija već i postupanje prema onom što se zna. Nije upućen u vjeru onaj ko zna a ne postupa prema onom što zna. Takav se naziva: onaj koji čita. Iz tog su razloga prve generacije upozoravale ne opasnost mnoštva onih koji čitaju, a malog broja onih koji razumiju. Abdullah b. Mesud, radijallahu anhu, govoraše: “Kakvo će biti vaše stanje kad među vama bude mnogo onih koji čitaju, a malo onih koji razumiju!”



Stjecanje znanja vrednije je od mnoštva dobrovoljnih djela, kao što su, naprimjer, dobrovoljni namaz i post, zikr i sl. Tako je jer od znanja imaju koristi onaj ko ga posjeduje i drugi muslimani, za razliku od spomenutih dobrovoljnih djela: korist od njih ograničena je na onog ko ih čini; jer su učenjaci nasljednici Božijih vjerovjesnika, a pobožnjaci to nisu; jer su pobožnjaci u podređenom položaju u odnosu na učenjake, za njima se povode i bespogovorno ih slijede u ibadetu; jer korist od znanja i trag koje znanje ostavlja ostaje nakon smrti učenih ljudi, a korist od dobrovoljnih ibadeta prestaje smrću onih koji su ih obavljali.

Pripadnici ovog ummeta uvijek će biti na dobru i istini i neće im nanijeti nikakvu štetu oni koji im se budu protivili. Oni su pobjedonosna skupina, čiji pripadnici uvijek slijede uputu koju je donio Resulullah, sallallahu alejhi ve sellem, i ne izlaze iz okvira te upute uvodeći novotarije, bilo da je riječ o vjerovanju ili djelima.

Prednost upućenosti u vjerske propise i praktično djelovanje ogleda se u tome što onaj ko je upućen u vjerske discipline postupa u skladu s Poslanikom, sallallahu alejhi ve sellem, praksom u svojim pokretima i stanju mirovanja. I samo je Allahu znano koliko je dobra u tome. Te blagodati svjestan je jedino onaj kome je Gospodar ukazao Svoju dobrotu, pa ga potaknuo da stekne korisno znanje i postupa u skladu s njim.

Znanje o šerijatu, rad po njemu i njegovo širenje je džihad na Allahovom putu. I borac koji se bori svojim oružjem i onaj koji traži znanje i bori se svojim znanjem rade na Allahovom putu i pojašnjavaju Allahov šerijat Njegovim robovima. Ipak, razlika među njima je velika: mudžahid na Allahovom putu je sredstvo za širenje i dostavljanje Allahove vjere, a nije cilj sam po sebi; dok je znanje, za razliku od toga, cilj samo po sebi i traženo je u svakoj situaciji.

ŠESNAESTI HADIS

Adijj b. Hatim, radijallahu anhu, kazao je: “Allahov Poslanik, sallallahu alejhi ve sellem, rekao je: ‘Sa svakim od vas Allah će sigurno razgovarati, a između njega i Allaha neće biti nikakva prevodioca. Čovjek će pogledati na svoju desnu stranu i vidjet će samo ono što je pripremio. Pogledat će na svoju lijevu stranu i vidjeti samo ono što je pripremio. Pogledat će ravno i neće vidjeti ništa osim džehennemske vatre ispred svog lica. Zato se čuvajte džehennemske vatre pa makar i tako što ćete udijeliti polovinu datule.’” U drugoj verziji stoji dodatak: “...pa makar i lijepom riječju.” (Buhari i Muslim)

Prenosilac hadisa

Adijj b. Hatim et-Tai. Družio se s Allahovim Poslanikom, sallallahu alejhi ve sellem. Sin je Hatima et-Taija, koji je uziman za primjer darežljivosti i plemenitosti. Bio je kršćanin, pa je prihvatio islam. Sudjelovao je u Bici kod deve, u kojoj je izgubio jedno oko. Nakon toga je učestvovao u Bici na Siffinu, u kojoj je ostao i bez drugog oka.

Govorio je: “Od kada sam primio islam, nije proučen ezan a da nisam bio pod abdestom.”

Napustio je Kufu kada je čuo da u tom gradu neki ljudi vrijeđaju Osmana.

Umro je 66. ili 67. godine po Hidžri. Neki učenjaci kažu da je živio 120 godina.

Značenje izrazā

zato se čuvajte džehennemske vatre pa makar i tako što ćete udijeliti polovinu datule: ovime se želi ukazati na vrijednost djela makar bilo i neznatno, baš kao što je Allah, džellešānuhu, rekao: “...onaj ko bude uradio koliko trun dobra – vidjet će ga...” (Ez-Zelzela, 7) Ova konstrukcija koju je upotrijebio Poslanik, sallallahu alejhi ve sellem, znači: između sebe i džehennemske vatre postavite pregradu pomoću milostinje, dobročinstva, makar se radilo o neznatnoj količini



toga. U nekim verzijama ovog hadisa kaže se: “Vjerovjesnik, sallallahu alejhi ve sellem, spomenuo je džehennemsku vatru, pa se Allahu utjecao od nje i molio Ga da ga od nje sačuva, a onda je okrenuo lice ustranu. Potom je ponovo spomenuo džehennemsku vatru, pa se opet Allahu utjecao od nje i molio Ga da ga od nje sačuva, a onda je ponovo okrenuo lice ustranu. Zatim je rekao: ‘Čuvajte se džehennemske vatre, pa makar i s pola datule, a onaj ko ni to ne nađe, onda bar lijepom riječju!’” (Buhari i Muslim)

Opće značenje

U ovom hadisu Vjerovjesnik, sallallahu alejhi ve sellem, stavio je na znanje da će Svevišnji Allah na Sudnjem danu sa svakim čovjekom razgovarati ponaosob, bez bilo kakva prevodioca. Evo o tome hadisa: “Allah će se približiti vjerniku, staviti ga u Svoje okrilje i sakriti ga, a potom upitati: ‘Znaš li za taj i taj grijeh?’ Vjernik će odgovoriti: ‘Gospodaru, znam.’ I tako, kad Mu prizna svoje grijehe i pomisli da je propao, Allah će mu reći: ‘Ja sam ti grijehe sakrio na dunjaluku, a danas ti ih opraštam.’” (Buhari i Muslim) Koliko je grijeha koje smo uradili i koji su jedino Allahu Uzvišenom znani, pa ih je On, slavljen i hvaljen neka je, sakrio, a kad bude Dan sudnji, Gospodar će upotpuniti prema nama Svoju blagodat – oprostit će ih i neće nas kazniti.

Od Safvana el-Mazinija, radijallahu anhu, prenosi se da je kazao: “Dok sam jednom prilikom išao s Ibn Omerom, radijallahu anhu, držeći ga za ruku, pojavi se neki čovjek i reče: ‘Šta si čuo od Allahovog Poslanika, sallallahu alejhi ve sellem, u vezi s tajnim razgovorom na Sudnjem danu?’ On reče: ‘Čuo sam Allahovog Poslanika, sallallahu alejhi ve sellem, kada je kazao: “Allah će se približiti vjerniku, pokriti ga svojim zastorom i tiho ga upitati: ‘Znaš li za taj grijeh? Znaš li za taj i taj grijeh?’ ‘Znam, Gospodaru’– reći će on. I sve će ga tako pitati dok on ne prizna svaki grijeh i ne pomisli da je propao. Tad će Allah reći: ‘Ja sam ti ih pokrio na onom (svijetu), a danas ti ih opraštam.’ Onda će mu biti data knjiga njegovih dobrih djela. A što se tiče nevjernika i licemjera, za njih će svjedoci reći: ‘Ovi su izmišljali laži o Gospodaru svome. Neka Allahovo prokletstvo stigne nasilnike.’”” (Buhari i Muslim)

A što se tiče neiskrenih i licemjernih, Allah će ih osramotiti na Sudnjem danu.



Allahov Poslanik, sallallahu alejhi ve sellem, rekao je: “Ko bude radio dobro radi svijeta, Allah će ga osramotiti (na Sudnjem danu), a ko bude radio dobro licemjerno, Allah će na (Sudnjem danu) objelodaniti njegovo licemjerstvo.” (Buhari)

Ebu Hurejre, radijallahu anhu, prenosi da je Vjerovjesnik, sallallahu alejhi ve sellem, rekao: “Svakoga koga Allah prikrije na ovom svijetu, prikrit će i na Sudnjem danu.” (Muslim)

A u drugoj verziji kod Muslima stoji: “Nijedan čovjek neće prikriti (mahanu) drugog čovjeka na dunjaluku a da Allah neće prikriti njegovu mahanu na Sudnjem danu.”

U ovom hadisu Vjerovjesnik, sallallahu alejhi ve sellem, uputio je svoje sljedbenike na udjeljivanje milostinje, makar se radilo i o polovici datule, a onaj ko ni to nema, upućivat će ljudima lijepe riječi.

Od Ebu Hurejre, radijallahu anhu, prenosi se da je Vjerovjesnik, sallallahu alejhi ve sellem, kazao: “Nema dana u kojem robovi osvanu a da ne siđu dva meleka. Jedan govori: ‘Allahu, nadoknadi onome koji dijeli’, dok drugi govori: ‘Allahu, upropasti onoga koji škrtari!’” (Buhari i Muslim)

Od Ebu Hurejre, radijallahu anhu, prenosi se da je Allahov Poslanik, sallallahu alejhi ve sellem, kazao da je Allah rekao: “Udjeljuj, sine Ademov, pa ću i Ja udijeliti tebi.” (Buhari i Muslim)

Uzvišeni Allah kaže: “Oni koji imanja svoja troše na Allahovom putu liče na onoga koji posije zrno iz kojeg nikne sedam klasova i u svakom klasu po stotinu zrna. – A Allah će onome kome hoće dati i više; Allah je neizmjerljivo dobar i sve zna. One koji troše imetke svoje na Allahovu putu, a onda ono što potroše ne poprate prigovaranjem i uvredama, čeka nagrada u Gospodara njihova – ničega se oni neće bojati i ni za čim oni neće tugovati.” (El-Bekara, 261–262)

Od Ebu Hurejre, radijallahu anhu, prenosi se da je Allahov Poslanik, sallallahu alejhi ve sellem, rekao: “Ko podijeli milostinju u vrijednosti hurme, iz pošteno stečenog imetka, a Allah i ne prima drugo do ono iz pošteno zarađenog imetka, Allah će je primiti Svojom desnicom i odgajati je kao što neko od vas odgaja svoje ždrijebe sve dok (taj zaloga) ne postane velik kao brdo.” (Buhari i Muslim)



Od Bilala b. Harisa el-Muzenija, radijallahu anhu, prenosi se da je rekao: “Čuo sam Allahovoga Poslanika, sallallahu alejhi ve sellem, kada je rekao: ‘Neko od vas će izgovoriti riječ kojom je Allah zadovoljan, ne sluteći da će ona postići ono što je postigla, a Allah će mu zbog nje upisati Svoje zadovoljstvo sve do Dana kada će se s Njim sresti. Isto tako, neko će od vas izgovoriti riječ koja izaziva Allahovu srdžbu, ne sluteći da će ona postići ono što je postigla, a Allah će mu zbog nje upisati Svoju srdžbu sve do Dana kada će se s Njim sresti.’” (Tirmizi; sahih)

Od Ukbe b. Amira, radijallahu anhu, prenosi se da je kazao: “Rekao sam: ‘Allahov Poslaniče, u čemu je spas?’ On reče: ‘Vladaj svojim jezikom, drži se svoje kuće i plači nad svojim grijesima.’” (Tirmizi; sahih)

Od Ebu Seida el-Hudrija, radijallahu anhu, prenosi se da je Vjerovjesnik, sallallahu alejhi ve sellem, kazao: “Kada čovjek osvane, svi se njegovi udovi potčine jeziku govoreći: ‘Boj se Allaha za nas, jer smo mi vezani za tebe! Ako si ti na Pravom putu, bit ćemo i mi. A ako ti skreneš u stranputicu, skrenut ćemo i mi!’” (Tirmizi; sahih)

Od Ebu Hurejre, radijallahu anhu, prenosi se da je Allahov Poslanik, sallallahu alejhi ve sellem, rekao: “Ko vjeruje u Allaha i Sudnji dan, neka počasti svoga gosta. Ko vjeruje u Allaha i Sudnji dan, neka održava vezu s rodbinom. I ko vjeruje u Allaha i Sudnji dan, neka govori ono što je dobro ili neka šuti!” (Buhari i Muslim)

Koristi u hadisu

Predmetni hadis jasno ustvrđuje da Allah, džellešanuhu, govori i da će, glasom koji će se čuti, razgovarati s ljudima na Sudnjem danu onako kako priliči Njegovoj uzvišenosti i veličini. Time se pobija stav novotara, poput džehmija, mutezila i drugih, koji su negirali da Allah, džellešanuhu, govori. Pripadnici glavnog toka islama, ehli-sunneta, na stanovištu su da je govor Allahov atribut, i da Svevišnji Allah govori kad hoće i šta hoće, i da je razgovarao s Musaom, alejhi selam, i da će razgovarati s ljudima na Dan polaganja računa, i da je časni Kur'an Allahov govor koji nije stvoren, što uključuje i tekst i značenje, i da Sveznajući Allah govori Svojim htijenjem i voljom.

Svi će ljudi sresti Uzvišenog Allaha i On će s njima razgovarati izravno, bez ikakva prevodioca i posrednika, bez obzira na različitost njihovih jezika



kojim su govorili na dunjaluku, pa će ih tom prilikom pozvati na odgovornost za sva djela. Evo o tome Allahovih riječi: "...ti ćeš, o čovječe, koji se mnogo trudiš, trud svoj pred Gospodarom svojim naći." (El-Inšikak, 6) Dakle, svaki će čovjek stati pred Gospodara svjetova i polagati pred Njim račun, a u tome će biti radost za vjernika.

Čovjek će na Danu sudnjem vidjeti sva svoja djela. Na svojoj desnoj strani i na svojoj lijevoj strani vidjet će ono što je uradio i pripravio, a zatim će ispred sebe vidjeti džehennemsku vatru. Stoga je čovjek dužan da se od te vatre zaštiti makar i time što će, radi Allahova zadovoljstva, udijeliti polovicu datule.

Lijepa riječ može imati za rezultat da se čovjek sačuva od džehennemske vatre. Sintagma *lijepa riječ* obuhvata učenje Kur'ani-kerima, slavljenje Allaha, svjedočenje Allahove jednoće, navraćanje na dobro i odvrćanje od zla, stjecanje znanja i poučavanje drugih. Nasuprot lijepoj riječi jest ružna riječ, koja tjera i omražava. Allah, džellešānuhu, objavio je: "Samo Allahovom milošću ti si blag prema njima; a da si osoran i grub, razbjegli bi se iz tvoje blizine..." (Alu Imran, 159)

SEDAMNAESTI HADIS

Ebu Zerr, radijallahu anhu, prenosi da su neki ashabi rekli Vjerovjesniku, sallallahu alejhi ve sellem: "Allahov Poslaniče, bogataši nas pretekoše u sevapima! Klanjaju kao što i mi klanjamo, poste kao što i mi postimo i daju milostinju od viška svog imetka." Poslanik, sallallahu alejhi ve sellem, upitao je: "Zar vam Allah nije dao ono od čega ćete udjeljivati milostinju? Svako *subhanallah* milostinja je, svaki tekbir je milostinja, svako *elhamdulillah* milostinja je, svako *la ilahe illallah* milostinja je, navraćanje na dobro milostinja je, odvrćanje od zla milostinja je, u spolnom odnosu sa suprugom milostinja je." Prisutni su upitali: "Allahov Poslaniče, zar će neko od nas za upražnjavanje svojih strasti imati nagradu?!" On ih je upitao: "Šta mislite, kad bi ih upražnjavao u haramu, bi li za to imao grijeh? Eto, ako ih bude upražnjavao u halalu, imat će nagradu." (Muslim)

Prenosilac hadisa

Ebu Zerr Džundub b. Džunada el-Giffari. Bio je četvrti koji je prihvatio islam, a neki učenjaci kažu da je bio peti. Ebu Zerr, radijallahu anhu, došao je Vjerovjesniku, sallallahu alejhi ve sellem, dok je bio u Meki i prihvatio islam. Zatim se vratio svojim sunarodnjacima i rugao se kipovima koje su oni obožavali.

Kada je Ebu Zerr čuo ono što Poslanik, sallallahu alejhi ve sellem, propovijeda, na licu mjesta je primio islam. Vjerovjesnik, sallallahu alejhi ve sellem, mu je rekao: "Vrati se svom narodu i o ovome ih obavijesti, i čekaj moju zapovijed." On reče: "Tako mi Onoga Koji te je s Istinom poslao, ja ću ovu stvar objelodaniti ljudima." Potom je otišao u Mesdžidul-haram i iz sveg glasa uzviknuo: "Svjedočim da je samo Allah Bog i da je Muhammed Allahov poslanik!" Kurejšije ustadoše i počеше ga tući dok ga ne oboriše. (Buhari i Muslim)

Umro je u Er-Rebezi 32. godine po Hidžri. Abdullah b. Mesud, radijallahu anhu, klanjao mu je dženazu s nekoliko ljudi koji su bili prisutni kad je umro.



Opće značenje

Neki su se ljudi požalili Vjerovjesniku, sallallahu alejhi ve sellem, pa su kazali: “Allahov Poslaniče, oni kojima je dato bogatstvo pretekoše nas u nagradi za dobra djela, za sebe su veliku nagradu osigurali. Eto, i mi i oni podjednako klanjamo i postimo, ali oni u odnosu na nas imaju jednu odliku: udjeljuju višak svog imetka, a mi, budući da smo siromašni, ne udjeljujemo milostinju.” Ovo nije bilo žaljenje kao produkt zavisti niti protivljenja Allahovu određenju, već je bilo žaljenje kao izraz želje da postignu nešto čime će preteći one koje je Allah, džellešanhuhu, učinio imućnima, pa udjeljuju milostinju. Poslanik, sallallahu alejhi ve sellem, rekao im je: “Zar vam Allah nije dao ono od čega ćete udjeljivati milostinju?”, to jest ako ne uspijevate udjeljivati milostinju iz imetka, postoji i milostinja koja se čini dobrim djelima.

Objasnio im je to, pa je kazao: “Svako *subhanallah* milostinja je, svaki tekbir je milostinja, svako *elhamdulillah* milostinja je, svako *la ilahe illallah* milostinja je, navraćanje na dobro milostinja je, odvrćanje od zla milostinja je...” Na to je Vjerovjesnik, sallallahu alejhi ve sellem, dodao: “...u spolnom odnosu sa suprugom milostinja je”, to jest kad čovjek udovoljava svojim potrebama sa svojom suprugom, to mu se ubraja u milostinju. Ashabi su primijetili: “Allahov Poslaniče, zar će neko od nas za upražnjavanje svojih strasti imati nagradu?!” On ih je upitao: “Šta mislite, kad bi ih upražnjavao u haramu, bi li za to imao grijeh?”, to jest ukoliko bi počinio blud i svoju strast zadovoljio u haramu, bi li za to bio griješan. Nakon što su oni kazali da bi bio griješan za to, Vjerovjesnik, sallallahu alejhi ve sellem, rekao je: “Eto, ako ih bude upražnjavao u halalu, imat će nagradu”, što znači da će čovjek, ukoliko se zadovolji halalom, a sustegne od harama, imati nagradu zbog toga.

Zikr – spominjanje Allaha ubraja se među najpohvalnija djela. Uzvišeni Allah, hvaleći one koji Ga mnogo spominju, kaže:

“I muškarcima koji često spominju Allaha i ženama koje često spominju Allaha – Allah je, doista, za sve njih oprost i veliku nagradu pripremio.” (El-Ahzab, 35)

Ebu Musa el-Ešari, radijallahu anhu, kaže da je Poslanik, sallallahu alejhi ve sellem, rekao: “Onaj ko spominje svoga Gospodara i onaj koji Ga ne spominje su poput živog i mrtvog.” (Buhari i Muslim)



Od Abdullaha b. Busra, radijallahu anhu, prenosi se da je neki čovjek rekao: “Allahov Poslaniče, propisi islama su mnogobrojni, pa mi kaži nešto na čemu ću posebno ustrajavati!” On reče: “Neka ti jezik bude stalno vlažan od spominjanja Allaha!” (Ibn Madže i Tirmizi; sahih)

Uzvišeni Allah kaže:

“O vjernici, često Allaha spominjite, i ujutro i navečer Ga veličajte.” (El-Ahzab, 41–42)

Od Ibn Mesuda, radijallahu anhu, prenosi se da je Allahov Poslanik, sallallahu alejhi ve sellem, kazao: “Sreo sam Ibrahima za vrijeme boravka na Miradžu. Rekao mi je: ‘Muhammede, prenesi svojim sljedbenicima od mene selam i obavijesti ih da je u džennetu zemlja mirišljava, a voda pitka, da je on ravnica, a da su njegove sadnice riječi: ‘Subhanallahi vel-hamdulillahi ve la ilahe illallahu vallahu ekber – Slava i hvala Allahu, nema drugog Boga osim Allaha, Allah je najveći!’ (Tirmizi; sahih)

Ebu Hurejre, radijallahu anhu, kazao je da je Allahov Poslanik, sallallahu alejhi ve sellem, rekao: “Dvije su riječi omiljene Milostivom, lahke za izgovor, a teške na Vagi. To su: Subhanallahi ve bihamdihi, subhanallahil-Azim – Slava i hvala Uzvišenom Allahu.” (Buhari i Muslim)

Svevišnji Allah u vezi s poslanikom Junusom, sallallahu alejhi ve sellem, kaže: “I da nije bio jedan od onih koji Allaha hvale, sigurno bi ostao u utrobi njenoj do Dana kad će svi biti oživljeni.” (Es-Saffat, 143–144)

Koristi u hadisu

Navedeni hadis na sadržajan način pokazuje da su ashabi, radijallahu anhum, imali visoke ambicije i da su žurili čineći dobro i u njemu se nadmećući. Željeli su postići Allahovu blagodat, pa imati imetka kao što su ga imali neki drugi muslimani koji su tim imetkom činili dobra djela.

Vjerovjesnik, sallallahu alejhi ve sellem, pružio je siromašnima mogućnost činjenja dobra koje od njih ne iziskuje nikakvog materijalnog troška.

Nadmetanje u ahiretskim poslovima jest pohvalno nadmetanje. Nije pohvalno nadmetati se u stjecanju dobara ovog svijeta, jer to vodi u propast. U hadisu je rečeno: “Bojim se da će vam se obilno pružiti dunjalučke ljepote i ukrasi, kao što su pružene onima prije vas, i da ćete se u njima nadmetati,



kao što su se i oni nadmetali, te ćete nastradati, kao što su i oni nastradali.” (Buhari i Muslim)

Ovaj hadis dovoljan je kao pokazatelj vrijednosti zikra, spominjanja Uzvišenog Allaha. Ebu Derda, radijallahu anhu, prenosi da je Vjerovjesnik, sallallahu alejhi ve sellem, rekao: “Hoćete li da vas obavijestim koje je vaše djelo najbolje, koje će biti najviše uvećano kod vašeg Gospodara, koje će imati najviši stepen, koje će za vas biti bolje od dijeljenja zlata i srebra i bolje od susreta s vašim neprijateljem koga biste ubijali i koji bi vas ubijao?” “Hoćemo”, odgovoriše, a on reče: “To je spominjanje Allaha.” (Ahmed, Tirmizi i Ibn Madže; Albani ga je uvrstio u autentična predanja)

Ovaj hadis očit je pokazatelj da je kijas, analogija, dokaz u islamu. Kijas je donijeti šerijatski propis analogno drugom propisu, baš kao što je Vjerovjesnik, sallallahu alejhi ve sellem, to uradio kad je rekao: “Šta mislite, kad bi ih upražnjavao u haramu, bi li za to imao grijeh? Eto, ako ih bude upražnjavao u halalu, imat će nagradu.” Dakle, zadovoljavanje strasti na halal način i dobijanje nagrade za to analogno je zadovoljavanju strasti na nedozvoljen način i zasluživanju kazne.

Dvije su kategorije milostinje na koje je Vjerovjesnik, sallallahu alejhi ve sellem, uputio siromahe u predmetnom hadisu. Prva kategorija jest ono što potpada pod ibadet, a nema veze sa svjetovnim poslovima: slavljenje Allaha, donošenje tekbirā, hvaljenje Allaha i izgovaranje riječi *la ilahe illallah*.

Druga je kategorija ono što potpada pod mubahe, dozvoljena djela, u kojima čovjek kao biće ima udjela, a koji se preinače u dobra djela pomoću iskrene namjere. Primjer za to jest zadovoljavanje intimne potrebe. Naime, ako čovjek tu potrebu zadovoljava s namjerom da sačuva svoju čednost i čednost svoje supruge te da stekne potomstvo, imat će za to nagradu.

OSAMNAESTI HADIS

Ebu Malik el-Eš'ari, radijallahu anhu, prenosi da je Allahov Poslanik, sallallahu alejhi ve sellem, kazao: "Čistoća (*et-tuhur*) je polovina imana. Riječi *hvala Allahu* ispunjavaju vagu, a riječi *subhanallahi vel-hamdulillah* ispunjavaju prostor između neba i Zemlje. Namaz je svjetlo, milostinja je jasan znak, strpljivost je sjaj, a Kur'an je dokaz u tvoju korist ili protiv tebe. Svaki čovjek osvane kao prodavač svoje duše, pa je neki otkupe, a neki upropaste." (Muslim)

Prenosilac hadisa

Ebu Malik Ka'b b. Asim el-Eš'ari. Došao je lađom sa sunarodnjacima iz istog plemena, pa su zajedno otputovali Vjerovjesniku, sallallahu alejhi ve sellem, u Medinu. Prihvatio je islam, družio se s Poslanikom islama, sallallahu alejhi ve sellem, išao s njim u vojne pohode i prenio dosta njegovih hadisa.

Umro je 18. godine po Hidžri, za vrijeme hilafeta Omera b. el-Hattaba, radijallahu anhu.

Značenje izrazā

et-tuhur: ovaj jezički oblik označava radnju, to jest vjersko čišćenje. Dvije su vrste tahareta: čistota duše i čistoća tijela. Pod čistoćom tijela podrazumijeva se čistoća kada čovjek ima abdest, kada nije džunup i kada na njegovom tijelu nema nečistoće. Pod čistotom se podrazumijeva čistota srca njegovom ispunjenošću iskrenošću prema Allahu Uzvišenom, oslobađanjem od pakosti, zavisti i drugih negativnih osobina.

riječi *hvala Allahu ispunjavaju vagu*, a riječi *subhanallahi vel-hamdulillah ispunjavaju prostor između nebesa i Zemlje*: riječ *subhanallah* znači da je Svevišnji Allah daleko iznad bilo kakvog nedostatka, a *elhamdulillah* ukazuje na to da Allahu pripada savršenstvo u svakom pogledu.

namaz je svjetlo: namaz je svjetlo u smislu da odvraća od činjenja grijeha, razvrata i svega onog što ne valja te vodi ka svemu onom što je ispravno, kao



što se čovjek kreće pomoću svjetla. Onom ko bude ustrajavao u obavljanju namaza, Svevišnji Allah dat će svjetlo u životu na ovom svijetu, dat će mu svjetlo u kaburu i na sirat-ćupriji.

milostinja je jasan znak: ovdje je rečeno da je milostinja *burhan*, a taj izraz označava sunčeve zrake. Na arapskom jeziku imenica *el-burhan* upotrebljava se za kategorički dokaz, utoliko što jasno ukazuje na ono što se njime želi dokazati. Eto tako je udjeljivanje milostinje jasan dokaz čovjekova imana, vjerovanja.

strpljivost je sjaj: to jest ona strpljivost koja je pohvalna u šerijatu, a to je strpljivost u činjenju dobrih djela, u sustezanju od činjenja grijeha, strpljivost u teškim nesrećama i svim vrstama neprijatnosti. Ovim se riječima želi kazati da je strpljivost pohvalna. Strpljiv čovjek ima svjetlo pomoću kojeg ispravno postupi i ustrajava na ispravnim postupcima.

Kur'an je dokaz u tvoju korist ili protiv tebe: to jest imaš korist od Kur'an-kerima ako ga učiš i postupaš prema njemu; u protivnom je dokaz protiv tebe.

svaki čovjek osvane kao prodavač svoje duše, pa je neki otkupe, a neki upropaste: svi ljudi prodaju svoju dušu, pa je neko proda Allahu Istinitom tako što Mu je poslušan – time svoju dušu spasi od kazne, a neko, opet, svoju dušu proda šejtanu i svojim prohtjevima tako što slijedi šejtana i ugađa svojim pohotama – time svoju dušu upropasti i zasluži kaznu za grijeh.

Opće značenje

Ovo je veličanstven hadis koji je jedan od temelja vjere islama i koji sadrži najvažnija pravila vezana za vjeru. Naime, ovaj hadis upućuje na to da je ostvario polovinu imana onaj ko srce očisti od sumnje i neispravnog vjerovanja i tijelo očisti od svih vrsta nečistoća.

Ovim riječima Allahov Poslanik, sallallahu alejhi ve sellem, stavio nam je na znanje da sevap za hvaljenje Allaha puni mizan dobrih djela i da slavljenje i hvaljenje Allaha, zbog veličine nagrade, popunjava prostor između neba i Zemlje, utoliko jer onaj ko hvali Allaha izriče time da samo Njemu pripada svaka hvala, savršeni atributi i veličina, odnosno utoliko jer onaj ko slavi Gospodara time tvrdi da je Allah, džellešanu, daleko iznad svake manjkavosti i nedostatka.

Ovdje je Poslanik, sallallahu alejhi ve sellem, ukazao na to da je namaz svjetlo kojim se čovjek vodi na ovom svijetu i pomoću kojeg će se voditi na ahiretu.



Burejda el-Eslemi, radijallahu anhu, prenosi da je Poslanik, sallallahu alejhi ve sellem, rekao: “Obraduj one koji idu noću u džamije potpunim svjetlom na Sudnjem danu.” (Ebu Davud i Tirmizi; hasen)

Islamski učenjaci tvrde da je namaz kategoričnija obaveza od hadža. Hadž mora obaviti jednom u životu onaj ko je u mogućnosti, dok obaveza namaza pada na svakog punoljetnog i pametnog muslimana, osim žene u mjesečnom ciklusu (hajzu) i nakon porođaja (nifasa). Nema razlike između zdravog i bolesnog, sigurnog i onoga koji je u strahu, bogatog i siromašnog, muškarca i žene.

Abdullah b. Amr, radijallahu anhu, prenosi da je Poslanik, sallallahu alejhi ve sellem, rekao: “Ko bude pazio na namaz, on će mu biti svjetlo, dokaz i spas, a ko ne bude pazio na namaz, neće mu biti svjetlo, dokaz i spas. Onaj ko sretne Allaha bez namaza, bit će u društvu Karuna, faraona, Hamana i Ubejja b. Halefa.” (Ahmed i Darimi; hasen)

I ukazao je Poslanik, sallallahu alejhi ve sellem, u predmetnom hadisu na to da je udjeljivanje milostinje očit dokaz i nedvosmislen pokazatelj čovjekova vjerovanja.

Uzvišeni Allah kaže:

“Za one koji, i kad su uobilju i kad su u oskudici, udjeljuju, koji srdžbu savlađuju i ljudima praštaju – a Allah voli dobročinitelje.” (Alu Imran, 134)

I ukazao je Vjerovjesnik, sallallahu alejhi ve sellem, na to da strpljivost u činjenju dobrih djela i trpeljivo podnošenje kušnji i neprijatnosti povećavaju čovjekovu uvidavnost.

Prenosi Ebu Hurejre, radijallahu anhu, da je Allahov Poslanik, sallallahu alejhi ve sellem, rekao: “Požurite sa dobrim djelima prije smutnji, koje će biti poput dijelova mrkle noći.” (Muslim)

Ebu Hurejre, radijallahu anhu, kazao je: “Vjerovjesniku, sallallahu alejhi ve sellem, došao je jedan čovjek i upitao ga: ‘Allahov Poslaniče, koja je milostinja po nagradi najveća?’ On reče: ‘Ona koju podijeliš dok si zdrav i gramziv i dok se bojiš siromaštva i žudiš za bogatstvom. Ne odgađaj sa dijeljenjem da ne bi, kada ti duša dođe do grkljana, rekao: ‘Tom pripada to, a onom ono’, a ionako njima sve pripada.’” (Buhari i Muslim)

Na kraju ovog hadisa Božiji Poslanik, sallallahu alejhi ve sellem, podsjetio je na vjersku istinu – da svi ljudi prodaju svoju dušu, pa je neko proda Allahu



Istinitom tako što Mu je poslušan – time je spasi od kazne na Sudnjem danu, a neko, opet, svoju dušu proda šejtanu i svojim prohtjevima – time je upropasti na Danu sudnjem; možda čak bude kažnjen još na ovom svijetu.

Uzvišeni Allah kaže: “Ima ljudi koji se žrtvuju u težnji za zadovoljstvom Allahovim. A Allah je milosrdan prema robovima Svojim.” (El-Bekara, 207)

Potom kaže: “O vjernici, udite u islam potpuno i ne idite stopama šejtanovim; on vam je, zaista, neprijatelj otvoreni.” (El-Bekara, 208)

Koristi u hadisu

Poslanikove, sallallahu alejhi ve sellem, riječi: “Čistoća (*et-tuhur*) je polovina imana...” potiču na održavanje tjelesne čistoće i duhovne čistote.

Iman, vjerovanje, djeljiv je, pa je jedan dio imana oličen u djelu, drugi u riječima, a treći u sustezanju.

Hvaljenje Allaha Uzvišenog veoma je vrijedno djelo, na osnovu Poslanikovih, sallallahu alejhi ve sellem, riječi: “Riječi *hvala Allahu* ispunjavaju vagu...”

Ovaj hadis ustanovio je postojanje mizana, vage na kojoj će biti vagana djela na Sudnjem danu. I postavlja se pitanje radi li se ovdje o osjetilnom ili apstraktnom mizanu. Mutezile su kazale da je riječ o apstraktnom mizanu, to jest o pojmu kojim se želi ukazati na postojanje pravde na Sudnjem danu. Taj njihov stav nije ispravan. Pripadnici ehli-sunneta smatraju i vjeruju da je riječ o osjetilnom (stvarnom) mizanu, koji će imati dva tase i jezičak, a na kojem će biti vagana dobra i hrđava djela. Tako su kazali jer upravo na to ukazuju vjerski tekstovi. I to je ispravno mišljenje.

Predmetni hadis dokazuje odliku toga da čovjek, spominjući Allaha, objedini riječi *subhanallah* i *elhamdulillah*. Objašnjenje toga glasi: onaj ko objedini ova dva zikra istovremeno izriče i svjedoči da je Allah, džellešānuhu, daleko iznad svakog nedostatka i da Njemu pripada savršenstvo u svakom pogledu. Riječju *subhanallah* negira postojanje bilo kakvog nedostatka kad je riječ o Gospodaru, a riječju *elhamdulillah* izjavljuje i izriče da savršenstvo u svakom pogledu pripada samo Allahu.

Ovim hadisom izrečena je preporuka da čovjek što češće obavlja namaz, što više udjeljuje milostinju, što češće hvali i slavi Allaha Svemogućeg te da što češće uči Kur’ani-kerim i postupa prema njemu, da bi bio dokaz u njegovu korist.



Davanje onog što je čovjeku drago pokazuje njegovu iskrenost – a ono što mu je drago kad udjeljuje milostinju jest imetak.

Predmetni hadis potiče na strpljivost i stavlja na znanje da je ona sjaj (*ed-dijā*). Izraz *ed-dijā* uključuje i svojevrсну toplinu. Razlika između svjetla, u vezi s namazom, i sjaja, koji se tiče strpljivosti, leži u tome što sjaj, sadržan u strpljivosti, prati određena količina topline, tim prije jer je strpljivost tegobna i za srce i za tijelo.

DEVETNAESTI HADIS

Sehl b. Sa'd es-Saidi, radijallahu anhu, ispričao je: "Jednom neki čovjek dođe Vjerovjesniku, sallallahu alejhi ve sellem, i reče: 'Allahov Poslaniče, ukaži mi na djelo koje ću činiti, a zbog kojeg će me zavoljeti Allah i ljudi!' Resulullah, sallallahu alejhi ve sellem, reče: 'Budi skroman na dunjaluku, zavoljet će te Allah, a budi ravnodušan prema onom što posjeduju ljudi, zavoljet će te ljudi.'" (Ahmed i Ibn Madže; Albani ga je uvrstio u pouzdana predanja)

Prenosilac hadisa

Sehl b. Sa'd b. Malik el-Ensari es-Saidi. Sehl, radijallahu anhu, dugo je živio. Doživio je vladara El-Hadžadža b. Jusufa, koji ga je stavio na muke i iskušenja. Sehl, radijallahu anhu, govorio je: "Bio sam prisutan kad su se pred Vjerovjesnikom, sallallahu alejhi ve sellem, međusobno proklinjali muž i žena, a imao sam tad petnaest godina."

Prenio je nekolicinu Poslanikovih, sallallahu alejhi ve sellem, hadisa. Umro je 88. godine po Hidžri.

Značenje izrazā

ukaži mi na djelo: ukaži mi na jedinstveno, sveobuhvatno djelo glede ljubavi.

budi skroman na dunjaluku: izraz *ez-zuhd* suprotan je izrazu *er-ragba*, koji označava želju i nastojanje. *Ez-zuhd* ukazuje na malu količinu nečeg, uzdržljivost, ravnodušnost, baš kao što je u ajetu: "I prodadoše ga za jeftine pare, za nekoliko groša; bili su o njemu uzdržljivi." (Jusuf, 20)

Mnoge su definicije izrečene u vezi sa značenjem skromnosti u šerijatu. Rečeno je: "Zuhd je da budeš ravnodušan prema onom što ne posjeduješ." Šejhul-islam Ibn Tejmijje, Allah mu se smilovao, dao je najprimjereniju definiciju skromnosti, pa je rekao: "Zuhd je sustezanje od svega onog što neće koristiti na ahiretu."



Prema tome, riječi Allahova Poslanika, sallallahu alejhi ve sellem: “Budi skroman na dunjaluku...” imaju sljedeće značenje: sustegni se od voljenja ovog svijeta i budi ravnodušan prema svemu onom što ti na njemu nije potrebno, a posveti se ahiretu i onom što će ti na njemu koristiti.

zavoljet će te Allah: to jest zavoljet će te zbog ravnodušnosti prema dunjaluku i nebavljenja njime.

a budi ravnodušan prema onom što posjeduju ljudi: to jest prema njihovu imetku i ugledu.

zavoljet će te ljudi: zato što si se sustegnuo od onog što je njima drago i što se nisi s njima nadmetao u onom što oni žele postići.

Opće značenje

Predmetni hadis upućuje nas na ravnodušnost spram ljepota ovog svijeta i sustezanje od stjecanja mnogo imovine, a budi u nama, s druge strane, želju za ahiretom i ulaganjem truda zarad njega. Ovaj hadis upućuje čovjeka na to da od ovog svijeta uzme samo ono od čega će imati koristi na ahiretu, budućem svijetu, kao i na to da ne žudi za onim što ljudi posjeduju, to jest da od toga sasvim odustane, pa će ga oni voljeti.

Više je motiva da budemo skromni na ovom svijetu: prvo, snaga imana i svijest o tome da Svevišnji Allah motri na sve; drugo, svijest o bezvrijednosti dunjaluka i onih koji za njim žude; treće, spoznaja da odanost ovom svijetu donosi tegobe, težinu i umor; i, četvrto, spoznaja da su ovozemaljske ljepote obmana i laž, igra i zabava.

Koristi u hadisu

Odricanje od ovog svijeta najviši je i najbolji stepen duhovnog uzdizanja zato što je Allahov Poslanik, sallallahu alejhi ve sellem, rekao da ono ima za rezultat Allahovu ljubav i zato što je onaj ko voli ovaj svijet i za njim žudi izložen Allahovoj mržnji.

Tri su pokazatelja da je čovjek zaista ravnodušan spram ovog svijeta. Prvi je to da polaže više nade u ono što je u Allahovoj ruci nego u ono što lično posjeduje. Hasan el-Basri, Allah mu se smilovao, imao je običaj kazati: “U slabo



uvjerenje ubraja se i to da čovjek više nade polaže u ono što posjeduje nego u ono što je u Allahovoj ruci.”

Drugi je pokazatelj to da čovjeku, kad ga pogodi neko ovozemaljsko iskušenje tako što mu, naprimjer, bude uništen imetak ili umre dijete, nagrada koja ga u Allaha čeka bude draža od onog što je izgubio.

I treći pokazatelj je to da u njegovim očima budu isti oni koji ga hvale i oni što ga kore u pogledu istine. Tako je, a onaj kome ovaj svijet mnogo znači voli hvalu, a prezire kuđenje. To ga može odvesti u to da, bojeći se prigovora, zanemari istinu u mnogim situacijama, odnosno da se, žudeći za pohvalom, prikloni neistini u mnogim situacijama.

Predmetni hadis očit je dokaz da se Allahu, džellešanuhu, pripisuje atribut ljubavi i da On, slavljen i hvaljen neka je, voli Svoje robove stvarnom ljubavlju.

Nema smetnje u tome da čovjek nastoji steći naklonost i ljubav ljudi koristeći se raznim načinima. Jedan od tih načina jest to da bude ravnodušan prema onom što oni, ljudi, posjeduju, da im čini dobročinstvo i sve ono u čemu je korist za njih, čineći to iskreno, radi Allaha Uzvišenog.

Valja znati da se u odricanje od ovog svijeta ne ubraja to da čovjek bude raščupan i prašnjav, to jest da ne vodi brigu o vlastitom izgledu. Resulullah, sallallahu alejhi ve sellem, jednom je prilikom rekao: “U džennet neće ući niko u čijem srcu bude koliko trun oholosti!” Na to je neki čovjek upitao: “Allahov Poslaniče, ja volim da moja odjeća i obuća budu čisti, pa ubraja li se to u oholost?” “Ne ubraja. Oholost je odbijanje istine i nipodaštavanje ljudi”, odgovori mu Poslanik, sallallahu alejhi ve sellem. (Muslim)

Potrebno je da čovjek bude skroman i u pogledu svoje duše, svog ega, tako što neće biti samozadivljen misleći da može probiti zemlju ili dosegnuti planine, zbog čega bi se oholio svojim položajem ili lijepim izgledom koji mu je Allah dao. Treba biti ponizan i tako se ponašati prema vjernicima, baš kao što je Gospodar svjetova rekao: “...i spusti krilo svoje (tj. budi blag i ponizan prema) vjernicima...” (El-Hidžr, 88)

DVADESETI HADIS

Ebu Hurejre, radijallahu anhu, prenosi da je Allahov Poslanik, sallallahu alejhi ve sellem, rekao: “Kad čovjek umre, prestaju mu teći sevapi za njegova djela, osim u tri situacije: za trajnu milostinju, za znanje koje je ostavio, pa se njime koriste ljudi, i za čestito dijete koje moli za njega.” (Muslim)

Prenosilac hadisa

O prenosiocu ovog hadisa bilo je riječi.

Značenje izrazā

kad čovjek umre, prestaju mu teći sevapi za njegova djela: učenjaci kažu da čovjeku, nakon što umre, prestaju teći sevapi za urađena djela, to jest ne obnavljaju se, osim u tri navedene situacije, zato što ih je on za života prouzročio. Dijete je plod njegova truda, kao što je plod njegova truda znanje koje je ostavio iza sebe, bilo da je riječ o predavanjima ili publikacijama, i kao što je plod njegova truda trajna sadaka koju je udijelio.

za trajnu milostinju: to jest za onu milostinju čija je korist za ljude neprestana. Trajna milostinja ima brojne oblike.

Opće značenje

U ovom hadisu nalazimo naznaku da je Svemogući Allah ovaj svijet učinio kućom u kojoj se radi i u kojoj se ljudi snabdijevaju dobrim ili hrdavim djelima za budući svijet, na kojem će svako biti nagrađen ili kažnjen. A kajat će se oni koji na ovom svijetu propuste priliku, pa se ne pripreme čineći dobra djela za ahiret, koja bi ih usrećila. Međutim, na ahiretu bit će nemoguće popraviti grešku i neće se moći učiniti ni najmanje dobro djelo, niti će se moći poništiti ni najmanji grijeh.

Dakle, djela se prekidaju smrću, osim tri djela.

Prvo je udjeljivanje trajne milostinje, to jest one čija korist neprestano traje, kao što su, naprimjer, davanje nekretnina u vakuf, štampanje knjiga s islamskim sadržajem, štampanje Mushafā, građenje džamija i škola i tome



slično. Za takva djela sevapi teku sve dok ljudi od njih imaju koristi. I to nam ukazuje na vrijednost vakufa, pogotovo onog kojim se pomaže vjera, kao što su, naprimjer, širenje vjerskog znanja, pomaganje borbe na Allahovu putu te pomaganje u svemu onom što je vezano za ibadet.

Drugo je djelo znanje kojim se ljudi koriste nakon nečije smrti, kao što je, naprimjer, znanje koje je prenio vjernim tragaocima znanja, znanje koje je širio među običnim svijetom, knjige koje je napisao o islamu. Dakle, čovjek će za svako znanje koje se, nakon njegove smrti, lančano prenosi imati trajnu nagradu. Koliko je učenjaka koji su na ahiret preselili prije nekoliko stotina godina, a iz njihovih se djela izvlači korist! I koliko je njihovih učenika čije se dobro lančano širi dugim nizom godina! To je Allahova dobrota, daje je kome On hoće.

Treće djelo oličeno je u dobrom djetetu, muškom ili ženskom. Roditelj nakon smrti ima koristi od dobrote svog djeteta i dove koju ono za njega upućuje. Takvo dijete uvijek upućuje Allahu Plemenitom dovu da oprostí njegovim roditeljima i smiluje im se, podigne ih na više džennetske stepene i nagradi ih.

Koristi u hadisu

Predmetni hadis dokazuje da se sevapi za dobra djela prekidaju nakon smrti, osim kad je riječ o: trajnoj milostinji, kao što je, naprimjer, vakuf; korisnom znanju, poput poučavanja i pisanja knjiga; čestitom djetetu.

Troje navedeno u ovom hadisu sadržano je u riječima Uzvišenog Allaha: “Mi ćemo, zaista, mrtve oživiti i Mi smo zapisali ono što su priredili i tragove njihove...” (Ja-Sin, 12). Allahove riječi: “...ono što su priredili...” odnosi se na dobra i hrđava djela koja su lično uradili, a riječi: “...i tragove njihove...” protežu se na sve ono što počiva i zasniva se na njihovim djelima, a što su drugi učinili, utoliko jer su oni bili uzrok tome time što su u to pozivali, to preporučivali i kao vjersko znanje širili među muslimanima.

Primjer za to jesu islamski učenjaci koji su preselili na ahiret, a iza sebe ostavili vjersko znanje kojim se ljudi koriste. Nije isključeno da čovjeku bude u jednoj stvari objedinjeno nekoliko dobrobiti i koristi. Primjer za to jest čestito dijete koje je postalo učenjak, a u čije je poučavanje otac ulagao trud, pa to dijete usto i upućuje dovu za svog roditelja.



Predmetni hadis na sadržajan način ukazuje na to da je dova najvrednije dobro djelo¹ koje se može učiniti za umrlog, a ne post, učenje Kur'ana i činjenje tome sličnih dobrih djela, čije će sevape pokloniti umrlom. Tako je jer je Vjerovjesnik, sallallahu alejhi ve sellem, u kontekstu hadisa u kojem se govori o djelima, objasnio da je upućivanje dove za umrlog nešto od čega on ima najveću korist.

Korisno znanje najvrednija je od tri stvari spomenute u predmetnom hadisu.² Ebu Hurejre, radijallahu anhu, bio je siromašan toliko da je padao u nesvijest od gladi, ali je istovremeno ashab koji je ovom ummetu donio najveću korist. Upravo nam je on prenio brojne hadise, a oni su trajna milostinja, pa štaviše, najvrednija milostinja u to vrijeme. Također, neprestano usvajamo znanje koje su nam ostavili islamski učenjaci kroz generacije – čitamo njihove knjige, a oni su odavno u svojim kaburovima.

Valja znati i sljedeće: moguće je da ono što čovjek udijeli kao trajnu milostinju bude uništeno i izvjesno je da će čestito dijete koje za roditelja moli umrijeti, ali korisno znanje koje muslimanima služi traje i trajat će sve dok to Allah htjedne, a nekome može potrajati do Sudnjeg dana. Stjecanju vjerskog znanja nije ravno nijedno dobro djelo, pod uvjetom da je čovjek iskren u njegovu stjecanju, kako je to jednom prilikom rekao imam Ahmed, Allah mu se smilovao.

Izuzevši tri situacije koje su navedene u predmetnom hadisu, djela se nakon smrti prekidaju, na temelju Allahovih riječi: "...i da je čovjekovo samo ono što sam uradi..." (En-Nedžm, 39)

Ovim se hadisom može indirektno dokazivati da je poželjno stupiti u brak, jer se time stječe čestito potomstvo, koje će doviti za roditelje, a ostvaruju se i druge dobrobiti.

¹ Odnosi se na djelo koje živi mogu učiniti za umrlog.

² Odnosi se na djelo koje čovjek može učiniti dok je živ, i ostaviti ga iza sebe nakon smrti.

DVADESET PRVI HADIS

Ebu Hurejre, radijallahu anhu, prenosi da je Resulullah, sallallahu alejhi ve sellem, rekao: “Ko ublaži neku ovosvjetsku nevolju vjerniku, Allah će njemu ublažiti neku ahiretsku nevolju. Ko olakša dužniku u nevolji, Allah će njemu olakšati na dunjaluku i na ahiretu. Ko sakrije sramotu muslimana, Allah će sakriti njegovu sramotu na ovom i na budućem svijetu. Allah je na pomoći Svom robu dok je on na pomoći svom bratu. Ko krene putem na kojem će stjecati znanje, Allah će mu njime olakšati put do dženneta. Nikad se ne sastanu ljudi u nekoj Allahovoj kući radi učenja i proučavanja Allahove Knjige a da se na njih ne spusti smirenost, da ih ne obaviye milost, da ih melec ne okruže i da ih Allah ne spomene pred onima koji su kod Njega. Koga unazade njegova djela, neće ga spasiti njegovo porijeklo.” (Muslim)

Prenosilac hadisa

O prenosiocu ovog hadisa bilo je riječi.

Značenje izrazā

nevolju: nevolja je neka teška neprilika i jad koji čovjeka bace u tugu i brigu. Ovaj izraz naveden je u ajetima: “Reci: ‘Allah vas iz njih i iz svake nevolje izbavlja, pa vi ipak smatrate da ima Njemu ravnih’” (El-En‘am, 64); “I Nuhu se, kad u davno vrijeme zavapi, odazvasmo i njega i čeljad njegovu od jada velikog spasismo...” (El-Enbija, 76)

dužniku u nevolji: onom čije je materijalno stanje teško i ko nema dovoljno novca, baš kao što Allah, džellešanuhu, kaže: “A ako je u nevolji, onda pričekajte dok bude imao...” (El-Bekara, 280)

ko sakrije sramotu muslimana: ko sakrije neko sramotno djelo koje učini musliman, bilo da je riječ o negativnom djelu glede vjere ili ovozemaljskih poslova.

ko krene putem: ko stupi na put.



na kojem će stjecati znanje: na kojem će usvajati znanje; ovdje se podrazumijeva vjersko znanje, kao i sva znanja koja ga dopunjuju, poput arapskog jezika, historije i sl.

Allah će mu njime olakšati put do dženneta: Allah će mu, time što će ga uputiti, olakšati put do dženneta.

a da se na njih ne spusti smirenost: to jest njihova će srca biti smirena, a grudi prostrane.

da ih ne obavije milost: to jest Allahova milost.

da ih meleci ne okruže: da ih meleci ne okruže sa svih strana iz počasti prema njima.

da ih Allah ne spomene pred onima koji su kod Njega: one koji se okupe u džamiji radi međusobnog proučavanja Allahove knjige Kur'ana spomene Allah Uzvišeni kod melekā, baš kao što Gospodar kaže u hadisi-kudsiju: “Ko Me spomene u nekom društvu, Ja njega spomenem u društvu boljem od toga.” (Buhari i Muslim)

koga unazade djela, neće ga unaprijediti porijeklo: čija su djela manjkava, pa njima ne postiže stepen pravih trudbenika, ne smije se pouzdavati u svoje visoko porijeklo ni u zasluge predaka te podbacivati u djelima, jer neće koristiti porijeklo onom koga djela unazade.

Opće značenje

Ovaj časn hadisi stavlja nam na znanje to da će Svevišnji Allah onog ko muslimanu ublaži neku nevolju, odnosno olakša mu neki težak posao, sakrije njegovu pogrešku ili posrnuće – nagraditi u skladu s djelom koje je uradio, a kojim je pritekao u pomoć muslimanu, kao što nam stavlja na znanje i to da će Svemogući Allah biti od pomoći čovjeku, na ovom i budućem svijetu, sve dok on pomaže drugim muslimanima u njihovim teškim poslovima.

Od Ebu Mesuda el-Ensarija, radijallahu anhu, prenosi se da je Allahov Poslanik, sallallahu alejhi ve sellem, rekao: “Jedan čovjek koji je živio prije vas polagao je račun, i nije činio dobro, osim što je poslovao s ljudima, a bio je imućan, pa je svojim slugama naređivao da odgađaju vraćanje duga onima kojima je bilo teško vratiti. Uzvišeni Allah je rekao: ‘Mi smo preči da to činimo! Pobrišite njegove grijeh!’” (Muslim)



Od Ubade b. Velida b. Ubade b. Samita se prenosi da je rekao: "Ja i moj otac krenuli smo tražiti znanje u ovom kvartu ensarija prije nego što izumru. Prvi kojeg smo sreli bio je ashab koji se zvao Ebul-Jeser. S njim je bio njegov sluga koji je nosio hrpu papira. Moj otac mu je rekao: 'Amidža, na tvom licu vidim znakove srdžbe.' Rekao je: 'Istina je! Taj i taj čovjek iz plemena Harami mi je bio nešto dužan. Otišao sam do njegove porodice, nazvao selam i upitao: 'Je li on tu?' Rekli su: 'Nije.' Pred mene je izašao njegov sin, mladić, pa sam ga upitao: 'Gdje ti je otac?' Rekao je: 'Čuo je tvoj glas, pa je ušao pod mamin ležaj.' Rekao sam: 'Izađi. Saznao sam gdje si.' On je izašao. Upitao sam ga: 'Šta te je navelo da se sakriješ od mene?' Rekao je: 'Reći ću ti, tako mi Allaha, i neću ti slagati. Tako mi Allaha, bojao sam se da ti nešto kažem i slažem, da ti obećam i ne ispunim obećanje. Ti si, ipak, bio drug Allahovog Poslanika, sallallahu alejhi ve sellem. A bio sam, tako mi Allaha, u teškom stanju.' Upitao sam: 'Tako ti Allaha?!' Rekao je: 'Allaha mi!' Upitao sam: 'Tako ti Allaha?' Rekao je: 'Allaha mi!' Upitao sam: 'Tako ti Allaha?' Rekao je: 'Allaha mi!' Došao je (Ebul-Jeser), pa je izvadio papir s imenima dužnika i izbrisao njegovo ime, a potom rekao: 'Ako nekada mogneš vratiti, vrati, a ako ne mogneš, halalim ti. Vidjele su ove moje oči (pokazao je prstom na svoje oči), čule su i ove moje uši i zapamtilo je moje srce (pa je pokazao na mjesto srca) da je Allahov Poslanik, sallallahu alejhi ve sellem, rekao: 'Ko sačeka dužnika koji je u teškom stanju ili mu oprosti dug, Allah će ga staviti u Svoj hlad.'" (Muslim)

U ovom hadisu nalazimo naznaku da će onog ko se, sa časnom i iskrenom namjerom, zaputi putem na kojem će naučiti o islamu, npr. učenjem, ponavljanjem, čitanjem, razmišljanjem i pronicanjem u korisne informacije – Allah, džellešanuhu, potaknuti na stjecanje korisnog znanja koje će ga odvesti u džennet.

U navedenom hadisu kaže se da će Allah, džellešanuhu, onima koji se okupe u džamiji radi učenja i proučavanja časnog Kur'ana dati smirenost, sveobuhvatnu milost, poslati im meleke koji će biti s njima u društvu i pohvaliti ih u najuzvišenijem društvu.

U predmetnom hadisu rečeno je da je najveća i jedina počast u činjenju dobrih djela, a ne u precima i porijeklu.



Koristi u hadisu

Nagrada i kazna podudaraju se s onim zbog čega su zasluženi, i to je dio savršene Allahove pravde, osim što je nagrada za dobro djelo, zbog Allahove dobrote, veća od djela. Naime, za dobro djelo se dobije deseterostruka nagrada, pa i do sedam stotina puta više. Naprimjer, kad čovjek ublaži neku ovosvjetsku nevolju vjerniku, Allah će njemu ublažiti neku ahiretsku nevolju – to pokazuje da je nagrada veća od djela.

Predmetni hadis dovoljan je kao poticaj da se olakša dužniku koji ne može vratiti dug. Onom ko to učini Allah će Plemeniti olakšati na ovom i budućem svijetu. Ovaj hadis proteže se na onog dužnika koji ne može vratiti dug tebi i onog koji ne može dug vratiti drugim ljudima: obojici treba pomoći.

Vjerovjesnik, sallallahu alejhi ve sellem, ovdje potiče na to da se sakrije sramota muslimana, ali, ipak, pravila na kojima počiva vjera i vjerski dokazi ukazuju na to da se to ograničava na situacije u kojima je sakriti sramotu muslimana bolje nego je otkriti.

U navedenom hadisu nalazimo poticaj na pružanje pomoći braći muslimanima u svemu onom u čemu im je pomoć neophodna. Pružanje pomoći drugim muslimanima ograničena je na sve ono u čemu je potpomaganje u dobročinstvu i bogobojznosti. Evo o tome Allahovih riječi: “Jedni drugima pomažite u dobročinstvu i bogobojznosti, a ne sudjelujte u grijehu i neprijateljstvu...” (El-Maida, 2) Ako je riječ o nečemu što nije dobročinstvo i bogobojznost, pogledat ćemo i razmisliti, pa ako je to potpomaganje u grijehu, tad je pružanje pomoći haram, na temelju Allahovih riječi: “...a ne sudjelujte u grijehu i neprijateljstvu...” (El-Maida, 2), a ako je potpomaganje u nečemu što je mubah, dozvoljeno – ako ta naša pomoć donosi dobrobit onom kome je pružamo, to je dobročinstvo i potpada pod Allahove riječi: “...i dobro čine. – A Allah voli one koji drugima dobro čine” (El-Maida, 93); ako, međutim, ta naša pomoć ne donosi dobrobit onom kome je trebamo pružiti, pomoći ćemo mu tako što ćemo ga savjetovati da se dotične stvari kloni jer mu ona ne donosi dobro.

U predmetnom hadisu resulullah Muhammed, sallallahu alejhi ve sellem, potiče na poduzimanje potrebnih koraka koji vode ka vjerskom znanju – naveo je nagradu koja slijedi za traganje za znanjem.



Ovaj hadis očit je poticaj muslimanu da sebi ne dopusti da ga obmane porijeklo, i da vodi brigu o činjenju dobrih djela da bi zaslužio visoke džennetske razine. Porijeklo neće biti od koristi; od koristi mu može biti samo dobro djelo koje uradi, jer je Allah, džellešānuhu, rekao: “Najugledniji kod Allaha je onaj koji Ga se najviše boji...” (El-Hudžurat, 13) Ebu Leheb, amidža Allahova poslanika Muhammeda, sallallahu alejhi ve sellem, imao je visoko porijeklo, ali mu to neće biti od koristi jer je bio nevjernik; ući će u džehennemsku vatru i u njoj do vijeka ostati. S druge strane, Bilal el-Habeši i Suhejb er-Rumi, radijallahu anhumā, zaslužili su visoke džennetske stepene iako nikakvo porijeklo nisu imali. Allahov Poslanik, sallallahu alejhi ve sellem, rekao je: “O ljudi, zaista, vaš je Gospodar jedan! I zaista je vaš praotac jedan. Zar ne, Arapin nema prednosti nad nearapinom, niti nearapin ima prednosti nad Arapinom, kao što crveni nema prednosti nad crnim, niti crni ima prednosti nad crvenim, osim po bogobojznosti.” (Ahmed; s ispravnim lancem prenosilaca)

Ibn Omer, radijallahu anhu, prenosi da je Allahov Poslanik, sallallahu alejhi ve sellem, na dan oslobođenja Meke održao govor u kojem je rekao: “Ljudi, Allah je od vas odstranio džahilijetski ponos i hvalisanje precima! Ljudi se dijele na dvije vrste: dobre – bogobojazne, kod Allaha plemenite, i loše – nesretne, kod Allaha beznačajne. Svi su ljudi Ademovi potomci, a Allah je Adema stvorio od zemlje. Allah kaže: ‘O ljudi, Mi vas od jednog čovjeka i jedne žene stvaramo i na narode i plemena vas dijelimo da biste se upoznali. Najugledniji kod Allaha je onaj koji Ga se najviše boji. Allah, uistinu, sve zna i nije Mu skriveno ništa.’ (El-Hudžurat, 13)” (Tirmizi; sahih)

Kazao je Ebu Hurejre, radijallahu anhu: “Sjedili smo kod Vjerovjesnika, sallallahu alejhi ve sellem, kada mu je objavljeno iz sure El-Džumu‘a: ‘I drugima koji im se još nisu priključili...’ Ja upitah: ‘Ko su oni, Allahov Poslaniče?’ On ne odgovori dok tri puta ne bijaše upitan. Među nama je tada bio i Selman el-Farisi, na čije rame Allahov Poslanik, sallallahu alejhi ve sellem, stavi svoju ruku, a onda reče: ‘Kada bi iman bio na sazviježđu Surejji, našli bi ga ljudi, ili čovjek poput ovoga.’” (Buhari i Muslim)



SADRŽAJ

Predgovor.....	4
Uvod.....	6

PREDAVANJE BR. 1

Prvi hadis	7
Prenosilac hadisa.....	7
Značenje izrazā.....	8
Opće značenje.....	9
Koristi u hadisu	9

PREDAVANJE BR. 2

Drugi hadis	13
Prenosilac hadisa.....	13
Značenje izrazā.....	14
Opće značenje.....	14
Koristi u hadisu	16

PREDAVANJE BR. 3

Treći hadis	18
Prenosilac hadisa.....	18
Značenje izrazā.....	19
Opće značenje.....	19
Koristi u hadisu	19
Četvrti hadis	22
Prenosilac	22
Značenje izrazā.....	22
Opće značenje.....	22
Koristi u hadisu	23



PREDAVANJE BR. 4

Peti hadis	26
Prenosilac hadisa.....	26
Značenje izrazā.....	26
Opće značenje.....	26
Koristi u hadisu	26

PREDAVANJE BR. 5

Šesti hadis	31
Prenosilac hadisa.....	31
Značenje izrazā.....	31
Opće značenje.....	32
Koristi u hadisu	32

PREDAVANJE BR. 6

Sedmi hadis	35
Prenosilac hadisa.....	35
Značenje izrazā.....	35
Opće značenje.....	36
Koristi u hadisu	37

PREDAVANJE BR. 7

Osmi hadis	40
Prenosilac hadisa.....	40
Značenje izrazā.....	40
Opće značenje.....	40
Koristi u hadisu	44

PREDAVANJE BR. 8

Deveti hadis.....	46
Prenosilac hadisa.....	46
Značenje izrazā.....	46
Opće značenje.....	47



Koristi u hadisu	49
Deseti hadis	50
Prenosilac hadisa.....	50
Značenje izrazā.....	50
Opće značenje.....	51
Koristi u hadisu	52

PREDAVANJE BR. 9

Jedanaesti hadis	53
Prenosilac hadisa.....	53
Značenje izrazā.....	53
Opće značenje.....	54
Koristi u hadisu	57

PREDAVANJE BR. 10

Dvanaesti hadis.....	58
Prenosilac hadisa.....	58
Značenje izrazā.....	59
Opće značenje.....	59
Koristi u hadisu	61

PREDAVANJE BR. 11

Trinaesti hadis	62
Prenosilac hadisa.....	62
Značenje izrazā.....	62
Opće značenje.....	62
Koristi u hadisu	63
Četnaesti hadis	64
Prenosilac hadisa.....	64
Značenje izrazā.....	64
Opće značenje.....	64
Koristi u hadisu	65



PREDAVANJE BR. 12

Petnaesti hadis	67
Prenosilac hadisa.....	67
Značenje izrazā.....	67
Opće značenje.....	68
Koristi u hadisu	69

PREDAVANJE BR. 13

Šesnaesti hadis	71
Prenosilac hadisa.....	71
Značenje izrazā.....	71
Opće značenje.....	72
Koristi u hadisu	74

PREDAVANJE BR. 14

Sedamnaesti hadis.....	76
Prenosilac hadisa.....	76
Opće značenje.....	77
Koristi u hadisu	78

PREDAVANJE BR. 15

Osamnaesti hadis	80
Prenosilac hadisa.....	80
Značenje izrazā.....	80
Opće značenje.....	81
Koristi u hadisu	83

PREDAVANJE BR. 16

Devetnaesti hadis.....	85
Prenosilac hadisa.....	85
Značenje izrazā.....	85
Opće značenje.....	86
Koristi u hadisu	86



Dvadeseti hadis.....	88
Prenosilac hadisa.....	88
Značenje izrazā.....	88
Opće značenje.....	88
Koristi u hadisu	89

PREDAVANJE BR. 17

Dvadeset prvi hadis.....	91
Prenosilac hadisa.....	91
Značenje izrazā.....	91
Opće značenje.....	92
Koristi u hadisu	94